

ሉቃስ ፩ ዓፊዳ ኑ ጎዳ ዮሱሲ ኪርስቶስ ሚሺራቾ ቃላ ጊዶ ቆፋ

ሉቃስ ሚሺራቾ ቃላይ ዮሱሲ ዳሮ ዎዴፔ ካሴ ያናይሳኮ ጌቲቲ ናቤታን ኢስራጌሌ አሳስ ዮቴቲ ኡቲን ኢስራጌሌ አሳይ ናጊ ኡቲዳ ኪርስቶሲ “አስ ዉርሲ አሺዛይ” ጊዳይሳ ቆንጨናሳ። ሉቃስ ዮሱሳ “ማንቆታስ ሚሺራቾ ቃላ ሳባካናስ” ባ አዋፔ ኪቴቲዳይ ጊዳይሳይ ሚሺራቾ ቃላዚካ አሳስ ዲዛ ዱማ ዱማ ሚቶስ አጌ ቤሲዛይሳ ዮቴስ። ሉቃስ ሚሺራቾ ቃላዛ ጊዶን ሃራፔካ ዮሱሳ ሂዶታ ጊሽ ዮቴዛ ኮይሮ ሹምፖቲኔ ዉርሴሳ ሹምፖታን ሎዔስ ዮቴዳይ ሂዶታ ጊሻሳ። ዮሱሲ ፑዴ ሳሎ ቢዳፔ ጉዬ አማኖይ ዋኒ ናምፍንሶ ዲጨዳኮኔ ሃዋሬታ ማፃፋን ሃይሳ ፃፊዳይ ሄ ማፃፋዛን ዮቴዴስ።

ኪታንቻቲ ዮዲዳ ዮሳ ጊሽ ዮሱሲ ዮሌቲን ሜሄ ሄሚዛይቲ ኢዛ ቤዬዳይሳ፣ ዮሱሲ ቡሮ ጉሳን ዲሺን ያሳ ኬሴ ቢዳይሳ አሳስ ሚሻ ጊዳይ ሄ ሳማሪያ አዴዛ አሶን ዳዬዲ ቤቲዲ ናዛ ታሪኬይ ሄይቲ ዉሪካ ሉቃስ ሚሺራቾ ማፃፋን ፃላላ ቤቴቴስ። ኢዛ ሚሺራቾ ቃላዛን ጋፔ ጋፃ ጋካናስ አዴፌ ዮቴዳይ ዎሳ ጊሽ፣ ፂሎ አያና ጊሽ፣ ማጫሳታስ ዮሱሳ አሶ ጊዶን ኢስታስ ኢሜቲዳ ጊሻኔ ያሲ ናጋራ አቶ ጊዳይሳ ዮቴስ ጉስ።

- ሃ ማፃፋይ አይኪዳ ኩሜሳ ቆፋ
- ጌሎሶ 1:1-4
- ፃማቂዛ ዮሃኒሳ ዮሌቴሴኔ ዮሱሳ ዮሌቴሴ 1:5-2:52
- ፃማቂዛ ዮሃኒሳ አሶ 3:1-20
- ዮሱሳ ፃማቂቴሴኔ ፓጨቴሴ 3:21-4:13
- ዮሱሲ ባ አሶ ኮይሮ ጋሊላን ዶሚዴስ 4:14-9:50
- ጋሊላፔ ዮሩሳላሜ ቡስ 9:51-19:27
- ዮሩሳላሜኒኔ ሄ ሄራን ዉርሴሳ ሳሚንታን ዮሱሳ ጋኪዳ ሜቶ 19:28-23:56
- ጎዳ ዴንዶ ቆንጨሴኔ ፑዴ ሳሎ ቡስ 24:1-53

1 ቦንቾ ቶፊሎሳ ኑ አቻን ሃኒዳ ዮቦታ ጊሽ ዳሮ አሳቲ ባሲ ሃኒዳ ማላ ፃፊዳ። 2 ሄ ታሪኬዚካ ኮይሮፔ ዴንሲዲ ባ አይፌራ ቤዬዳ ማርካቲኔ ያሳ ቃላ ዮቴዳይቲ ኑስ አሲዳይሳ። 3 ታካ ታ ባጋራ ፃጵፔ ዴንሳዳ ኬሃ ናጌታዳኔ ፓጫ ፂላዳ ታሪኬዛ ዉርሳ ሲንሴ ፃፊታናስ ቤሲዛይሳ ሲንሳሳዳ ካሊዲ ፃፊታናስ ቤሲዛይሳ

ካሌሳዳ ናጌታዳ ኔስ ፃፋና ማላ ታስ ሎዎ ጊዲ ቤተዴስ። 4 ሃይሳ ዉርሲሳ ታ አሲዛይ ኔ ታማሪዳይሲ ቱማ ጊዲዳይሳ ኔና ኤሮ ጉሳሳ።

ፃማቂዛ ዮሃንሲ ዩሌታናይሳ ኪታንቻ ጋብሬሌይ ካሴቲዲ ዮተዴስ

5-6 ሄርዶሲ ዩሁዳ ቢታን ካዎቲዳ ዎዴ አቢያ ጌቴቲዛ ቄሴታ ሃላቃ ባጋፌ ቄሴቴሳ አሶ ታራይ ኢዛ ጋኪዳ ዛካራሳ ጌቴቲዛ ኢሲ ቄሴይ ዴስ። ኢዛ ማቼያካ ኤሊሳቤያ ጌቴታዉስ፤ ኢዛካ አሮኔ ባጋ አሳ። ናምዓቲካ ጎዳ አዛዞኔ ኢዛ ዎጋ ዎሶይ ባይንዳ ናጊዲ ዲዛይታኔ ያሳ ሲንሳን ሂሎ አሳ። *

7 ጊዴ አቲን ኤሊሳቤያ ና ዩሎንታ ማካራ ጊዲዳ ጊሽ ኢስታስ ናይ ባዋ፤ ናምዓቲካ ዎዴይ ሱጌቲዳ አሳ።

8 ዛካራሲ ያሳ ሲንሳን ቄሴቴሳ አሶ ታራይ ኢዛ ጋኪን ኢዚ አሲሺን 9 ቄሴታስ ዲዛ ዎጋ ማላ ያሳ ኬሳን ጌሊዲ ኤፃኔ ጨዋሳና ማላ ኤፃይ ኢዛ ጋኪዴስ። 10 ኤፃኔይ ጨዋቲሺን አሳይ ዉሪካ ካሬን ዲዲ ዎሴስ።

11 ጎዳ ኪታንቻይ ኤፃኔይ ጨዋቲዛ ሶፔ ኡሻቻ ባጋራ ኤቂዲ ዛካራሳስ ቤተዴስ። 12 ዛካራሲካ ኢዛ ቤዩዲ ኬሂ ዳጋሚዲ ባቢዴስ። 13 ኪታንቻይ ዛካራሳስ “ባቦፋ! ኔ ዎሳይ ሴቴቲዴስ፤ ኔ ማቼያ ኤሊሳቤያ ኔስ አቱማ ና ዩላና ኢዛ ሱንሳካ ኔ ዮሃንሳ ጋዳ ሱንሳና። 14 ኢዛ ዩሌታን ኔኒ ዳሮ ኡፋዮታና፤ ዳሮ አሳይካ ኡፋዮታና። 15 ጎዳ ሲንሳን ኢዚ ጊታ ጊዳና። ዎይኔፔ አሴቲዳ ጫጄ ጊዲንካ ሃራ ማሶሲዛ ኡሻ ጊዲንካ ኢዚ ኡዩና፤ ኢዚ ቡሮ ባ አዩይ ቃንሳን ዲሺ ሂሎ አያናን ኩማና። * 16 ኢስራዔሌ አሳፔ ዳሮታ ኢስታ ያሳኮ ዛራና። 17 አዋታ ዎዝና ኢስታ ናይታኮ፤ አዛዜቶንታይቲካ ጌዴ ሂሎታ ጨንጫቴሳኮ ዛራና ማላኔ ጎዳስ ቤሲዛ ዴሬ ጊጊሳና ማላ ኤላሳ አያናኔ ኢዛ ዎልቃን ጎዳፔ ሲንሳራ ኢዚ ባና” ጊዴስ። *

18 ዛካራሲ ኪታንቻስ፤ “ታኒ ጨማ፤ ታ ማቼያካ ጨማዱስ፤ ታኒ ሃይሳ አዛን ኤራኔ?” ጊዲ አይቺዴስ።

19 ኪታንቻይካ ዛሪዲ “ታኒ ያሳ ሲንሳን ኤቂዛ ጋብሬሌ። ታኒካ ሃ ሚሺራቾዛ ኔስ ጋላናስ ኪቴታዳ ያዲስ። * 20 ሄኮ ኔኒ ባ ዎዴን ፖሌታና ታ ቃላ አማኖንታ ኢዲዳ ጊሽ ኔ ዱናይ ዱዳና፤ ኔኒካ ሃሳያና ዳንዳያካ” ጊዴስ።

21 ሄ ዎዴ ዴሬይ ዛካራሲ “ያሳ ኬሳፌ ኬዞንታ አዛስ ጋምዲዳኮ” ጊዲ ሞዴቲሺ ናጊዴስ። 22 ኢዚ ያሳ ኬሳፌ ኬዚዲ

* 1:5-6 1ታር 24:10 * 1:15 ታይ 6:3 * 1:17 ሚል 4:5-6 * 1:19 ዳኔ 8:16፤ 9:21

አሳ ሃሳዩላናስ ዳንዳይቤና። ማላቲ ማላቲ ቤሶፕ አቲን ሃሳያናስ ዳንዳዮንታ አጊን አሳይ ኢዚ ያሳ ኬሳን ያሳፌ ኦራሳ ሚሽ ቤዱዳይሳ ኤሪዴስ።

23 ዛካራሲካ ባ አሶ ታራይ ፖሌቲዳፕ ጉዩን ባሶ ሲሚዴስ።
24 ሄሳፌ ካሊን ኢዛ ማቼያ ኤሊሳቤፃ ና ቃንሳታዱስ፤ ኢቻሻንሶ አጊናይ ጋካናስ አሲ ባና ቤዮንታ ማላ ቆቴታዱስ። 25 ኢዛካ ጎዳይ ባ ማሮታን ታ ሌቄቲዳይሳ አሳ ጊዶፌ ዲጋናስ ሃ ዎዴዛን ሃይሳ ታስ አሲዴስ ጋዱስ።

ዮሱሲ ዩሌታናይሳ ጋብሬሌይ ካሴቲዲ ዮቲዴስ

26 ኤልሳቤፃ ቃንሳቲዳ ኡሱፑንሳ አጊናን፤ ያሲ ባ ኪታንቻ ጋብሬሌ፤ ጋሊላ ቢታን ዲዛ፤ ናዚሬቴ ጊዛ ካታማ ዩዲዴስ።
27 ኢዚካ ካዎ ዳዉቴ ዜሬሳ ጊዲዳ ዮሴፌ ጌቴቲዛ አሳስ ጊጋ ኡቲዳ ማራዎ ጌቴቲዛ ጌላዎይኮ ኪቴቲዴስ። * 28 ዩዲኔ ኢዛ ዲዛሶ ጌሊዲ “ሃኔ ያሲ ኔና አንጄዳሬ ሳሮ ያሲ ጎዳይ ኔናራ ዴስ ኔንካ አንጄቲዳሮ” ጊዴስ።

29 ማራማ ኪታንቻ ሃሳያን ኬሃ ዳጋማዳ፤ “ሃይሲ አይ ጊዛ ሳሮታ?” ጋዳ ዮዎዛ ኬሃ ቆፓዱስ። 30 ኪታንቻይካ ማራዎ “ያሲ ኔናን ኡፋዮቲዛ ጊሽ ባቦፋ! 31 ኔኒ ቃንሳታና፤ አቲማ ናካ ዩላና፤ ሱንሳካ ዮሱሳ ጋዳ ሱንሳና፤ * 32 ኢዚካ ጊታ ጊዳና፤ ኡባፌ ቦላ ያሳ ና ጌቴታና፤ ጎዳ ያሲ ኢዛ አዎ ዳዉቴ ካዎቴሳ ኢዛስ ኢማና። 33 ኢዚ ኢስራዔሌ ናይታ ቦላን ሜርናስ ካዎታና፤ ኢዛ ካዎቴሳሲካ ዉርሲሲ ዴና” ጊዴስ።

34 ማራማካ ኪታንቻስ “ታኒ አዴ ጌላቤኬ፤ ሺን ሃይሲ ዋኒ ሃናኔ?” ጋዳ አይቻዱስ።

35 ኪታንቻይካ ማራሚሲ “ዒሎ አያናይ ኔ ቦላ ዎዳና ዉርሶፌ ቦላ ያሳ ዎልቃይ ኔ ቦላ ኩዋሳና፤ ሄሳ ጊሽ ዩሌታና ናዚ ጌሻ ያሳ ና ጌቴታና። 36 አሲ ዩሉኩ ኢዛ ማካራ ጊዲ ሃሳዩዛ ኔ ዳቦያ ኤሊሳቤፃ ጨማቴሳን አቲማ ና ቃንሳታዳ ዩላናስ ኡሱፑንሶ አጊና አይካዱስ። 37 ያሳሲ ሃኖንታ ሚሺ ባዎ” *

38 ማራማካ ዛራዳ “ሄኮ ታኒ ያሳ አይሌ ዲኪና፤ ኔ ጊዳ ማላ ታስ ሃኖ” ጊን ኪታንቻይ ኢዚፕ ሻካቲዲ ቢዴስ። ማራማ ኤሊሳቤፃ ቤያና ባዱስ።

39 ማራማካ ሄ ዎዴ ማታራ ኤሶታ ዴንዳዳ ፑዴ ጌዜ ዴሬን ዲዛ ኢሲ ዩሁዳ ካታማ ባዱስ። 40 ዛካራሳ ኬሌ ጌላዳ ኤሊሳቤፃ ሳሮታዱስ። 41 ኤሊሳቤፃ ማራሚ ሳሮሳ ሲዩዳ ማላ ቃንሳን ዲዛ ናዚ ኢዚ ቃንሳን ጉፒዴስ፤ ኤሊሳቤፃንካ ዒሎ አያናይ ኩሚዴስ። 42 ኢዛካ ባ ቃላ ደቄ አሳዳ “ማጫሳ ኡባፌ ኔ አንጄቲዳሮ፤ ኔ

* 1:27 ማቶ 1:18 * 1:31 ማቶ 1:21 * 1:37 ሜዴ 18:14

ቃንሳን ዲዛ ናዚካ አንጄቲዳይሳ። 43 ታ ጎዳ አያ ታኮ ያዳ ታና አይቻናስ ታኒ አኔ? 44 ኔ ሳሮካ ቃላ ታ ሲዱዳ ማላ ታ ኡሎ ጊዶን ዲዛ ናይ ኡፋይሳ ጉፐዴስ። 45 ፖሌታና ጊዲ ጎዳይ ኢዚስ የቲዳይሳ አማኒዳራ ኢዛ አንጄቲዳይ” ጋዱስ

ማራሚ ጋላታ ዎሳ

46-49 ማራማካ

“ኢዚ ባ አይሌ ካዉሻቴላ ያሊዳ ጊሽ ታ ሽምፐፐ ጎዳ ዶቁ አሳዳ ቦንቻዉስ። * ታ አያናይካ ታና አሺዛ ታ ያሳን ኡፋዬታዉስ። ዎልቃማ ጎዳይ ታስ ጊታ ሚሼ አሲዳ ጊሽ ሃቺፌ ሲንሳን አሲ ዉሪ ታና አንጄቲዳይ ጋና። ኢዛ ሱንሳይካ ጌሻ። *

50 ኢዛ ማሮይ ኢዛስ ባቢዛይታስ ና ና ጋካናስ ዳና።

51 ባ ዎልቃን ዳሮ ሚኖ አሶ አሲዴስ፤ ባ ዎዝና ቆፋን አቶሬቲዛይታ ላሊዴስ።

52 ካዎታ ካዎቴላፌ ዎሲዴስ፤ አሽኬታ ቃሴ ዶቁ ዶቁ ሂስቲዴስ። *

53 ጋሬዳይታ ሎዎ ሚሻን ካልሲዴስ፤ ዱሬታ ጊዲኮ ሜላ ኩሼ ዬዲዴስ።

54-55 ካሴ ኑ አዎታስ አብራሃሜሲኔ ኢዛ ቆዎታስ ጊዳ ቃላ ናጋናስ

ባ ማራቴላ ዩሺ ቆፐዲ ባ አይሌ ኢስራዔሌ ማዲዴስ” ጋዱስ። *

56 ማራማካ ኤሊሳቤጻ አቻን ሄዡ አጊና ሲሬ ጋምዓዳ ባሶ ሲማዱስ።

ፃማቂዛ የሃኒሲ ዬሌቲዴስ

57 ኤሊሳቤጻስ ዬሎ ጋላሳይ ጋኪን አቱማ ና ዬላዱስ። 58 ኢዚ ጉታቲኔ ዳቦቲካ ጎዳይ ኢዚስ ጊታ ማራቴላ አሲዳይሳ ሲይዲ ኢዚራ ኢሲፌ ኡፋዬቲዳ።

59 ዬሌቲዳ አስፑንሳ ጋላስ ቃፃራስ ዬዳ። ኢዛ አዎ ሱንሳን ዛካራሳ ጊዲ ሱንሳና ኮይዳ። * 60 ጊዶ አቲን አያ “ሃኔና፥ ኢዛ ሱንሳ የሃኒሳ ጌቴቶ” ጋዱስ።

* 1:46-49 1ሳሜ 2:1-10 * 1:46-49 1ሳሜ 1:11 * 1:52 ኢዮ 5:11፤ 12:19 * 1:54-55 ሜዴ 17:7 * 1:59 ሌዌ 12:3

61 ኢስቲካ ኢዚስ “ኔ ዳቦታፔ ዮሃንሳ ጌቴቲዲ ዲጌጌቲዳ አሲ አኒካ ባዎ” ጊዳ። 62 አዎይ ዛካራሲ “ናዛ እና ጊዲ ሱንሳና ኮዪዳኮኔ” ማላታን አይቺዳ።

63 ዛካራሲካ ዓሬዛ ሚሼ ኢዛስ ኢማና ማላ አይቺ ኤኪዲ ሱንሳይ “ዮሃንሳ” ጊዲ ዓሬን አሳይ ወሪካ ማላሌቲዴስ። 64 ሄራካ ዛካራሳ ዱናይ ፖጌቲዲ ኢንግርሲ ቢርሼቲን ሶሳ ጋላታ አይኪዴስ።

65 ኢዛ ጉታቲ ወሪ ዳሮ ባቢዳ። ሃይሲ ወሪካ ጵቃ ጌዜ ቢታን ዩሁዳ ዴሬን፣ ኡባሶን ሃሳዬቲዴስ። 66 ሃይሳካ ሲዩዳ አሲ ወሪካ “ሃ ጉሳ ናይ አይ ሃናኔሻ?” ጊዲ ሃኖዛ ወርሲካ ባ ዎዝናን አይኪዴስ። ጎዳ ኩሼይ ቱማፔ ኢዛራ ኢሲሬ ዴስ።

ዛካራሲ ተንቢቱ ዮቲዴስ

67 ናዛ አዎይ፣ ዛካራሲ ዒሎ አያናን ኩሚዲ ቲንቢቱ ሃሳዪሽ

68 “ዩዲ ባ አሳ አሺዳ ጊሽ ኢስራዔሌ ሶሲ ጋላቲቶ።

69-70 ቤኒ ዎዴ ባ ጌሻ ናቤታ

ዱናን ሃሳዬቲዳይሳ ማላ

ባ አይሌ ዳዉቱ ኬሳን

አሺዛ ዎልቃ ኑስ ዴንሲዴስ።

71 ኢዚ ኑና ኑ ሞርኬታፔኔ፣

ኑና ኢዒዛይታ ኩሼፔ አሼስ።

72 ሃይሳ ኢዚ አሲዳይ ኑ አዎታስ ባ ማሬቴሳ ቤሳናሳ፣

ባ ጌሻ ጫቆዛ ዩሺ ቆፓናሳ።

73-75 ካሴ ኑ አዎ አብራሃሜስ ጫቂዳይሳ ቆፓና ማላኔ

ኑ ሞርኬታ ኩሼፔ ኢዚ ኑና ኬሲን ኑኔ ኢዛስ ባቦይ ባይንዳ አሳናሲኔ

ኑ ዲዛ ዎዴ ኡባን ባ ሲንሳን ኑና ጌሻቴሳኔ ዒሎቴሳን ኤሳናሳ።

76 ጎዳ አጌ

ጊጊሳናስ ኔ ኢዛፔ ሲንሳራ ቢዛ ጊሽ ታ ናዞ

ኔኔ ዎጋ ሶሳ

ናቤ ጌቴታና። *

77 አሳይ ባ ናጋራፔ ማሬቲዳ ጊሽ ዴሬስ

አቶቴሳ ኤራቴስ ኔ ኢማና ማላ

78 ኑ ሶሳ ሎዎ ማሬቴሳሬ ዴንዲዳይሳን

ሳሎፔ ኑስ አዎይ ኬዚዴስ።

79 ሄሲካ ጵማን ዲዛይታሲኔ

ሃይቆ ኩዋ ጊዶን

* 1:76 ሚላ 3:1

ዲዛይታሲካ ፖሊሳና ማላኔ ኑ ቶሆታካ ሳሮቴሳ አጌ ካሌሳናሳ”
ጊደስ።

80 ጉሳ ናዚካ ዲጫደስ፤ አያናኒካ ሚኒደስ። ኢስራዔል አሳስ ቆንጩን ቤታና ጋካናስ ባዞ ቢታን ደዒደስ።

2

ዮሱስ ዮሴቴደስ (ማቶ 1:18-25)

1 ሄ ዎዴ ቢታ ቦላን ዲዛ አሲ ወራካ ታዩቤቲዲ ፃፊታና ማላ አሮሜ ካዎ አወጊስዎላፕ አዋጃይ ኬዚደስ። 2 ሄሲካ ቁሬኔዎሳ ጌቴቲዛይሲ ሶሪያ ጌቴቲዛ ደሬ ሃሪዛ ዎዴ ሃኒዳ ኮይሮ ደሬ ታይቦ። 3 ሄሳ ጊሽ አሲ ወራ ፃፊታናስ ባ ደሬ ደሬ ቢደስ።

4 ዮሴፌይካ አሾ ዳቦቴሳን ዳወቴ ባጋፌ ጊዲዳ ጊሽ ጋሊላ አወራጃ ጊደን ዲዛ ናዚሬቴ ካታማፔ ዩሁዳ አወራጃ ቤቴሌሜ ጌቴቲዛ ዳወቴ ካታማፔ ዩደስ። 5 ኢዚ ፃፊታና ቢሺን ኢዛስ ጊጌታ ዳሼ ዮላና ማቲዳ ማራሚራ ቢደስ። 6 ኢስቲካ ሄን ጊሺን ኢዚስ ዮሎ ዎዴይ ጋኪደስ። 7 ኢዛካ ኮይሮ አቱማ ና ዮሊዳይሳፌ ጉዮ ኢማሲ አቂዛ ኬሳን አቂዛሶይ ባይንዳ ጊሽ ናዛ ጫርቃራ ፃፃዳ ሚዛ ሲንሳን ኢሺሳዱስ።

ማሄ ሄሚዳይታኔ ኪታንቻታ

8 ቤታሌሜ አቻን ዶርሳ ሄሚዛ አሳቲ ዶርሳ ናጊሼ ቃማራ ካሬን አቂዛይቲ ደቴስ። 9 ጎዳ ኪታንቻይካ ኢስታኮ ዩደስ፤ ጎዳ ቦንቾ ፖዎይካ ኢስታ ላንቁን ዩዩ አዳናስ ፖሊደስ። ኢስቲካ ኬሂ ዳጋሚዳ ጊሽ። 10 ኪታንቻይ ኢስታ “ባቦፍቴ! ታኒ አሳ ኡባስ ጊዲዛ ጊታ ኡፋይሳ ሚሺራቾ ኤካ ያዲስ። 11 ሃቾ ካዎ ዳወቴ ካታማ ቤታሌሜን ሽምፖ ዳሌይ ዮሴቴደስ። ኢዚካ ጎዳ ኪርስቶሳ ጌቴቴስ። 12 ጫርቃራ ፃፃቲ ኢቺዳ ጋጪኖ ና ደማንደታ ሄሲካ ኢንቴስ ማላታ ጊደ” ጊደስ።

13 ኢዛራካ ሃራ ዳሮ ሳሎ ኪታንቻቲ ቤቲዳ። ዎሳ ጋላቲሼ።
14 “ቦላ ሳሎን ዎሳስ ቦንቾይ ጊደ ሳሮቴሲካ ቢታ ቦላን ኢዚ ዶሲዛ አሳ ኡባስ ጊደ” ጊዳ።

15 ኪታንቻቲ ኢስታፌ ቫኬቲዲ ሳሎ ሲሚን ዶርሴ ሄሚዳይቲ ባ ጊደን ኢሶይ ኢሳ “አኔ ሃ ዩቴ ጎዳይ ኑስ ቆንጫሲዳይሳኔ ሃኒዳይሳ ቤቴሌሜ ካታማ ቢዲ ቤዮስ” ጊዳ።

16 ኢስቲካ ኤሌሊ ቢዲ ማራሚራ፣ ዮሴፌራኔ ሚዛ ሲንሳን ኢቺዳ ናዛ ደሚዳ። 17 ቤይዳይሳፌ ጉዮን ጎዳ ኪታንቻይ ናዛ ጊሽ ኢስታስ ዮቴዳይሳ ወርሲ ዛሪ ዮቴዳ። 18 ሄሚዳይቲ ዮቴዳይሳ ሲዩዳ አሳይ ወራ ኬሂ ማላሌቲደስ። 19 ጊደ አቲን ማራማ ዮዎዛ

ወርሳ ባ ወዘናን ዎሳ ዴንሳ ቆጋሽ ጋምዓዱስ። 20 ሄሚዛይቲካ ሃንዳይስ ወሪካ ኪታንቻይ ኢስታስ የቲዳ ማላ ጊዲዲ ቤቲዳ ጊሽ ሲይዳይሳሲኔ ቤዩዳይሳስ ኡባስ ያሳ ጋላቲሼኔ ቦንቺሼ ሲሚዳ።

ጋጨኖ ና ዩሱሳ ያሳ ኬሴ ኤፊዳ

21 ናዚ ዩሌቲን አስፑንሳ ጋላሳን ቃፃሬቲዛ ዎዴይ ጋኪን አዩያ ኢዛ ቃንሳታናፔ ካሴ ኪታንቻይ ጊዳ ማላ ዩሱሳ ጌቴቲዲ ሱሚዴስ። *

22-23 ሙሴ ዎጋ ማላ ኢስቲ ጌዩዛ ዎዴይ ወሪን ዮሴፌይኔ ማራማ ጉሳ ና ዩሱሳ ጎዳ ያሳ ሲንሴ ሺሻናስ ኤኪዲ ዩሱሳላሜ ኬዚዳ። ሄሲካ ጎዳ ዎጋን ኮይሮ ዩሌቲዛ አቱማ ናይ ወሪ ጎዳስ ዱማ ጊዳና ጌቴቲዲ ፃፊቲዳይሳ ፖላናሲኔ * 24 ቃሴካ ጎዳ ዎጋን ናምቡ ሃራጴ ካፎታኔ ዎይኮ ናምቡ ሃራጴ ካፎ ጨዩታ ጌቴቲዳይሳ ማላ ያርሾ ሺሻናሳ። *

25 ሄ ዎዴ ዩሱሳላሜ ካታማን ሂሎኔ ያሳ ባቢዛ ኢሲ ሲሞና ጌቴቲዛ አሲ ዴስ፤ ኢዚካ ኢስራዔል ናይታ አቶቴሳ ናጊዛ አሳኔ ሂሎ አያናይ ኢዛ ቦላ ሽምፒዳ አሳ። 26 ቃሴካ ኪርስቶሳ ቤዮንታ ዲሼ ሃይቆንታ ማላ ሂሎ አያናይ ኢዛስ ቆንጨዴስ። 27 ኢዚካ ሄ ዎዴ ሂሎ አያናይ ካሌሲን ያሳ ኬሴ ላሻ ጋስ ጌሊዴስ። ናዛ አዩዩራኔ አዋራ ሙሴ ዎጋን ቤሲዛይሳ ፖላናስ ጉሳ ና ዩሱሳ ኤኪዲ ጌሊዳ ዎዴ። 28 ሲሞኒ ናዛ ኤኪ ኢዲሚዲ ያሳ ጋላቲሼ። 29-31 “ጎዶ! ኔ ጫቂዳ ቃላ ማላ ሃዲ ታኒ ኔ

አይሌይ ኔ አሺዛይሳ ታ አይፌራ ቤዩዳ ጊሽ ሂዳ ታና ሳሮን ኤካ፤

አሳ ኡባ ሲንሳን ኔ ጊጊሲዳ አቶቴሳ

ሃዲ ታኒ ታ አይፌራ ቤያዲስ።

32 ሃይሲካ ኡባ ዴሬስ ጌሜቲዳይሳ ቆንጨሲዛ ፖዶ፣ ኔ ዴሬ ኢስራዔሌሲካ ቦንቾ” ጊዴስ።

33 ኢዛ አዋይኔ አያ ኢዛ ጊሽ ሃሳዩቲዳ ዮዎዛን ማላሌቲዳ።

34 ሲሞኒካ ኢስታ አንጂዴስ፤ ማራሞካ “ዳሮ አሳ ዎዘና ቆፋይ ቆንጫና ማላ ሃይሲ ኢስራዔሌን ዲዛ ዳሮታስ ዳዮሲኔ አቶቴሳሳ፤ ኢዛ ኢዲዛይታስ ቃሴ ማላታ ጊዳና ማላ ዶሬቲዴስ። 35 ቃሴካ ዳሮታ ዎዘና ቆፋይ ቆንጫና ማላ ናዛ ሚሻይ ቃራ ማሻ ማላ ኔ ዎዘና ጳልቃና” ጊዴስ።

36 ቃሴካ አሴሬ ባጋፌ ፋኑዔሌ ና ሃና ጌቴቲዛ ጨሚዳ ናቤይ ዳወስ፤ ኢዛካ ባ ኮይሮ አዚናራ ላፑን ላይስ ኩሜስ ዴዓዱስ።

37 ላይሳይ ኢዚስ አሱፑን ታማኔ አይዱ ላይስ ጊዳና ጋካናስ

* 2:21 ሌዌ 12:3፣ ሉቃ 1:31 * 2:22-23 ኬሳ 13:2፣12 * 2:24 ሌዌ 12:6-8

ቃማኔ ጋላስ የማሹኔ ዎሳሹ የሳ ኬሳፌ ቫኬቶንታ አምጫቴላን ጋምዓዱስ።³⁸ ሄ ዎዴካ ሺቃዳ የሳ ጋላታዱስ። ዩሩሳላሚ ዎዜቴስ ናጊሼ ዲዛይታስ ኡባስ ጉሳ ናዛ ጊሽ ዮታዱስ።

ናዚሬቴ ሲሚዳ

³⁹ ዮሴፌራኔ ማራሚራ ጎዳ ዎጋን አዛዜቲዳይሳ ፖሊዲ ጋሊላ አወራጃን ዲዛ ባሶ ናዚሬቴ ካታማ ሲሚዳ። * ⁴⁰ ጉሳ ናዚካ ዲጩዲ ሚኒ ሚኒ ቢዴስ፤ አዶ ኤራቴላን ኩሚዴስ፤ የሳ አዶ ኪያቴሳይካ ኢዛ ቦላ ዴስ።

⁴¹ ኢዛ አዋይኔ አያ ላይላን ላይላን ፓዚጋ ቦንቻናስ ዩሩሳላሚ ቤቴስ። * ⁴² ናዛስ ላይላይ ታማኔ ናምዑ ላይላ ኩሚዳ ዎዴ ካሴ ሎሴ ጊዲዳይሳ ማላ ፓዚጋ ቦንቻና ኬዚዳ። ⁴³ ፓዚጋ ባዓሌዛ ቦንቻዲ ባሶ ሲሚሺን ዩሱሲ ዩሩሳላሚን አቲዴስ። ዩሊዳይቲካ ኢዚ አቲዳይሳ ኤሪቤይቴና። ⁴⁴ ባናራ ኢሲፌ ቢዛ ኦጌ አሳራ ዴስ ጊሼ ኢሲ ጋላሳ ኦጌ ቢዳ። ጊዶ አቲን ኢዚ ኢስታራ ባይንዳይሳ ኤሪዲ ባ ዳቦታ አቻኒኔ ላጌታ አቻን ዲዛኮኔ ጊዲ ኮይዳ።

⁴⁵ ኮዩ ኮይዲ ቤቶንታ ኢዲን ዩሩሳላሚ ሲሚዳ።

⁴⁶ ሄዥ ጋላሳፌ ጉዬ የሳ ኬላን ታማርሲዛይታ ጊዶን ኡቲዲ ሲዩሹ፣ አሳታ አይቺሼኔ ኢስታ አይሻ ዛሪሼ የሳ ኬላን ዲሺን ዴሚዳ። ⁴⁷ ሲዩዳይቲ ወሪ ዩሱሳ አኬካኒኔ ኢዛ ዛርዛን ዳር ማላሌቲዳ።

⁴⁸ ዮሴፌይኔ ማራማ ኢዛ ቤዩዳ ዎዴ ማላሌቲዳ። ማራማካ “ታ ናዛ አይስ ሃይሳ ማላ አሳዲ? ኔ አዋይኔ ታኒኔ ኔና ኮዩሹ ኬሂ ሜቶቴቲዶስ” ጋዱስ።

⁴⁹ ኢዚካ ዛሪዲ “ታና አይስ ኮዩዴቲ? ታኒ ታ አዋ ኬላን ዳናስ ቤሲዛይሳ ኤሪቤኬቲ ጊዴስ።” ⁵⁰ ጊዶ አቲን ኢስታስ ኢዚ ዮቲዳይሲ ጌሊቤና።

⁵¹ ሄፕ ሲሚን ኢስታራ ኢሲፌ ናዚሬቴ ዎዲዲ ኢስታስ አዛዜቲሼ ዴዲዴስ። ኢዛ አያ ማራማካ ሄ ሃኒዳ ሚሻ ወርሳ ባ ዎዝናን ናጋሼ ጋምዓዱስ። ⁵² ዩሱሲ አዶ ኤራቴላን፣ ጌሳኒኔ ሳባን የሳ ሲንሳኒኔ አሳ ሲንሳን ዲጩዴስ። *

3

ፃማቂዛ ዮሃኒሳ ቲሚርቴ

(ማቶ 3:1-12፤ ማር 1:1-8፤ ዮሃ 1:19-28)

¹ ጊቤራዶሴ ጌቲቲዛይስ ቁሳሬይ ካዎቲዳ ታማኔ ኢቻሻንሶ ላይላን ጳንዖሳ ጳላዖሳ ጊዛይሲ ዮሁዳ ቢታ ሃሪዛ ዎዴ፣ ሄርዶሲ

* 2:39 ማቶ 2:23 * 2:41 ኬሳ 12:1-27፤ ዛሬ 16:1-8 * 2:52 1ሳሜ 2:26፤ ሌዎ 3:4

ጋሊላ ቢታ ሃሪዛ ዎዴ፤ ኢዛ ኢሻይ ፒሊጶሲ፤ ኢፁሪያሳኔ ጊራኮንዶሴ ቢታ ሃሪዛ ዎዴ፤ ሊሳኖሲካ አብሎኔ ቢታ ሃሪዛ ዎዴ፤

2 ሃናይኔ ቃያፋይ ቁሴታ ሃላቃ ጊዲዳ ዎዴ ሶሳ ቃላይ ባዘ ቢታን ዲዛ ዛካራሳ ና ዮሃንሳኮ ዩዴስ።

3 ዮሃንሲ ዮርዳኖሴ ሻፋ አቻን ዲዛ ዴሬታ “ኢንቴ ናጋራ አቶ ጋናስ ናጋራፔ ሲሚዲ ሃማቁቲቴ” ጊዲ ዮቲዴስ 4 ሄሲካ ቃሴ ናቤ ኢሳያሲ

“ባዘን ሂዝጊዲ ዋሲዛ አሳ ኮሺንቺ

ጎዳስ ኦጌ ጊጊሲቴ ባሲዲካ ሎዔሲቴ።

5 ሾባ ቢታይ ዉሪ ኩማና፤

ዙማቲኔ ዙምቡላቲ ዉሪ ዚቂ ጋና፤

ጌላ ኦጌይ ሲቲ ጋና፤

ሞሬቲዳ ኦጌይ ሎዎ ጊዳና።

6 አሳ ዜሬስ ኡባ አሺዛ ሶሳ ዎልቃ ቤያና።

ጊዲ ባዘን ዋሲዛ አሳ ቃላ ጊሪስ”

ጊዲ ባ ማፃፋን ገሬዳ ማላ።

7 ዮሃንሲካ ኢዛ ኩሼን ሃማቁታና ዩዛ አሳስ “ኢንቴኖ ሃ ሾሻ ናይቶ! ያና ዲዛ ሶሳ ሃንቆሬ ሃካና ማላ ኦኒ ኢንቴና ዞሪዴ? *

8 ኢንቴ ናጋራ አሶፔ ሲሚዳይሳ ኤሪሲዛ አሶ አሲቴ ናኑ አዋይ አብራሃሜይ ኑስ ዴስ” ጉስ አጊቴ ጊዴስ። “የሲ ባስ ጊኮ ሃ ሹቻታፔ አብራሃሜስ ና አሲ ዴንሳናስ ዳንዳዲይሳ ኤሪቴ” *

9 ካልታይ ሚሳ ቃንፃናስ ሚሳ ገጶን ዴስ። ሎዎ አይሬ አይፎንታ ኢታ ሚሲ ዉሪ ቃንፃቲዲ ታማን ዩጌታና” ጊዴስ። *

10 አሳይካ “ሂስቲን አይ አሶኒ?” ጊዲ አይቺዴስ።

11 ዮሃንሲካ አሳስ “ናምዑ ማይዎይ ዲዛይ ኢሲ ማይዎይ ባይንዳ አሳስ ኢሞ፤ ቃሴካ ቁማይ ዲዛይካ ባይንዳዴስ ሻኪዲ ኢሞ” ጊዴስ።

12 ቃራፃ ሺሺዛይቲካ ሃማቁታናስ ዩዲ “አስታማሬ! ኑ አይ አሲኖ?” ጊዳ። *

13 ኢዚካ “ኢንቴ አዛዜቲዳይሳፌ ቦላራ ቃራፃ ሺሾፒቴ” ጊዴስ።

14 ዎታዳራቲካ “ኑኒ ቃሴ አይ አሲኖ?” ጊዲ አይቺዳ። ኢዚካ “አና ሚሼካ ጊዲን ዎልቃን ኤኮፍቴ፤ ቃሴካ አናኔ ዎርዶን ሞቶፒቴ፤ ኢንቴ ዳሞዛይ ኢንቴስ ጊዳና” ጊዴስ።

15 አሳይ ዮሃንሳ ቤዩዲ “ሃይሲ ኪርስቶሴ?” ጊዲ ባ ዎዝናን ሲዲዴስ። 16 ዮሃንሲካ ኡባስ “ታኒ ኢንቴና ሃሳን ሃማቃይስ፤ ጊዶ አቲን ታ ኢዛ ጫማ ቢርሻናስ ቤሶንታ ታፔ አዲዛይይ

* 3:7 ማቶ 12:34፤ 23:33 * 3:8 ዮሃ 8:33 * 3:9 ማቶ 7:19 * 3:12 ሉቃ 7:29

ያና። ኢዚ ኢንቴና ዒሎ አያናኒኔ ታማን ማግቃና። 17 ባሌዛን ዲዛ ካላ ጋፌዛፔ ጌሻስ ካስ ሱራጊዛ ፒሳይ ኢዛ ኩሹን ዴስ። ባሌዛ ኩሜሳ ጌሻና፤ ጊስቴዛ ቃሴ ዲዔን ቆላና፤ ጋፌዛካ ቶፖንታ ታማን ፀጋና” ጊዴስ።

18 የሃኒሲ አሳ ሃራ ዱማ ዱማ ዞሬ ቃላራ ሚኒሴሲ ዞሪሼ ሚሺራሾ ቃላ የቲዴስ። 19 ጊዶ አቲን ጋሊላ ቢታ ሃሪዛ ሄርዶሲ ባ ኢሻ ማሾ ሄርዲያዶ ኤኪዳ ጊሺኔ ሃራ ዳር ኢታ አሲዳ ጊሽ የሃኒሲ ኢዛ ሃንቂዳ ጊሽ። 20 ካሴ ሞሮ ቦላ ሃራ ጉጂዲ ሄርዶሲ የሃኒሳ ቃሾ ኬሳን ዩጊዴስ።

ዮሱሲ ማግቂቲዴስ
(ማቶ 3:13-17፤ ማር 1:9-11)

21 አሳይ ማግቂቲዳፔ ጉዩ ዮሱሲካ ማግቂቲዴስ፤ ኢዚ ዎሲሺን ሳሎይ ዶዩቲዴስ። 22 ዒሎ አያናይካ ሃራጼ ሚሳቲዲ ኢዛ ቦላ ዎዲዴስ። “ሳሎፔ ታ ዶሲዛ ናይ ኔና፤ ኔናን ታኒ ኡፋዮታይስ” ጊዛ ቃላይ ዩዴስ። *

ዮሱሳ ዜሬሳ ዛርኬ
(ማቶ 1:1-17)

23 ዮሱሲ ዎሳ አሶ አይኪሺን ላይሳይ ኢዛስ ሄቸ ታሙ ላይሳ ማላ ጊዳና። አሳይካ ኢዚ ዮሴፌ ና፥ ኤሌ ና፥ 24 ማቴ ና፥ ሴዌ ና፥ ሚልካ ና፥ ዩሁዳ ና፥ ዮሴፌ ና፥ 25 ማቶቲዮ ና፥ አሞዔ ና፥ ናሆሜ ና፥ ኢሲሊሜ ና፥ ናጌ ና፥ 26 ማቴ ና፥ ማቶቲዮ ና፥ ሴሜዬ ና፥ ዮሴፌ ና፥ ዩሁዳ ና፥ 27 ዮናኔ ና፥ ሬሴ ና፥ ዜሩባቤሌ ና፥ ሴላቲያሌ ና፥ ኔሬ ና፥ 28 ሚልካ ና፥ ሃዴ ና፥ ዮሳ ና፥ ቆሳሜ ና፥ ኤሊሞዳሜ ና፥ ኤራ ና፥ 29 ኢያሶ ና፥ ኤሊዓዛሬ ና፥ ዮራሜ ና፥ ማቴ ና፥ ኤሌ ና፥ 30 ሲሞና ና፥ ዩሁዳ ና፥ ዮሴፌ ና፥ ዮና ና፥ ኤሊያቆሜ ና፥ 31 ሜሊያ ና፥ ማይናኔ ና፥ ማግቂ ና፥ ናታኔ ና፥ ዳጧቴ ና፥ 32 ኢሴዮ ና፥ ኢዮቤዴ ና፥ ቦዔዜ ና፥ ሶሎሞኔ ና፥ ናሶኔ ና፥ 33 አምናዳቤ ና፥ አራሜ ና፥ አርኔ ና፥ ኤስሮሜ ና፥ ፋሬሴ ና፥ ዩሁዳ ና፥ 34 ያቆቤ ና፥ ዩሳቃ ና፥ አብራሃሜ ና፥ ታራ ና፥ ናኮሬ ና፥ 35 ሴሮሄ ና፥ ራጉዌ ና፥ ፋሌቁ ና፥ አቤሬ ና፥ ሳላ ና፥ 36 ቃዩኔሜ ና፥ አርፋኪሲዴ ና፥ ሴሜ ና፥ ኖሄ ና፥ ላሜሄ ና፥ 37 ማቲሳላ ና፥ ሄኖኬ ና፥ ያሬዴ ና፥ ማላሊዔሌ ና፥ ቃዩናሜ ና፥ 38 ሄኖሴ ና ሴቴ ና አዳሜ ና፥ ዎሳ ና፥ ሚሳቲዴስ።

* 3:22 ሜዴ 22:2፤ ማዛ 2:7፤ ኢሳ 42:1፤ ማቶ 3:17፤ ማር 1:11፤ ሉቃ 9:35

4

ዮሴፊ ፓጩቲደስ

(ማቶ 4:1-11፤ ማር 1:12-13)

1 ዮሴፊ ሁሉ አያናን ኩሚዲ ዮርዳኖስ ሻፋፔ ሲሚዳ ማላ ሁሉ አያናይ ኢዛ ካሌሲዲ ባዞ ቢታ ኤፊደስ። 2 ሄንካ ሃላዔን አይዱ ታሙ ጋላስ ፓጩቲደስ። ሄ ፓጩቲዛ ጋላሳታን አይኮካ ሞንታ ጊሽ ዉርሴሳን ጋፊደስ።

3 ሃላዔይካ ዮሴፊ “ኔ ሦሳ ና ጊዲኮ አኔ ሃይሳ ሹቻ ካስ ጊዳና ማላ አዛዛ” ጊደስ።

4 ዮሴፊካ ዛሪዲ “አሲ ካሳን ሃላ ደና ጌቴቲዲ ሃፌቲደስ” ጊዲ ሃላዔስ ዛሪደስ። *

5 ሄሳፌ ካሊዲ ሃላዔይ ዮሴፊ አሲ ጵቃ ዙማ ቦላ ኬሲዲ ሳሎ ጉፋንሉን ዲዛ ካዎቴሳ ቀጲዳ አይፌይ ሄላናስ ቤሲዲኔ፤ 6 “ሃይሲ ኔ ቤዩዛ ቢታ ካዎታ ጎዳቴሳይኔ ቦንቾይ ዉሪካ ታስ ኢሜቲደስ፤ ታካ ታ ደሲዛደስ ኢማናስ ዳንዳዩዛ ጊሽ ኔስካ ኢማና።

7 “ሄሳ ጊሽ ኔኔ ኩንዳዳ ታስ ጎይኒኮ ሃይሲ ዉሪካ ኔስ ጊዳና” ጊደስ።

8 ዮሴፊካ ዛሪዲ “ኔ ጎዳ ሦሳስ ኩንዳዳ ኢዛስ ሃላ ጎይና ጌቴቲዲ ሃፌቲደስ” ጊደስ። *

9-11 ሄሳፌካ ዮሴፊ ዮሩሳላሜን ሦሳ ኬሳ ሄራ ኬሲ ኤሲዲ ሦሳ ማፃፋን “ኔና ናጋና ማላ ሦሲ ኔ ጊሽ ባ ኪታንቻ አዛዛና፤ ኔ ቶሆይ ሹቻን ጵጵቶንታ ማላ ኪታንቻቲ ባ ኩሹራ ኔና ጵቁ ሂስቲ አይካና” ጌቴቲዲ ሃፌቲዳ ጊሽ አኔ ኔ ሦሳ ና ጊዲኮ ሃይሳፌ ዱጌ ኩንዳ” ጊደስ። *

12 ዮሴፊካ “ኔ ጎዳ ሦሳ ፓጩፋ” ጌቴቲደስ ጊዲ ዛሪደስ። *

13 ሃላዔይካ ባ ፓጩናይሳ ዉርሲዳፔ ጉዩን ሃራ ባስ ኢንጂ ዎደይ ቤታናሹ ዮሴፊፔ ሻኬቲደስ።

ዮሴፊ ጋሊላን ታማርሶ አይኪደስ

(ማቶ 4:12-17፤ ማር 1:14-15)

14 ዮሴፊካ ሁሉ አያና ዎልቃን ጋሊላ ሲሚደስ። ኢዛ ጎባቴሳይ ጋሊላ አቻን ዲዛ ዴሬታን ሲዮቲደስ። 15 ኢዜካ አይሁዳታ ዎሳ ኬሳን ታማርሲሺን ኢዛ ቲሚርቴይ ሎዒን አሳይ ዉሪካ ኢዛ ጋላቲደስ።

* 4:4 ዛሬ 8:3 * 4:8 ዛሬ 6:13 * 4:9-11 ማዛ 91:11-12 * 4:12 ዛሬ 6:16

ናዚሬቴን ዮሱሳ ኢጊዳ
(ማቶ 13:53-58፤ ማር 6:1-6)

16 ሄፔ ባ ዮሴቴዳ ካታማ ናዚሬቴ ዩዲ ካሴ ሳምባታ ጋላስ አይሁዳ ዎሳ ኬሴ ጌሊዛ ማላ ጌሊዲ ዎሳ ማፃፋ ናባባናስ ዴንዲ ኤቂዴስ። 17 ናቤ ኢሳያሳ ማፃፋይ ኢዛስ ኢሜቲን ማፃፋ ዶዩዳ ማላ።

18-19 “ጎዳ አያናይ ታ ቦላ ዴስ፤
ማንቆታስ ሚሺራቾ ቃላ ዮታና ማላ ታና ቲዩዴስ፤
ቃሼቲዳይታስ ቢርሼቴሉ፤
ቆቄቲ ሄላና ኦጌ ታ አዋጃና ማላ፤

ሜቶቴቲዳይታ አሻና ማላ፤
ዶሴቲዳ ጎዳ ላይላ አዋጃ ታ ዮታና ማላ ታና ኪቲዴስ”
ጊዛ ሶ ዴሚ ናባቢዲኔ።

20 ማፃፋካ ጎርዲዲ አይሁዳ ዎሳ ኬሴ ናጊዛይሳስ ዛሪ ኢሚዲ ኡቲዴስ። አይሁዳታ ዎሳ ኬሳን ዲዛይቲ ዉሪካ ኢዛ ቲሺ አሲ ሄሊዳ። 21 ኢዚካ ኢስታስ “ሃይሲ ኢንቴ ኢንቴ ሃይሳራ ሲዩዳ ማፃፋ ቃላይ ሃቺ ፖሌቲዴስ” ጊዴስ።

22 አሳይ ዉሪካ ኢዛ ጊሽ ሎዎ ፃላላ ሃሳዬቴስ። ቃሴካ ኢዛ ዱናፔ ኬዚዛ ሎዎ ቃላፔ ዴንዲዳይሳን ማላሌቲዲ “ሃይሲ ዮሴፌ ና ጊዴኔ?” ጊዳ።

23 ኢዚካ “ዳሴ ጎዶ ኔርካ ኔና ፓላ። ቂፊርናሆሜን ኔኔ አሲሺን ኑ ሲዩዳይሳ ሃይሳን ኔ ካታማንካ አሳ ጊዛ ሌሚሶ ኢንቴ ታ ቦላ ማላታናይሳስ ሲዴይ ባዎ” ጊዲ ኢስታስ ዮቲዴስ። 24 ቃሴካ “ታ ኢንቴስ ቱማ ጋይስ ናቤይ ባ ዮሴቴዳ ዴሬን ቦንቺቲ ኤሬና። *

25-26 “ጊዶ አቲን ታ ኢንቴስ ቱማ ጋይስ ሄቩ ላይሲኔ ባጋ ጋካናስ ሳሎይ ጎርዴቲን ዎልቃማ ኮሻይ ቢታ ቦላ ሃኒዳ ኤላሳ ዎዴ ሄ ላይሳታን አዚናይ ባይንዳ ዳር ማጫሳቲ ኢስራዬሌ ቢታን ዴቴስ ሺን ኤላሳይ ኢስታፌ ኢሲኔይኮካ ኪቴቲቤና። ጊዶ አቲን ሲዶና ጌቴቲዛ ቢታን ሴራጲታ ጌቴቲዛ ካታማን ዲዛ ኢሲ አዚናይ ባይንዳ ማጫሴይኮ ኪቴቲዴስ። * 27 ናቤ ኤሊሳዔ ዎዴ ኢስራዬሌ ዴሬን ዳር ኢንቺራቻ ሃርጊዛይቲ ዴቴስ ሺን ሶሪያ ቢታ አሳ ጊዲዳ ኒዒማኔፔ አቲን ሄ ዳርታፔ አኒካ ኢንቺራቻ ሃርጌፌ ፓሂቤና” ጊዴስ። *

28 አይሁዳታ ዎሳ ኬሳን ዲዛይቲ ዉሪካ ሄሳ ሲዶዲ ዳር ሃንቄቲዳ። 29 ባ ኡቲዳሶፔ ዴንዲ ኤቂዲ ዮሱሳ ካታማፔ ካሬ ኬሲዲ ዱጌ ዛሪ ዮዳናስ ኢስታ ካታማያ አሴቲዳ ዙማ ቦላ

* 4:24 ዮሃ 4:44 * 4:25-26 1ካዎ 17:1፣8-16 * 4:27 2ካዎ 5:1-14

አፎቲዛሶን አሴቲዳሶ ኤኪ ኤፊዳ። 30 ጊዶ አቲን ኢዚ ኢስታ ጊዶራ ሻኪ ዩጊዲ አዲ ቢዴስ።

ዮሱሲ ቱና አያና ኬሲዴስ *

31 ሄፔካ ጋሊላ አወራጃን ዲዛ ቂፊርናሆሜ ጌቴቲዛ ካታማ ዎዲዴስ። ሄንካ ሳምባታ ጋላስ ዳሮ አሳ ታማርሶ አይኪዴስ።

32 ኢዚ ጎዳቴላራ ሃሳዬዛ ጊሽ ኢዛ ቲሚርቴዛን ማላሌቲዳ። *

33 አይሁዳታ ዎሳ ኬሳን ቱና አያናይ አይኪዳ አዴይ ዴስ። ኢዚካ ባ ቃላ ዶቁ ሂስቲዲ 34 “ናዚሬቴ ዮሱሳ ሃዲ ታ ዋኖ? ኔናራ ታና አዚ ጋሊዴ? ኔ ዩዳይ ኑና ዳይሳናሴ? ኔ አናኮኔ ታ ኤራይስ ኔ ያሳ ጊሎ ጊዲኪ?” ጊዲ ዋሲዴስ።

35 ዮሱሲካ ቱና አያናዛ ሃ አዴዛፔ “ጮዑ ጋዳ ኬዛ” ጊዲ ሴሪዴስ። ቱና አያናይካ ዳሮ አሳ ሲንሳን አዴዛ ቦላፊ ዩጊዲ ኢሲ ቆሆካ ጋሶንታ ዩዲዲ ኬዚዴስ።

36 አሳይ ወሪካ ማላሌቲዲ ባ ጊዶን ኢሶይ ኢሳራ “አሶ ሃይሲ አይ ጊዛ ቲሚርቴ? ጎዳቴላራኔ ዎልቃራ ኢታ አያናን አዛዜስ፤ ኢስቲካ ኬዜቴስ” ጊዲ ሃሳዬቲዴስ። 37 ዮሱሳ ጎባቴላይካ ኡባስ ጋኪዴስ።

ዮሱሲ ዳሮ ሃርጋንቻታ ፓሲዴስ

(ማቶ 8: 14-17፤ ማር 1: 29-34)

38 ሄሳፌ ጉዬ ዮሱሲ አይሁዳ ዎሳ ኬሳፌ ኬዚዲ ሲሞና ኬሴ ጌሊዴስ። ሲሞና ቦሎቴያ ዎልቃማ ሚሾ ሃርጌይ አይኪን ሳኬታዳ ዲሺን ዮሱሳ ኢዛ ፓሳርኪ” ጊዲ ዎሲዳ። 39 ዮሱሲካ ኢዚኮ ሺቂዲ ሚሾ ሃርጌዛ ሴሪዴስ። ሚሻ ሃርጌይካ ዩዲን ሄራካ ዴንዳ ኤቃዳ ኢማሳታ ሞካዱስ።

40 አዋ አርሼይ ወላና ጊሺን ዱማ ዱማ ሃርጌይ አይኪዳ አሳ ወርሲ ኢዛኮ ኤኪ ዩዳ። ኢዚካ ሃርጊዛ አሳታ ኡባ ቦላ ባ ኩሼ ዎሲዲ ፓሲዴስ። 41 ቱና አያናንቲ ቃሴካ ዮሱሳ “ኔኔ ያሳ ና” ጊሼኔ ዋሲሼ ዳሮ አሳታፔ ኬዚዳ፤ ጊዶ አቲን ኢዚ ኢስታ ሴሪዴስ፤ ቱና አያናንቲ ኢዚ ኪርስቶሳ ጊዲዳይሳ ኤሪዛ ጊሽ ኢስቲ ኢሲኖካ ሃሳያና ማላ ኮይቤና።

ዮሱሲ ቃሴካ ጋሊላን ታማርሲዴስ

42 ጋዴይ ዎንቲሺን ዮሱሲ ኢሲ አሲ ባይንዳሶ ቢዴስ። ዳሮ አሳይካ ኢዛ ኮዩሼ ኢዚ ዲዛ ሶ ጋኪዴስ። ኢዚ ኢስታፌ ሻካቲዲ ቦንታ ማላ ዲጋናስ ኮይዳ። 43 ጊዶ አቲን ኢስታስ “ጌዴ ሃራ ካታማ ባዳ ያሳ ካዎቴላ ሚሺራቾ ቃላ ዮታናስ ታስ ቤሴስ፤ ታኔ ኪቴቲዳ ጊታ ቆፋይ ሄሳኮ” ጊዴስ።

* 4:30 ማር 1:21-28 * 4:32 ማቶ 7:28-29

44 ኢዚካ ዩሁዳን አይሁዳ ዎሳ ኬላን ቃላ ጉጂ ዮቲዴስ።

5

ዮሱሲ ኮይሮ ሃዋሬታ ዌይጊዴስ
(ማቶ 4: 18-22፤ ማር 1: 16-20)

1 ዮሱሲ ጌንሴሬዌ አባ ላንቄን ኤቂዲ ዎሳ ቃላ ታማርሲሺን ሲዩዛ አሳይ ኢዛ ኡንዔሲዴስ።

2 ሄ ዎዴ ናምዑ ዎንሎቲ አባ አቻን ዲሺን ዮሱሲ ቤዩዴስ። ሞሌ አይኪዛይቲ ዎንሎታፕ ዎዲዲ ሞሌ ጊቲታ ሜጩቴስ።

3 ዮሱሲ ዎንሎታፕ ሲሞና ዎንሎን ጌሊዲ ቤታፌ ጌዴ አባ ጊዶ ሺሻና ማላ አይቺዲኔ ዎንሎ ጊዶን ኡቲዲ አሳ ታማርሲዴስ።

4 ታማርሲ ወርሲዳፕ ጉዩ ሲሞና “አባይ ጨማቲዛሶ ሺቃ ሞሌ አይካናስ ኢንቴ ጊቲዛ አባ ጊዶ ዩጊቲ” ጊዴስ።

5 ሲሞናይ ዮሱሳስ ዛሪዲ “ጎዶ! ቃማ ኩሜስ ዳቡሪ አቂዲ ኢሲኖካ አይኪቦኮ፤ ጊዶ አቲን ኔ ቃላን ጊቲዛ ዩጋና” ጊዴስ።

* 6 ዩጊዳ ዎዴ ዳር ሞሌ አይኪዳ። ጊቲይካ ዳኬቲዴስ። * 7 ሃራ ዎንሎን ዲዛይቲ ዩዲ ኢስታ ማዳና ማላ ኩሺራ ወቲ ዌይጊዳ። ኢስቲካ ዩዲ ናምዑ ዎንሎታ ሞሌ ኩንሲዳ። ዎንሎቲካ ዱጌ ሚቴቴስ አይኪዳ።

8 ሲሞና ጌቲቲዛ ጳፅሮሲ ሄሳ ቤዩዲ ዮሱሳ ቶሆ ቦላ ኩንዲዲ “ጎዶ! ታ ናጋራንቻ ጊዲዳ ጊሽ ታ አቻፌ ኪቻ” ጊዴስ።

9 ኢዚ ሄሳ ጊዳይ ኢዚኔ ኢዛራ ዲዛይቲ አይኪዳ ዳር ሞሌዛን ማላሌቲዳ ጊሻሳ። 10 ቃሴካ ሲሞና ላጌቲ ዛቢዶሳ ናይቲ ያቆቤይኔ ዮሃኒሲካ ወሪ ማላሌቲዳ። ዮሱሲካ ሲሞና “ባቦፋ! ሃይሳፌ ጉዩ ኔ አስ አይኪዛዴ ጊዳና” ጊዴስ።

11 ኢስቲካ ዎንሎታ ቤታኮ ሺሺዲ ወርሲካ ዩጊ አጊዲ ዮሱሳ ካሊዳ።

ዮሱሲ ኢንቺራቻ አይኬቲዳ አዴዛ ፓሲዴስ

12 ዮሱሲ ካታማታፕ ኢሲኔዩን ዲሺን ኢንቺራቻ ሃርጌይ ቦላ ወርሲ አይኪዳ ኢሲ አሲ ሄ ካታማን ዴስ። ሄ አዴዚካ ዮሱሳ ቤዩዲ ኢዛ ሲንሳን ኩንዲዲ “ጎዶ! ኔ ኮይኮ ታና ፓላና ዳንዳያሳ” ጊዲ ዎሲዴስ።

13 ዮሱሲ ባ ኩሹ ዩዲ ቦቺዲ “ታ ዶሳዲስ፣ ፓዓ” ጊዴስ። ኢንቺራንቻይ ሄራካ ዳዩዴስ። 14 ዮሱሲ ኢዛስ “ሃይሳ አናስካ ዮቶፓ፤ ጊዶ አቲን ባዳ ኔና ቁሴ ሃላቃስ ቤሳ፤ ኢስታስ ማርካ

* 5:5 ዮሃ 21:3 * 5:6 ዮሃ 21:6

ጊዳና ማላ ኔ ጌዬዳይሳስ ሙሴይ አዛዚዳ ያርሾዛ ሺሻ” ጊዲ አዛዚዴስ። *

15 ጊዶ አቲን ኢዛ ጊሽ አሳይ ሃሳዬዛ ዎሬይ ካሴፔ አኪ አኪ ቢዴስ። ከሂ ዳሮ አሳይ ኢዛ ሃሳያ ሲያናሲኔ ባና ሳኪዛ ሃርጌፌ ፓፃናስ ኢዛኮ ሺቋዴስ። 16 ዮሱሲ ዳሮ ዎዴ አሲ ባይንዳሶ ቢዲ ዎሲዴስ።

ዮሱሲ ሲላ አዴዛ ፓሲዴስ
(ማቶ 9:1-8፤ ማር 2:1-12)

17 ዮሱሲ ታማርሲሺን አሳይ ጋሊላፔኔ ዮሁዳፔ ቃሴካ ዮሩሳላሚፔ ዬዳ ፋርሳዌቲኔ ዎጋ ታማርሲዛይቲ ሄን ኡቲዳ። ኢዚ ፓሳና ማላ ጎዳ ዎልቃይ ኢዛራ ዴስ። 18 ሄ ዎዴ አሳይ ኢሲ ኩሜሳ ቦላይ ሲሊዲ ቃያንታ ሃርጋንቻ ሃላራ ቶኪ ኤኪ ዬዲ ከሴ ጌልሲዲ ዮሱሳ ሲንሳን ዎሳናስ ፓጪዳ። 19 አሳ ዳሮቴሳፌ ዴንዲዳይሳኒ ከሴ ጌልሳናስ ዶኔቲዳ ጊሽ ፑዴ ከሳ ካራ ቦላ ከዚዲኔ ካራ ቃሪዲ ሃርጋንቻ ሃላራ ቶኪ ኤሂዲ አሳ ጊዶራ ዮሱሳ ሲንሳን ዎሲዳ። 20 ዮሱሲ ኢስታ አማኖ ቤዬዲ “ሃይሶ ኔኒ ኔ ናጋራፔ ማሬታዳሳ” ጊዴስ።

21 ሙሴ ዎጋ ፃፊዛይቲኔ ፋርሳዌቲ “ሃይሲ ዶሳ ቦላ ፃላቴሳን ሃይሳሶ ሃሳዬዛይ ኢዚ ኦኔ? ኢሲ ዶሳፌ አቲን ናጋራ ማራናስ ኦኒ ዳንዳዬዜ?” ጊዲ ቆፒዳ።

22 ዮሱሲ ኢስታ ቆፋ ኤሪዳ ጊሽ “ኢንቴ ኢንቴ ዎዝናን አይስ ሄሳሶ ቆፔቲ? 23 ‘ኔኒ ናጋራፔ ማሬታዳሳ’ ጉሳፌኔ ‘ዴንዳዳ ባ’ ጉሳፌ አዎይሲ ካዉሹ? 24 ጊዶ አቲን ታ ሃይሳ ጊዳይ አሳ ናስ ቢታ ቦላ አሳ ናጋራፔ ማራናስ ጎዳቴሲ ዲዛይሳ ኢንቴ ኤራና ማላ” ጊዴስ። ቃሴካ ሄ ሲላ አዴዛ “ኔና ጋይስ! ዴንዳ ኤቃ! ኔ ሃላ ቶካዳ ባ!” ጊዴስ።

25 ኢዚ ሄራካ ኢስታ ሲንሳን ዴንዲ ኤቋዴስ። ካሴ ባ ኢቺዳ ሃላ ቶኪዲ ዶሳ ጋላቲሽ ባሶ ቢዴስ። 26 ሄ ዎዴ አሲ ዉሪ ማላሌቲዴስ። ዶሳ ጋላቲሽ “ሃች ማላሊሲዛዝ ቤይዶስ” ጊዲ ዳሮ ባቢዳ።

ዮሱሲ ማቶሳ ጌቴቲዛ ሌዌ ሄይጊዴስ
(ማቶ 9:9-13፤ ማር 2:13-17)

27 ሄሳፌ ጉዬ ዮሱሲ ሄፔ ከዚ ቢዴስ። ሌዌ ጊዛ ኢሲ ቃራፃ ቃንፂሲዛይሲ ቃራፃ ቃንፂዛሶን ኡቲዳይሳ ቤዬዲ “ታና ካላ” ጊዴስ። 28 ኢዚካ ዉርሲ አጊዲ ኢዛ ካሊዴስ።

29 ሌዌይካ ዮሱሳሲ ባ ከሳን ጊታ ዲጊሳ ዲጊሲዴስ። ቃራፃ ቃንፂሲዛ ዳሮ አሳቲኔ ሃራ አሳቲካ ኢስታራ ኢሲፌ ማዳን

* 5:14 ሌዌ 14:1-32

ኡቲዳ። 30 ፋርሳዌቲኔ ኢስታ ዓፌቲ “ቃራፃ ቃንጊሲዛይታራኔ ናጋራንቻታራ ኢሲፌ አዛስ ሜቲ?” ጊዲ ዩሱሳ ካሊዛይታ ቦላ ዙዙሜቲዳ። *

31 ዩሱሲካ ኢስታስ “ሃርጋንቻታስ አቲን ጋፃ አሳስ አኪሜ ኮሺና። 32 ታካ ናጋራንቻታ ማሮቴሳኮ ዛራናስ ያዲስ አቲን ጊሎታ ሄይጋናስ ያቤኬ” ጊዴስ።

ያማ ጊሽ አይቼቲዳ አይሾ
(ማቶ 9:14-17፤ ማር 2:18-22)

33 ኢስቲካ ዛሪዲ “ዮሃንሳ ካሊዛይቲ ዳሮ ዎዴ ያሜቴሲኔ ዎሴቴስ። ፋርሳዌታ ካሊዛይቲካ ኢዛሶ አሴቴስ። ኔና ካሊዛይቲ ጊዲኮ ኡባ ዎዴ ሜቴሲኔ ኡዩቴስ” ጊዳ።

34 ዩሱሲካ ኢስታስ ዛሪዲ “ሚሺራይ ኢሲፌ ዲሺን ዲጊሳስ ሄይጊቲዳይታ ያሚሳናስ ቤሲዜ? 35 ጊዶ አቲን ሚሺራይ ኢስታፌ ሻኬታና ዎዴይ ያና ኢስቲ ሄ ዎዴ ያማና” ጊዴስ።

36 ኢስታስ “አራስ ማይዎፔ ቃንጊ ኤኪዲ ጋልፃ ማይዎ ቦላ ዎሴ ሲኪዛዴይ ዴና፤ ዎሴ ሲኪኮ አራሳዚ ጋልፃራ ጋንንታ ጊሽ ጋልፃዛ ዳካና። 37 ዎይኔፔ አሴቲዳ አራሳ ጫጄ ጋልፃ ሉካሞን ኩንሲዲ ዎሴዛ አሲ አኒካ ባዎ፤ ዎሴዛ ጊዲኮ ዎይኔፔ አሴቲዳ አራሳ ጫጄይ ጋልፃዛ ዳካና። ዎይኔ ጫጄዚካ ቢታን ጉካና፤ ጋልፃ ሉካሞይ ሲንሳፌ ጎዎንታዝ ጊዳና። 38 ሄሳ ጊሽ አራሳ ዎይኔ ጫጄይ አራሳ አጎሮን ጉጄታናስ ቤሴስ። 39 ሂስቲኮ ጫላ ዎይኔ ጫጄ ኡዩዳፔ ጉዩ ጫሎንታዚ ኡያና ኮዩዛይ አኒኔ ዴና ጋሶይካ ጫላይ ሎዎ ጊዛ ጊሻሳ” ጊዴስ።

6

ሳምባታ ጊሽ አይሹቲዳ አይሾ
(ማቶ 12:1-8፤ ማር 2:23-28)

1 ኢሲ ሳምባታ ጋሳስ ዩሱሲ ካሳ ጊዶራ አዲ ቢሺን ኢዛ ካሊዛይቲ ቲያ ፀጲ ኤኪዲ ባ ኩሺን ሺጊቺ ሚሺን።

* 2 ፋርሳዌታፔ ኢሲ ኢሲ አሳቲ “ሳምባታ ጋሳስ አሳናስ ቤሶንታይሳ አይሲ አሴቲ?” ጊዳ።

3 ዩሱሲካ ኢስታስ “ዳዉቴይ ኢዛራ ዲዛ አሳቲ ጋፊዳ ዎዴ ኢዚ አሴዳይሳ ናባቢኬቲ? * 4 ኢዚ ዎሳ ኬሴ ጌሊዲ ቄሴቲ ፃላ ማና ማላ አዛዜቲዳ ዱማ ኡኬሳ ባሲ ሚዲ ባናራ ዲዛይታስ ኢሚዴስ” ጊዲ ዛሪዴስ። *

* 5:30 ሉቃ 15:1-2 * 6:1 ዛሬ 23:25 * 6:3 1ሳሜ 21:1-6 * 6:4 ሌዌ 24:9

5 ቃሴካ ዮሱሲ “አሳ ናይ ሳምባታ ጎዳ” ጊዲ ኢስታስ ዮቲዴስ።

ዮሱሲ ኩሼይ ሲሊዳ አዴዛ ፓሲዴስ
(ማቶ 12:9-14፤ ማር 3:1-6)

6 ዮሱሲካ ሃራ ሳምባታ ጋላስ አይሁዳ ዎሳ ኬሴ ጌሊዲ ታማርሲሺን ኡሻቻ ኩሼይ ሲሊዳ ኢሲ አሲ ሄን ዴስ። 7 መሴ ዎጋ ታማርሲዛይቲኔ ፋርሳዌቲ ዮሱሳ ሞታናስ ጋሶ ኮይዲ አኔ ኢዚ ሳምባታ ጋላሳን አዴዛ ፓሲኮ ቤያና ጊዲ ናጊሼ ጋምዲዳ።

8 ዮሱሲካ ኢስታ ዎዝና ቆፋ ኤሪዲ ኩሼይ ሲሊዳ አዴዛ ኡባ ሲንሳን “ዴንዳ ኤቃ” ጊዴስ። አዴዚካ ዴንዲ ኤቁዴስ።

9 ዮሱሲካ ኢስታ “ታ ኢንቴና ኢሲ ሚሽ አኔ አይቻይስ፤ ሳምባታ ጋላስ አሳናስ ቤሲዛይ ሎፖ አሶዬ? ኢታ አሶ? ሼምፖ አሾ ዎይኮ ዳይሶ?” ጊዲ አይቻዴስ።

10 ቃሴካ ዮሱሲ ባ ዩሾን ዲዛ ዉርሲ ዩሺ ጌሊዳፔ ጉዬን አዴዛ “ኔ ኩሼ ፒዲሳ” ጊዴስ። አዴዚካ ዮሱሲ ጊዳ ማላ አሲዴስ። ኢዛ ኩሼይካ ፓዲዴስ።

11 ጊዶ አቲን አሳቲ ሃንቁቲዳ፤ ዮሱሳ ቦላ አይ አሳናስ ኮሺዛኮኔ ባ ጊዶን ዞሬቲዳ።

ዮሱሲ ታማኔ ናምዑ ሃዋሬታ ዶሪዴስ
(ማቶ 10:1-4፤ ማር 3:13-19)

12 ሄ ጋላሳታፔ ኢሲ ጋላስ ዮሱሲ ዎሳናስ ዙማ ቦላ ኬዚዲ ቃማ ኩሜስ ዎሳ ዎሲሼ አቁዴስ። 13 ጋዴይ ዎንቲሺን ባና ካሊዛይታ ሄይጊዲ ኢስታፌ ታማኔ ናምዳታ ዶሪዴስ። ኢስታካ “ሃዋሬታ” ጊዲ ሱንሲዴስ።

14 ኢስቲካ ጳፀርሳ ጊዲ ሱንሲዳ ሲሞናኔ ኢዛ ኢሻ ኢንዲራሳ፥ ያቆቤ፥ ዮሃንሳ፥ ፒሊጳሳ፥ ባርቴሌሞሳ፥ 15 ማቶሳ፥ ቶማሳ፥ ኢልፊዮሳ ና ያቆቤ፥ ባ ባጋስ ሚሼቲዛ ሲሞና፥ 16 ያቆቤ ና ዮሁዳኔ ዮሱሳ አሲ ኢሚዳ አስቆሮንቶ ዮሁዳ።

ዮሱሲ ዳሮ አሳ ታማርሲዴሲኔ ፓሲዴስ
(ማቶ 4:23-25)

17 ዮሱሲካ ኢስታራ ኢሲፌ ዙማ ቦላፌ ዱጌ ዎዲዲ ዴንባሶን ኤቁዴስ። ኢዛ ካሊዛይታፔ ዳሮ አሳይ ሄን ዴስ፤ ዮሁዳፔኔ ዮሩሳላሜፔ፥ ቃሴካ ሂሮሴፔኔ ሲዶና አባ አቻፌ ዬዳ ኬሂ ዳሮ አሳይካ ሄን ዴስ። 18 ኢስቲካ ዬዳይ ዮሱሲ ጊዛይሳ ሲያናሲኔ ሃርጌፌ ፓዓናሳ። ቱና አያናይካ ዋይሲዛይቲ ዉሪ ፓዲዳ። 19 ዎልቃይካ ኢዛፔ ኬዚዲ ዳሮታ ፓሲዛ ጊሽ አሳይ ዉሪ ኢዛ ቦቻናስ ዬዴስ።

አንጆኔ ዋዬ ጋሶታ

(ማቶ 5: 1-12)

20 ዩሱሲካ ባና ካሊዛይታስ “ዎሳ ካዎቴሳይ ኢንቴስ ጊዲዳ ጊሽ ኢንቴኖ ማንቆቶ! ኢንቴ አንጆቲዳይታ፤

21 ኢንቴ ጉዩፔ ካላና ጊሽ ሃዒ ጋፊዛይቶ!

ኢንቴ አንጆቲዳይታ፤ ኢንቴ ጉዩፔ ሚጫና ጊሽ ኢንቴኖ ሃዒ ዩኪዛይቶ!

ኢንቴ አንጆቲዳይታ፤

22 አሳይ ታ ጊሽ ኢንቴና ኢዲሺን ባ ጊዶፌ ቫኪሺን፣ ቦርሺኒኔ ኢንቴና ኢታ ሱንሳራ ዪይጊሺን ኢንቴ አንጆቲዳይታ፤

*

23 “ኢንቴስ ሳሎን ጊታ ዎይቶይ ዲዛ ጊሽ ሄ ዎዴ ኡፋይሳን ጉፐቴ፤ አይስ ጊኮ ኢስታ አዋቲ ናቤታ ቦላ ሄሳላ አሲዳ። *

24 ጊዶ አቲን ኢንቴኖ ዱሬቶ ኢንቴ ሃዒ ኡፋዮቲዳ ጊሽ ኢንቴና አዩ-አና!

25 ኢንቴኖ ሃዒ ካሊዳይቶ ኢንቴና አዩ አና!

ኢንቴ ጉዩፔ ጋፋና፤ ኢንቴኖ ሃዒ ሚጫዛይቶ!

ኢንቴስ አዩ አና! ኢንቴ ጉዩፔ ሚሹታናኔ ዩካና።

26 “አሲ ወሪ ኢንቴ ጊሽ ሎዎ ሃሳዩዛ ዎዴ ኢንቴንስ አዩ-አና! አይስ ጊኮ ኢስታ አዋቲ ዎርዶ ናቤታስ ሄሳ ማላ አሲዳ።

ሞርኬ ሲቆ ጊሽ

(ማቶ 5: 38-48፤ 7: 12)

27 “ጊዶ አቲን ታ ዮቲዛይሳ ሲዩዛይቶ ታኒ ኢንቴስ ዮቲዛይ ኢንቴ ሞርኬታ ሲቂቴ፤ ኢንቴና ኢዲዛይታስ ሎዎ አሲቴ፤

28 ኢንቴና ቃንጊዛይታ አንጆቴ፤ ኢንቴና ቆሂዛይታስ ዎሲቴ፤

29 ኢሲ ቫጋላን ባቂኮ፣ ናምዓንሶ ቫጋላ ጉጃ ቤሳ፤ አኒኔ ኔ ቦላራ ማይዲዳይሳ ቃሪ ኤኪኮ ጋሳራ ማይዲዳይሳካ ዲጎፋ። *

30 “ኔና ዎሲዛ ኡባስ ኢማ፤ ኔ ሚሻ ኤኪዳ አሲ ዛሪ ኢማና ማላ አይቾፋ።

31 “አሲ ኢንቴስ አላና ማላ ኢንቴ ኮዩዛይሳሶ ኢንቴካ ሃራ አሳስ አሲቴ። *

32 “ናጋራንቻቲካ ባና ሲቂዛይታ ሲቂዛ ጊሽ ኢንቴ ኢንቴና ሲቂዛይታ ፃላ ሲቂኮ ኢንቴስ አይ ዱማ አንጆይ ዲዜ? 33 ኢንቴ ኢንቴስ ሎዎ አሲዛይታስ ፃላሳ ሎዎ አሲኮ ኢንቴስ አይ ዱማ አንጆይ ዲዜ? አይሲ ጊኮ ናጋራንቻቲካ ሄሳላ አሲዛ። 34 ታልዔ

* 6:22 1ጴፅ 4: 14 * 6:23 2ታር 36: 16፤ ሃዎ 7: 52 * 6:29 ቫጋላን ጊዛይሳ ኢሲ ኢሲ ባጋ ጋሞሶ ቃላን ቂንገሌ ጌቴቴስ። * 6:31 ማቶ 7: 12

ኤኪዲ ዛራና ዳንዳዩቴስ ጊዛይታስ ፃላ ኢንቴ ታልዒኮ ኢንቴ ሃራ አይ ዱማ አንጆ ዴማኔ? አይሲ ጊኮ ናጋራንቻቲካ ኢስቲ ታልዒዳይሳ ሲሬ ዛራዲ ኤካናስ ናጋራንቻታስ ታልዔቴስ።³⁵ ጊዶ አቲን ሶሲ ባና ጋላቶንታይታሲኔ ኢታታስ ኪያ ጊዲዳ ማላ ኢንቴ ሞርኬታ ሲቂቴ፤ ሎዎ አሲቴ፤ ጉዬፔ ዛራዲ ኤካናስ ቆፖንታ ዲሼ ታልዔ ኢሚቴ፤ ሄሳንካ ኢንቴስ ኩሼ ዛሮይ ጊታ ጊዳና፤ ቃሴካ ኢንቴ ዎጋ ሶሳ ና ጊዳና።³⁶ ኢንቴ አዋይ ኪያ ጊዲዳ ማላ ኢንቴካ ኪያታ ጊዲቴ።

ሃራ አሳ ፐርዳናስ ቤሴና
(ማቶ 7: 1-5)

³⁷ “ኢንቴ ሃራታ ቦላ ፐርዶፍቴ ኢንቴ ቦላካ ፐርዶቴና፤ ኢንቴ ቦላ ፐርዳይ ዳርንታ ማላ ሃራታ ቦላ ፐርዳ ዳርሶፍቴ፤ አሳስ አቶ ጊቴ ኢንቴስካ አቶ ጊቴታና።³⁸ ኢሚቴ! ኢንቴስካ ኢሜታና፤ ኢንቴስ ኢንቴ ማኪዳ ሚሻን ሲሚዲ ማኬታና፤ ሃራፔካ ናቂ ባቂቴዲ ዩጌቲ ኩሚዲ ዎራ ጉካናሼ ሎዎ ማኪዳ ሚሻን ማኬቲዲ ኢንቴስ ኢሜታና” ጊዴስ።

³⁹ ቃሴካ ዩሱሲ ኢስታስ ሌሚሶን “ቆቆይ ቆቆ ካሌላናስ ዳንዳዩዜ? ካሌሲኮካ ናምዓቲ ኢሶይ ኢሳራ አይኬቲዲ አላን ጌሌቴኔ? * ⁴⁰ ታማሪይ ባና ታማርሲዛዴፌ አደና፤ ጊዶ አቲን ሎዔሲ ታማሪዳ አሲ ዉሪ ባ አስታማሪ ማላ ጊዴስ። *

⁴¹ “ኔ አይፌ ጊዶን ዲዛ ቱሳ ዩሎንታ ዳሼ ኔ ኢሻ አይፌ ጊዶን ዲዛ ቡራ አይስ ዩላይ? ⁴² ኔ አይፌን ዲዛ ቱሳ ቤዮንታ ኔ ኢሻ ‘ታኒ ኔ አይፌን ዲዛ ቡራ አኔ ኬሳይስ ጋናስ ዎስታ ዳንዳዩይ?’ ኔኖ ቆዴፔ ቆሞን ሃንዛይሶ ኮይርታዳ ኔ አይፌን ዲዛ ቱሳ ኬሳ፤ ሄሳፌ ጉዩ ኔ ኢሻ አይፌን ዲዛ ቡራ ኬሳናስ ሎዔሳ ዩላንዳሳ።

ሚሲ ባ አይፌን ኤሬቴስ
(ማቶ 7: 17-20፤ 12: 34-35)

⁴³ “ሎዎ ሚሲ ኢታ አይፌ አይፌና፤ ቃሴካ ኢታ ሚሲ ሎዎ አይፌ አይፌና። ⁴⁴ ሚሲ ዉሪካ ባ አይፌን አይፌን ኤሬቴስ፤ አጉንሳፌ ባሳሴ ጌቴቲዛ ሚሳ አይፌይ ማዒቴና፤ ላዴፔ ዎይኔ አይፌይ ቃንዒቴና። * ⁴⁵ ሎዎ አሲ ባ ዎዝና ኩሚዳ ሎዎ ሚሻ ኬሴስ፤ ኢታ አሲካ ባ ዎዝና ኩሚዳ ኢታ ሚሻፌ ኢታ ኬሴስ፤ አሲ ዉሪካ ባ ዎዝና ኩሚ ፓላሂዳይሳ ባ ዱናን ሃሳዩስ። *

* 6:39 ማቶ 15: 14 * 6:40 ማቶ 10:24-25፤ ዮሃ 13: 16፤ 15: 20
* 6:44 ማቶ 12:33 * 6:45 ማቶ 12: 34

**ናምዑ ቆሞ ኬሴ ኬዲዛ አሳታ
(ማቶ 7:24-27)**

46 “ታኒ ጊዛይሳ አሴኬታ ሺን አይስ ታና ኅዶ! ኅዶ!” ቤተ? 47-48 ታኮ ዩዲኔ ታ ቃላ ሲይዲ ፖሊዛይ ወሪ እና ሚሳቲዛኮኔ ታ ኢንቴና ቤሳና፤ ኬሴ ኬፃናስ ዘቂ አሲ ቦኪዲ ሹቻ ቦላን ባ ኬሳ ኬዲዳ አሳ ሚሳቲስ። ሃሮ ሃሲ ዩዲ ሄ ኬሳ ሱጊዴስ፤ ጊዶ አቲን ሚኒ ኬዲቲዳ ጊሽ ቃሳናስ ዳንዳይቤና። 49 ጊዶ አቲን ታ ቃላ ሲይዲ ፖሎንታ አሲ ባ ኬሴ ሎዔሲ ባሶንታኔ ጊዶን ሹች ዩጎንታ ኬዲዳ አሳ ሚሳቲስ፤ ሃሮይካ ኬሳ ሱጊን ኬሳይ ሄራካ ኩንዲዲ ኢታ ላሌስ ላሌቲዴስ” ጊ ዮቲዴስ።

7

**ዮሱሲ ማቶ ሃላቃዛ አሽካራ ፓሲዴስ
(ማቶ 8:13፤ ዮሃ 4:3)**

1 ዮሱሲ ሄሳ ወርሲካ ዴሬ ሲንሳን ዮቲ ወርሲዳይሳፌ ጉዩ ቂፊርናሆሜ ጊዛሶ ቢ ጌሲዴስ። 2 ሄን ቂፍርናሆሜን ማቶ ሃላቃይ ዴስ፤ ሄ አዴዛስ ኢዚ ሲቂዛ አሽካራይ ሃርጊዲ ሃይቆስ ሹምፖ ቦላ ዴስ። 3 ኢዚካ ዮሱሳ ጊሽ ሲይዲ “ባ አሽካራ ፓሳና ማላ ዮሱሳ ዎሴሪኬቲ!” ጊዲ ኢሲ ኢሲ አይሁዳ ባጋ አሳታፔ ጨማታ ዮሱሳኮ ዮዲዴስ። 4 ኪቴቲዲ ቤዳ አሳቲ ዮሱሳኮ ዩዲ “ሃይሳ አዴዛ ጊሽ ኔ አሽካራዛ ፓሳና ቤሴስ። 5 አይስ ጊኮ ሃይሲ አዴዚ ኑ አሳ ዳሮ ዶሴስ፤ ኑስካ አይሁዳ ዎሳ ኬሴ ኬዲሲዳይ ኢዛ” ጊዲ ሚንሳ ዎሲዴስ።

6 ዮሱሲካ ኢስታራ ቤዴስ። ዮሱሲ አዴዛ ኬሳኮ ማቲዛ ዎዴ አዴዚ ባ ላጌታ ዮሱሳኮ ዮዲዲ “ኅዶ! ኔ ታ ኬሴ ጌላናስ ቤሴና፤ ታካ ኔና ታ ኬሴ ጌልሳናስ ቤሲዛ አሲ ጊዶንታ ጊሽ ሃ ያሹ ዳቡሮፓ። 7 ታኒ ኔ ሲንሳን ቤታናስ ቤሶንታ አሳ ጊዲዳ ጊሽ ኔኮ ባቤይኬ፤ ሄሳ ጊሽ ኔኒ ሄን ዳዳ ቃላ ፃላ ጊኮ ታ አሽካራይ ፓፃና። 8 ታስካ ታና አዛዚዛ አሲ ታፔ ቦላራ ዴስ። ታፔ ጋርሳራ ታኒ አዛዚዛ ዎታዳራቲ ዴቲስ። ኢሳ ሃያ!” ጊኮ ዮስ፤ ኢሳ ሄሳ ባ!” ጊኮ ቤስ፤ አሽካራይካ ሄሳ አሳ!” ጊኮ አዛዜቲዳይሳ አሴስ” ጊዴስ።

9 ዮሱሲካ አዴዚ ጊዳይሳ ሲይዲ አዴዛ ሃኖቴሳን ማላሌቲዴስ። ጉዩ ሲሚዲ ባና ካሊዛ ዴራስ “ታ ኢንቴስ ጊዛይ ሃይሳ ማላ ጊታ አማኖ ሃራይ አቶ ሺን ኢስራዔሌ ናይታ ጊዶንካ ዴማቤኬ” ጊዴስ።

10 ዮሱሳኮ ኪቴቲዳ አሳቲ ጉዩ ኪቲዳ ሃላቃሶ ሲሚዳ ዎዴ አሽካራያ ፓዲዳይሳ ቤዩዳ

ዮሱሲ ኢሲ አምዴይ ና ሃይቆፔ ዴንሲዴስ

11 ሄሳፌ ጉዩን ዮሱሲ ጋምዖንታ ዲሼ ናይኔ ጌቴቲዛ ካታማ ባና ካሊዛይታራኔ ዳሮ ዴሬራ ኢሲፌ ቢዴስ። 12 ኢዚ ቢዲ ካታማ ጌሊዛ ሚፃ ጋኪሺን ሄ ካታማይፔ ዳሮ አሳይ አሃ ቶኪ ኤኪዲ ኬዚ ዎዲዴስ። ሃይቆዳይስ ባ አዩይስ ኢዚ ሜፂ ኢሲኖ። አዩይስካ አዚናይ ባዎ፤ ካታማፔ ዳሮ አሳይ ኢዚራ ኢሲፌ ዴስ። 13 ጎዳይካ ኢዞ ቤዩዳ ዎዴ ኢዚስ ሚቸቲዲ “አይኮይ ባዎ፤ ዩኮፋ!” ጊዴስ።

14 ሺቂዲኔ አሃ ቶኪዳ ሃላ ቦቺን አሃ ቶኪዳይቲ ሲቲ ጊ ኤቂዳ። ዮሱሲካ “ሃይሶ ናዞ ኔና ጋይስ ዴንዳ!” ጊዴስ። 15 ሃይቂዳ ናዚካ ሱሪ ኡቲዲ ሃሳዎ አይኪዴስ። ዮሱሲካ ናዞ አዩይስ ኤፊ ኢሚዴስ።

16 አሳይ ዉሪካ ኬሂ ባቢዲ ዎሳ ጋላቲሼ “ጊታ ናቤይ ኑ ጊዶፌ ዴንዲዴስ፤ ዎሲካ ሃይሳ ዴሬዛ ዩዲ ቤይዴስ” ጊዴስ። 17 ሃይሲ ዮሱሳ ጊሽ ሃሳዩቲዛ ሎዎ ሃሳዎይ ኩሜሳ ዩሁዳኒኔ ዩሁዳ ዩሾን ዲዛ ዴሬታን ኬዚዴስ።

ፃማቂዛ ዮሃኒሳፔ ዮሱሳኮ ኪቴቲዳ አሳታ (ማቶ 11:19)

18 ፃማቂዛ ዮሃኒሳ ካሊዛይቲካ ሃይሳ ዉርሲ ዮሃኒሳስ ዮቲዳ። ዮሃኒሲካ ኢስታ ጊዶፌ ናምዓታ ጌይጊዲ፤ 19 “ኢዚ ያና ጌቴቲዲ ሃሳዩቲዛይስ ኔኔዮ? ሃራ አስ ናጊኖ? ጊ አይቸቴ” ጊዲ ጎዳኮ ዩዲዴስ።

20 ቢዳ አሳቲ ዮሱሳኮ ጋኪዲ “ፃማቂዛ ዮሃኒሲ ‘ኢዚ ያና ጌቴቲዲ ሃሳዩቲዛይሲ ኔኔዮ? ሃራ አስ ናጊኖ?’ ጊዲ ኔኮ ኑና ዩዲዴስ” ጊዳ።

21 ሄ ዎዴ ዮሱሲ ዳሮ አሳ ዋዩፔ፤ ሃርጌፌኔ ቲና አያናታፔ ፓሲዴስ። ዳሮ ቆቂታ አይፌይካ ጌሌስ። 22 ዮሃኒሲ ኪቲን ኢዛኮ ዩዳይታ “ቢዲ ኢንቴ ኢንቴ አይፌራ ቤዩዳይሳኔ ሲዩዳይሳ ዮሃኒሳስ ዮቲቴ። አይፌ ቆቂቲ ጌሌቴስ፤ ቶዎ ዎቤቲ ሱሬ ሃሙቴቴስ፤ ኢንቸራቻ ሃርጊዛይቲ ፓፂዳ፤ ቴሌቲ ሲዩዳ፤ ሃይቂዳይቲ ሃይቆፔ ዴንዲዳ፤ ማንቆታስ ሚሺራሾ ቃላይ ዮቲቴስ። * 23 ታናን ዲዲቶንታ አሲ ዉሪካ አንጄቲዳይሳ” ጊዴስ።

24 ዮሃኒሲ ኪቲዳ አሳቲ ዮሱሳ አቻፌ ቢዳይሳፌ ጉዩ ዮሱሲ ዳሮ አሳስ ዮሃኒሳ ጊሽ “ኢንቴ አይ ቤያናስ ባዞ ኬዚዴቲ? ጫርኮይ ሄኔ ሃኔ ቃሴሊዛ ሾምቦቆ ቤያናሴ? 25 አይ ቤያናስ ኬዚዴቲ? ሎዲዛ ማይዎ ማይዲዳ አስ ቤያና ኬዚዴቲ? ሎዎ

* 7:22 ኢሳ 35:5-6፤ ኢሳ 61:1

ማይያ ማይዲዲ ዋሪፀ ጊዛይቲ ኢሻሎ ዱሳ ዲዛይቲ ካዎ ኬላን ዴቲስ።²⁶ ሂስቲኮ አይ ቤያናስ ኬዚዴቲ? ናቤ ቤያናስ? ኤ ታ ኢንቴስ ቱማ ጋይስ፤ ኢንቴ ኬዚዳይ ናቤ፤ አዲዳይ ቤያናስ።²⁷ ያሳ ቃላን ኄ ባና ኦጌ ኔስ ባሲ ሎዔላና ኪቴቲዳ አስ ታ ኔፔ ሲንሳራ ዩዳና፣ ጌቴቲዲ ኢዛ ጊሽ ፃፌቲዳይስ ኢዛኮ። *

²⁸ “ታኒ ኢንቴስ ጊዛይ ማጫሳፔ ዩሌቲዳ አሳ ጊዶን ዮሃንሳፔ አዲዳይ አኒካ ዴና፤ ያሳ ካዎቴላን ጊዲኮ አሳ ኡባፌ ጉስ ጌቴቲዳ አሲ ዮሃንሳፔ አዳና” ጊ ዮቲዴስ።

²⁹ ቃራግ ቃንጊሲዛይቲካ አቶንታ ሃይሳ ዩሱሳ ቃላ ሲዩዳይቲ ወሪካ ዮሃንሳ ኩሼን ፃማቂቲዲ ያሳስ ቤሲዛ ቦንቾ ኢሚዳ። *

³⁰ ፋርሳዌቲኔ ሙሴ ዎጋ ኤራንቻቲ ዮሃንሳ ኩሼን ፃማቂቶንታ ጊሽ ያሲ ኢስታስ ዋና ቆፋ አሲዲ ሺሺዳይሳ ሂራይሲዳ።

³¹ ቃሴካ ዩሱሲ ዛሪዲ “ሂስቲኮ ሃዲ ዩሌታ አዛን ሌሚሶ? ኢስቲ አይ ሚሳቲዞ? ³² ጊያን ኡቲዲ ባ ጊዶን ኢሶይ ኢሳራ ዌይጌቲዲ ‘ኢንቴስ ኑኒ ዲስ ዲዲዶስ ሺን ዱሪቤኬታ፤ ዚሳሊስ ዚሳሊዶስ ሺን ዩኪቤኬታ፤ ጊዛ ናይታ ሚሳቴቲስ’ ጊዴስ።

³³ አይስ ጊኮ ፃማቂዛ ዮሃንሲ ካስ ሞንታኔ ዎይኔፔ አሴቲዳ ጫጄ ኡቶንታ ዩን ‘ዳይዳንሲ ኢዛ ቦላ ዴስ’ ጊዴታ። ³⁴ አሳ ናይ ቃሴ ሚሼኔ ኡዩሼ ዩን ‘ጋንጃማኔ ኡሻንቻ፤ ቃራግ ሺሺዛይታራኔ ናጋራንቻታራ ላጌቲስ’ ጊዴታ። ³⁵ ሂሳ ጊሽ ኤራቴላ ቱማቴላይ ኢዚ ናይታ ኡባታ አቻን አማኔቲዴስ” ጊዴስ።

ኢሲ ማጫሳያ ዩሱሳ ቶሆ ሺቶ ቲያዱስ

³⁶ ሂሳፌ ጉዩ ፋርሳዌታፔ ኢሲ አሲ ዩሱሳ ቂማ ማናስ ባ ኬሴ ዌይጊን ዩሱሲ ዌይጊዳ ፋርሳዌ ኬላ ቢዲ ኡቲዴስ። ³⁷ ሂ ካታማን ዲዛ ኢሲ ናጋራንቻ ማጫስ ዲዛራ ዩሱሲ ፋርሳዌ ኬላን ቂማ ማዳ ቦላን ዲዛይሳ ሲያዳ ኢሲ አልባስጊሮሴ ቢልቃዌ ሺቶ ኤካ ያዱስ። ³⁸ ያዳኔ ዩሱሳፔ ጉዩራ ኢዛ ቶሆ አቻን ኤቃዳ ዩካሼኔ ባ አፋንሳን ኢዛ ቶሆ ጫጂሳዳ ባ ሁዔ ቢናናራ ቁጫሼኔ ዩራሼ ሺቶ ቲያዱስ። ³⁹ ዩሱሳ ቂማስ ዌይሲዳ ፋርሳዌይካ ሂሳ ቤዩዲ “ሃይሲ አዴዚ ናቤ ጊዲዳኮ ሃና ኢዛ ቦቼዳ ማጫሳያ ኢዛ አናኮኔ አይ አሲዛ አሳኮኔ ኤራናኮ ሺን፤ ኢዛ ናጋራንቻኮ ሺን” ጊዲ ባ ዎዝናን ቆፒዴስ።

⁴⁰ ዩሱሲ “ሲሞና! ኔስ ታ ዮታናዚ ዴስ” ጊዴስ። ሲሞናይካ “አስታማሬ! ኤሮ ዮታ” ጊዴስ።

⁴¹ ዩሱሲ ዛሪዲ “ኢሲ ሚሼ ታልዔ ኢሚዛዴፌ ታልዔ ኤኪዳ ናምዑ አሳቲ ዴቲስ፤ ኢስታፌ ኢሳ ቦላ ኢቻሹ ዌት ዲናሬይ

* 7:27 ሚላ 3:1 * 7:29 ማቶ 21:32፤ ሉቃ 3:12

ዴስ፤ ናምዓንጸዛ ቦላ ኢቻሹ ታሙ ዲናሪይ ዴስ። * 42 ኢስታስ ቃንጊዛ ሚሺ ዳዩን ታልዔ ኢሚዳይሲ ናምዓታ ኣጮዛ ዉርሲካ ማሪዴስ። ሂስቲኮ ሃ ናምዓታፕ ሃ ታልዔ ኢሚዳይሳ ዳርሲ ዶሳናይ ኣዋይሴ?” ጊዴስ።

43 ሲሞናይካ ዛሪዲ “ዳሮ ኣጮይ ማሬቲዳይሳ ጋዳ ቆፓይስ” ጊዴስ። ዩሱሲካ “ቱሙ ፐርዳዳሳ” ጊዴስ።

44 ሄ ማጫሳይኮ ዩዩዲ ሲሞና “ሃኖ ማጫሳዮ ጻላይ? ታ ኔ ኬሴ ጌሊን ኔ ታ ቶሆስ ሃሴ ሺሻቤካ፤ ኢዛ ጊዲኮ ታ ቶሆ ባ ኣፉንሳን ጫጲሳዳ ባ ሁዔ ቢናናራ ቁጫዱስ። 45 ኔኔ ኡባካ ታና ዩራቤካ፤ ኢዛ ግዲኮ ታ ጌሎሶፕ ኣይካዳ ታ ቶሆ ዩሮ ኣጋቤኩ።

46 ኔ ታ ሁዔ ዛይቴ ቲያቤካ ሺን ኢዛ ጊዲኮ ታ ቶሆ ሺቶ ቲያዱስ።

47 “ሄሳ ጊሽ ታ ኔና ጊዛይ ኢዛ ታና ኬሃ ዶሲዳ ጊሽ ኢዛ ባ ዳሮ ናጋራፕ ማሬታዱስ፤ ጉሳራ ማሬቲዛ ኣሳ ሲቆይካ ጉሳ” ጊዴስ።

48 ዩሱሲ ማጫሳዮ “ኔ ናጋራፕ ማሬታዳሳ” ጊዴስ።

49 ኢዛራ ኢሲፌ ማዳን ኡቲዳ ኢማሳቲካ “ሃይሲ ናጋራ ማሪዛይ ኢዚ ኣኔ?” ጊዲ ባ ዎዝናራ ቆፐዳ። 50 ዩሱሲካ ማጫሳዮ “ኔና ኔ ኣማኖይ ኣሺዴስ፤ ሳሮን ባ!” ጊዴስ።

8

ዩሱሳ ካሊዳይታኔ ኢዛስ ኣሲዳ ማጫሳታ

1 ሄሳፌ ጉዩ ዩሱሲ ዎሳ ካዎቴሳ ሚሺራቾ ሳባኪሹ ዱማ ዱማ ካታማታ ጊዶራኔ ጉታታ ጊዶራ ኣዲዴስ። ኣዲዲ ቢዛ ዎዴ ኢዛ ካሊዛ ታማኔ ናምዓቲ ኢዛራ ዴቴስ። 2 ቃሴካ ቱና ኣያናፕኔ ኢታ ሃርጌፌ ፓጊዳ ኢሲ ኢሲ ማጫሳቲ ኢዛራ ዴቴስ። ኢስቲካ ሳፑን ቱና ኣያናይ ኢዚፕ ኬዚዳ ማግዳሴ ጌቴቲዛ ዴሬፕ ዩዳ ማራሞ፥ 3 ካዎ ሄርዶሳሶን ኦሲዛ ኩዛ ማቾ ዮሃኖ ቃሴካ ሶሲኖኔ ሃራ ዳሮ ማጫሳቲ ዴቴስ። ኢስቲካ ባስ ዲዛ ሚሻራ ዩሱሳስ ኣሲዛይታ።

ካስ ዜሪዛዴ ሌሚሶ

(ማቶ 13:1-9፤ ማር 4:1-9)

4 ዳሮ ዴሬይ ኢሲፌ ሺቁዲ ዲሺን ቃሴካ ኣሳይ ዱማ ዱማ ካታማፕ ኢዛኮ ዎዲዛ ዎዴ ዩሱሲ ሌሚሶራ ታማርሲሹ።

5 “ኢሲ ጎሻንቻይ ዜሬሲ ዜራናስ ኬዚዴስ፤ ኢዚ ዜሪሺን ባጋይ ኦጌን ዎዲዲ ኣሳ ቶሆን ዩዲቲዴስ፤ ሳሎ ካፎቲካ ዩዲ ማሊ ሚዳ፤ 6 ኢሲ ዜሬሳይ ሹቻ ጋዴን ዎዲዲ ሄራካ ጫሪዴስ፤

* 7:41 ዲናሪይ ሄ ዎዴ ኢሲ ኣሳንቻስ ኢሲ ጋላሳ ዳሞዛ።

ጋዴዚካ ማላ ጋዴ ጊዲዳ ጊሽ ኤሌ ሜሊቸዴስ።⁷ ቃሴካ ሃራ ዜሬሲ አጉንሳ ጊዶን ዎዲዴስ፤ አጉንሳይካ ኢዛራ ኢሲፌ ዲጩዲ ጫሬቻይካ ዲጮንታ ማላ ጩሊዴስ።⁸ ቃሴካ ሃራ ዜሬሳይ ሎዎ አራዳ ጋዴን ዎዲዴስ፤ ጫሪዳ ዎዴካ ያቱ ኩሼ አይፊዴስ” ጊዴስ።

ዮሱሲ ሌሚሶን ሃሳዱዳ ጋሶ
(ማቶ 13:10-17፤ ማር 4:10-12)

ዮሱሲ ሃሳዩ ወርሲዲ ቃላ ዶቁ ሂስቲዲ “ሲዩዛ ሃይሲ ዲዛ አሲ ሲዮ!” ጊዴስ።

⁹ ዮሱሳ ካሊዛይቲ “ዜሬሳ ሌሚሶዛስ ቢርሽል ኢማ” ጊዲ አይቸን። ¹⁰ ኢዚካ ኢስታስ “ዎሳ ካዎቴሳ ፀራ ኤርይ ኢንቴስ ኢሜቲዴስ፤ ሃራታስ ጊዲኮ ሌሚሶራ ዮታይስ ቃሴካ ሃራቲ ቤዩዲ ዎዝናን ዎሶንታ ማላኔ ሲይዲ ዩሺ ቆፖንታ ማላ ሃኒዴስ።

ዮሱሲ ዜሬሳ ሌሚሶ ቢርሽዴስ
(ማቶ 13:18-23፤ ማር 4:13-20)

¹¹ “ዜሬሳ ሌሚሶይካ ሃይሳ፤ ዜሬሳ ጌቴቲዳይሲ ዎሳ ቃላ። ¹² እጌ ላንቁን ዎዲዳይሲ ቃላ ሲዩዛይታ፤ ጊዶ አቲን ኢስቲ አማኒዲ አቶንታ ማላ ዓላዔይ ዩዲ ቃላ ኢስታ ዎዝናፕ ኤኪቸዛይታ። ¹³ ሹቻ ቦላ ዎዲዳይቲካ ቃላ ሲይዲ ኡፋይሳራ ኤኪዛይታ፤ ኢስቲካ ሃሲስ አማኔቴስ አቲን ሜቶይ ኢስታ ቦላ ጋኪዛ ዎዴ ዓጳ ዮዶንታ ጊሽ ኤሌራ አማኖ ካዲዛይታ። ¹⁴ አጉንሳ ጊዶን ዎዲዳይቲ ቃላ ሲዩዛይታ፤ ሄይቲካ ሃይሳ ሃ አላሜ ቆፋኒኔ አቆታን፤ ሃይሳ ቢታ ቦላ ዱሳ ሎዔቴሳን ጩሌቲዲ ሎዔሲ አይፌ ኢሜቴና። ¹⁵ አራዳ ቢታን ዎዲዳይሲ ቃላ ሱሬኒኔ ሎዎ ዎዝናን ሲይዲ ናጊዛይታኔ ዳንዳዎን ሚኒዲ አይፌ አይፊዛይታ።

ቆንጩን ኡቲዳ ዎምፕ
(ማር 4:21-25)

¹⁶ “ፖ ፖዲሲዲ ባሳ ጊዶን ዎይኮ አርሳ ጊዶን ዎሲዛ አሲ ባዋ፤ ጊዶ አቲን ኬሴ ጌሊዛ አሳስ ፖዓና ማላ ቆንጩሶን ዎሌቴስ። * ¹⁷ ቆቴቲዲ ቆንጩ ኬዞንታይ፤ ፖዎን ኬዚዲ ኤሬቶንታ ጌማን አታና ሚሺ ዴና። *

¹⁸ “ሄሳ ጊሽ ኢንቴ ሲዩዛይሳ ናጌቲ ሲዩቴ፤ ዲዛ አሳስ ጉጂታና ባይንዳይስ ኡባፌ ኢዛስ ዲዛ ሚሳቲዛራካ ኤኬታይቻና” ጊ ዛሪዴስ። *

* 8:16 ማቶ 5:15፤ ሉቃ 11:33 * 8:17 ማቶ 10:26፤ ሉቃ 12:2
* 8:18 ማቶ 25:29፤ ሉቃ 19:26

ዮሱሳኔ ኢዛ ኢሻታ

(ማቶ 12:46-50፤ ማር 3:31-35)

19 ሄሳፌ ጉዬ ዮሱሳ ኣያኔ ኢዛ ኢሻቲ ዮሱሳኮ ዩዳ። ጊዶ ኣተን ኣሳ ዳሮቴሳፌ ዴንዲዳይሳን ኢዛኮ ሺቃናስ ዳንዳዩቤቴና።

20 ሄ ዎዴ ኣሳይ ዮሱሳስ “ኔ ኣዩያኔ ኔ ኢሻቲ ኔና ቤያናስ ኮይዲ ካሬን ኤቂዳ” ጊዲ ዮቲዳ።

21 ዮሱሲካ ዛሪዲ “ታ ኣያኔ ታ ኢሻቲ ያሳ ቃላ ሲይዲ ናጊዛይታ” ጊዴስ።

ዮሱሲ ኣባ ዳምባላዛ ሴሪዴስ

(ማቶ 8:23-27፤ ማር 4:35-41)

22 ኢሲ ጋላስ ዮሱሲ ባና ካሊዛይታራ ዎጎሎ ጊዶ ጌሊዲ “ኣባፌ ሄ ፒንህ ፒኖስ” ጊዴስ። 23 ኢስቲካ ፒኒሺን ኣባ ቦላ ዳምባላይ ዴንዲዲ ዋይሲዛ ዎዴ ዮሱሲ ዲስኪዴስ። ሃሳይካ ዎጎሎዛ ጊዶ ጌሊን ኣሳይ ዳሮ ሜቶቴቲዴስ። 24 ዮሱሳ ካሊዛይቲ ኢዛኮ ሺቂዲ “ጎዶ! ጎዶ! ኑ ዉራና ሃኖስ” ጊዲ ዮሱሳ ዲስኮፌ ዴንሲዳ።

ኢዚካ ቤጊዲ ጫርኮዛኔ ኣባ ዳምባላ ሴሪን ጫርኮይኔ ኣባ ዳምባላይ ጮው ጊዴስ። 25 ኢዚካ ባና ካሊዛይታ “ኢንቴ ኣማኖይ ኣዋ ቢዴ?” ጊዴስ። ኢስቲካ ባ ጊዶን ባቢሺኔ ማላሌቲሺ “ጫርኮኔ ሃሌ ኣዛዚዛይ፤ ኢስቲካ ኢዛስ ኣዛዘቲዛይ ኢዚ ኦኔ?” ጊዳ።

ዮሱሲ ዳይዳንሳቲ ኦይኪዳ ኣዴዛ ፓሲዴስ

(ማቶ 8:28-34፤ ማር 5:1-20)

26 ኢዛፔ ጉዬ ጋሊላፔ ሄ ፒንሳን ዲዛ ጌርጌሴኖኔ ጌቴቲዛ ዴሬ ዎጎሎፕ ፒኒዳ። 27 ዮሱሲ ዎጎሎዛፔ ጋዴን ዎዲዳ ዎዴ ዳይዳንሲ ኢዛ ቦላ ዲዛ ኢሳዴይ ካታማፔ ኬዚዲ ኢዛ ዴሚዴስ። ሄ ኣዴዚ ዳሮ ዎዴ ማይዎ ማይዎንታ ካሎ ዲዛዴኔ ኬሳን ኦቆንታ ዱፎ ባስ ኦቆሶ ኦሲዳ ኣሳ። 28 ዮሱሳ ቤዩዳ ዎዴ ዋሲሺ ዮሱሳ ሲንሳን ኩንዲዴስ፤ ቃላ ዶቁ ሂስቲዲ “ቦንቾ ያሳ ና ዮሱሳ! ታሲኔ ኔስ ኣይ ጋይቶቴሲ ዲዜ? ኔ ታና ዋይሶንታ ማላ ታ ኔና ዎሳይስ” ጊዴስ። 29 ቱና ኣያናይ ሄሳ ጋናስ ዳንዳዩዳይ ኣዴዛፔ ኬዛና ማላ ዮሱሲ ኣዛዚዳ ጊሻሳ። ቱና ኣያናዚካ ዎዴን ዎዴን ዴንዲዛ ጊሽ ኣዴዚ ሳንሳላታኒኔ ቢራታን ቶሆ ቃቺ ናጊንካ ቃሽቴዳ ሳንሳላታ ዱሴሬሲዲ ኢዛ ቦላ ዲዛ ዳይዳንሳይ ኢዛ ዱጌ ባዞ ዛሪ ኤፌስ።

30 ዮሱሲ “ኔ ሱንሲ ኦኔ?” ጊዲ ኦይቺዴስ፤ ኢዚካ ዳሮ ዳይዳንሳቲ ኢዛን ጌሊዲ ዲዛ ጊሽ ታ ሱንሲ “ሌጎኔ” ጊዴስ። 31 ዳይዳንሳቲካ ባና ዉርሴሲ ባይንዳ ጪማ ኦላን ዮጎንታ ማላ ሚንሲዲ ዎሲዳ።

32 ሄንካ ዙማ ቦላ ዳሮ ጉዳንሉ ሄሜቴስ፤ ዳይዳንሳቲ “ጉዳንሳ ወደዛን ጌሊቴ” ጊዲ አዛዛና ማላ ዎሲን ዮሱሲ “ኤሮ ጌሊቴ!” ጊደስ። 33 ዳይዳንሳቲ አደዛፎ ኬዚዲ ጉዳንሳታን ጌሊዳ። ጉዳንሳቲ አፎዛ ዱጉንሳራ ቢቻርሼ ቢዲ አባን ጌሊዲ አባን ሚቴቲዳ።

34 ሄሚዛይቲ ሃኒዳይሳ ቤዬዳ ዎዴ ቤሮቲ ቢዲ ካታማ አሳሲኔ ዴሬ አሳስ ዮቲዳ። 35 ሃንዳይሳ ቤያና ጊዲ አሳይ ባ ዲዛሰፎ ዮሱሳኮ ዮደስ። ዳይዳንሳይ ኢዛፎ ኬዚዳ አደዚካ ዎዝናይ ካሃይ ሲሚን አፋላ ማዲዲ ዮሱሳ ቶሆ ጊደን ኡቲዳይሳ ቤዬዲ ባቢዳ። 36 ዳይዳንሳን አይኬቲዳ አደዚ ፓዲሺን ቤዬዳይቲ ኢዚ ዋኒ ፓዲዳኮኔ ዴሬዛስ ዮቲዳ። 37 ጌርጌሴኖኔ ማታን ዲዛ አሳይ ኬሂ ባቢዳ ጊሽ ዮሱሳ “ሃይሳፌ ኪቻ!” ጊዲ ዎሲዳ፤ ኢዚካ ዎጎሎዛን ጌሊዲ ሲሚ ቢደስ።

38 ዳይዳንሳይ ኢዛፎ ኬዚዳ አደዚ ዮሱሳራ ኢሲፌ ዳና ማላ ዎሲደስ። 39 ጊደ አቲን ዮሱሲ ኢዛ “ኔሶ ሲማዳ ዎሲ ኔስ አሲዳ ጊታ ሚሽ ዮታ” ጊዲ ሞይዚደስ። አደዚካ ዮሱሲ ኢዛስ አሲዳ ጊታ ሚሽ ባ ካታማን ዲዛ አሳስ ኡባስ ቆንጨን ዮቲሼ ቢደስ።

ያዲሮሳ ናኔ ዮሱሳ ማይዎ ቦቺዳ ማጫሳዮ
(ማቶ 9:18-26፤ ማር 5:21-43)

40 አሳይ ወሪ ዮሱሳ ዩሳ ናጊሼ ጋምዲዳ ጊሽ ኢዚ ሲሚሺን ኡፋይሳን ሞኪ ኤኪዳ። 41 ሄ ዎዴ ኢያዲሮሳ ጌቲቲዛ አይሁዳ ዎሳ ኬሴ ሃላቃይ ዮዲ ዮሱሳ ቶሆ ቦላ ኩንዲዲ ባሶ ባና ማላ ዎሲደስ። 42 ኢዚ ሄሳሶ አይቺዳይ ኢዛስ ታማኔ ናምዑ ላይስ ኩሚዳ ኢሲ ማጫ ናይ ሳኬታዳ ሼምፖ ቦላ ዲዛ ጊሻሳ።

ኢዚ ሄ ቡሳን ዲሺን ዴሬይ ዳሪዲ ባ ጊደን ሱጌቲዲ ኢዛ ኬሂ ኡንዲሲደስ። 43 ታማኔ ናምዑ ላይስ ሱሲ ኢዚፎ ጉኪሺን ዲዛ ኢሲ ማጫሳዮ ባስ ዲዛ ሚሻ ወርሳ ዳሌ ኤሪዛ አሳታስ ኢማ ወርሲን ኢዞ ፓሳናስ ዳንዳዬዳ አሲ ኢሳዴይካ ባዎ። 44 ኢዛካ ጉዮራ ሺቃዳ ዮሱሳ አፋላ ማጫራታ ቦቻዱስ፤ ኢዚፎ ጉኪዛ ሱሳይ ሄራካ ኤቂ አጊደስ

45 ዮሱሲካ “ታና ቦቺዳይ አኔ?” ጊደስ። ወሪካ ኑኒ ቦቺቤኮ ጊ ካዲዳ ዎዴ ጳፅሮሲ ዛሪዲ “ጎዶ! አሲ ወሪ ዩዩ አዲዲ ኔና ሱጌራሲዲ ኡንዲሲስ” ጊደስ።

46 ጊደ አቲን ዮሱሲ “አሲ ታና ቦቺደስ፤ ዎልቃይ ታፎ ኬዚዳይሳ ታ ኤራይስ” ጊደስ።

47 ማጫሳዮ ኤሬቶንታ ቆቴታዳ ባናስ ዳንዳዮንታይሳ ኤራዳ ኮራሼ ያዳ ዮሱሳ ሲንሳን ኩንዳዱስ። ኢዛካ ዮሱሳ ዋና ቦቺዳኮኔ ቃሴካ ኤሌራ ዋና ፓዲዳኮ ኡባ አሳ ሲንሳን ዮታዱስ። 48 ኢዚካ “ታ ናዬ! ኔ አማኖይ ኔና ፓሲደስ፤ ሳሮን ባ!” ጊደስ።

49 ዮሴፍ ስር ማጫሳይስ ሃሳያ ቦላ ዲሺን አይሁዳ ዎሳ ከሴ ሃላቃ ኢያሲሮሳ ከላፌ ኢሲ አሲ ኢያሲሮሳስ “ኔ ናያ ሃይቃዱስ፤ ሄሳ ጊሽ ሃይሳፌ ጉዬ አስታማሬዛ ሜላ ዳቡርሶፋ!” ጊዴስ።

50 ዮሴፍ ሄሳ ሲይዲ ኢያሲሮሳ “አይኮይ ባ፤ ባቦፋ! አማና አቲን ኔ ናያ ፓፃና” ጊዴስ።

51 ዮሴፍ ኢያሲሮሳ ከሴ ጌሊዛ ዎዴ ጴጥሮሳ፣ ዮሃንሳኔ ያቆቤ ቃሴካ ናይ አዋፔኔ አዩዩፔ አቲን ሃራይ አኒካ ኢዛራ ጌላና ማላ ኮይቤና። 52 ሄ ዎዴ አሳይ ዉሪ ናይስ “ዉ ዉይ!” ጊ ዋሲ ዩኪሺን ዮሴፍ “ዩኮፍቴ ኢዛ ኢቻዱስ አቲን ሃይቃቤኩ” ጊዴስ።

53 አሳይካ ናያ ሃይቁዳይሳ ኤሪዛ ጊሽ ዮሴፍ ቦላ ሚጨዴስ።

54 ጊዶ አቲን ኢዚ ናይ ኩሼ አይኪዲ “ታ ናዩ! ዴንዳ!” ጊዴስ። 55 ናይስ ሽምፓይካ ሲሚዴስ። ሄራካ ዴንዳ ኤቃዱስ፤ ዮሴፍካ ኢዚስ ሚዛ ሚሽ ኢማና ማላ አዛዚዴስ። 56 ናዩ ዩሊዳይቲካ ማላሌቲዳ። ጊዶ አቲን ኢዚ ሃኒዳይሳ እናስካ ዮቶንታ ማላ አዛዚዴስ።

9

ዮሴፍ ሃዋሬታ ሚሺራሾ ቃላ ዮታና ማላ ኪቲዴስ
(ማቶ 10:5-15፤ ማር 6:7-13)

1 ዮሴፍካ ታማኔ ናምዑ ሃዋሬታ ኢሲፌ ዔይጊዲ ዳይዳንሳታ ከሳና ማላኔ ሃርጌፌ ፓሳና ማላ ኢስታስ ዎልቃኔ ጎዳቴስ ኢሚዴስ። 2 ቃሴካ ዎሳ ካዎቴሳ ዮታናሲኔ ሃርጊዛይታ ፓሳናስ ኢስታ ኪቲዴስ። 3 ኢስታስ “አጌ ቢሹ ጉፌ ዎይኮ፣ ቃራዒቴ ዎይኮ፣ ቁማ ዎይኮ፣ ሚሹ ዎይኮ ናምዑ ማይዎ አይኪ ባናስ ኮሹና። * 4 ኢንቴካ ሄ ካታማይፔ ከዛና ጋካናስ ኮይሮ ጌሊዳ እና ከሳንካ ጊዲን ሄን ጋምዒቴ። 5 ካታማ አሳይ ኢንቴና ሞኪ ኤኮንታ ኢዒኮ ሄ ካታማይፔ ከዚዲ ኢንቴና ሞኮንታይታስ ማርካ ጊዳና ማላ ኢንቴ ቶሆን ዲዛ ጉዱላ ፒቲዲ ከዚቴ” ጊዴስ።

6 ኢስቲካ ጎዳይ ጊዳ ማላ ከዚዲ ሚሺራሾ ቃላ ዮቲሹኔ ሃርጋንቻታ ፓሊሹ ጉታን ጉታን ዩዩዳ።

ሄርዶሲ ዮሴፍ ዎሬ ሲይዴስ
(ማቶ 14:1-12፤ ማር 6:14-29)

7-8 ሄ ዎዴ ኢሲ ኢሲ አሳቲ “ዮሃንሲ ሃይቆፔ ዴንዲዴስ” ባጋይቲ “ኤላሲ ከዚዲ ቤቲዴስ።” ቃሴ ባጋይቲ “ቤኒ ናቤታፔ ኢሶይ ሃይቆፔ ዴንዲዴስ” ጊዲ ሃሳዩቲዛ ጊሽ ዮሁዳ ቢታ ሃሪዛ ሄርዶሲ ሄሳ ሲይዲ ሃኒዛ ሚሻን ባ ዎዝናን ሜቶቴቲዴስ።

* 9:3 ሉቃ 10:4-11

9 ሄሮዶስካ “ታኒ ኢዛ ቆዴ ቃንጊዳ ገማቂዛ የሃሂሲ ሃይቂዴስ። ሂስቲን ኢዛ ጊሽ ሃይሳ ማላ ሃሳዬቲሺን ታ ሲዱዛይስ ኢዚ ኦኔ?” ጊዲ ኢዛ ባ ኦይፌሬ ቤያና ኮይዴስ።

ዮሱሲ ኢቻሹ ሺ ኦሳ ሚዚዴስ
(ማቶ 14:13-21፤ ማር 6:30-44፤ ዮሃ 6:1-14)

10 ሃዋሬቲካ ሲሚዲ ኢስቲ ኦሲዳይሳ ዉርሲ ዮሱሳስ የቲዳ። ኢዚካ ኢስታ ሃላ ባናራ ኤኪዲ ቤቴሳይዳ ጌቴቲዛ ፖቁሳን ዲዛ ካታማ ቢዴስ። 11 ጊዶ ኦቲን ዳሮ ኦሳይ ሄሳ ኤሪዲ ኢስታ ካሊዴስ። ኢዚካ ኢስታ ሞኪ ኤኪዲ ያሳ ካዎቴሳ ጊሽ የቲዴስ። ቃሴካ ሃርጌፌ ፓሳናስ ቤሲዛይታ ፓሲዴስ።

12 ጋዴይ ሌምዲሺን ታማኔ ናምዑ ሃዋሬቲ ኢዛኮ ሺቂዲ “ኑኒ ዲዛይ ባዞ ቢታን ጊዲዳ ጊሽ ኦሳይ ቢዲ ባስ ኦቃናሶኔ ሚዛ ሚሽ ኮያና ማላ ኦሳ ሞይዛ” ጊዳ።

13 ጊዶ ኦቲን ኢዚ ኢስታስ ዛሪዲ “ኢንቴ ኢስታስ ሚዛዝ ኢሚቴ” ጊዴስ። ኢስቲካ “ኑስ ኢቻሹ ኡኬሳፌኔ ናምዑ ሞሌፔ ሃራይ ባ። ሃ ኦሳስ ጊዲዛ ካስ ኮሺኮ ሻማናስ ቤሴስ” ጊዳ።

14 ዮሱሲካ ባና ካሊዛይታ “ኦሳ ኢቻሹ ታሙ፣ ኢቻሹ ታሙ ሂስቲ ሻኪ ሻኪ ኡቲሲቴ” ጊዴስ። ሄንካ ኢቻሹ ሺ ጊዲዛ ኦቲማሳይ ዴስ። 15 ዮሱሳ ካሊዛይቲካ ዮሱሲ ኦዛዚዳ ማላ ኦሳ ዉርሲ ኡቲሲዳ። 16 ዮሱሲካ ኢቻሹ ኡኬሳኔ ናምዑ ሞሌታ ኦይኪዲ ፑዴ ሳሎ ያሊዲ ያሳ ጋላቲዴስ። ኢዚካ ኡኬሳ ሜንሊዲ ኦሳ ጋሳና ማላ ባና ካሊዛይታስ ኢሚዴስ። 17 ኦሳይ ዉሪካ ሚዲ ካሊዴስ። ዮሱሳ ካሊዛይቲካ ኦሳፔ ኦቲዳ ታማኔ ናምዑ ሌማቴ ኩሜስ ማዳፌ ዴንሊዳ።

ጴጥሮሳ ኦማኖኔ ኢዛ ማርካቴስ
(ማቶ 16:13-19፤ ማር 8:27-29)

18 ኢሲ ጋላስ ዮሱሲ ባርካ ዎሲሺን ኢዛ ካሊዛይቲ ኢዛኮ ዬዳ። ኢዚካ ኢስታ “ኦሳይ ታና ኦና ጊዜ?” ጊዲ ኦይቺዴስ።

19 ኢስቲካ ኢዛስ “ኢሲ ኢሲ ኦሳይ ገማቂዛ የሃሂሳ፤ ባጋይቲ ኤላሳ፤ ሃራቲ ቃሴ ቤኒ ናቤታፔ ኢሶይ ሃይቆፔ ዴንዲዴስ ጌቴስ” ጊዳ።

20 ኢዚካ ኢስታ “ኢንቴች ታና ኦና ጌቲ?” ጊዲ ኦይቺዴስ። ጴጥሮሲካ “ኔኒ ያሳፌ ኪቴቲዳ ኪርስቶሳ” ጊዲ ዛሪዴስ። *

ዮሱሳ ካሎይ ቃንጊሲዛ ዋጋ
(ማቶ 10:38-39፤ 16:24-28፤ ማር 8:34-38፤ ሉቃ 14:25-27)

* 9:20 ዮሃ 6:68-69

21 ዮሴፊክ ኢስታ “ሃይሳ እናስካ የቶፐፕ” ጊዲ ሚንሲ የቲዲ
22 ቃሴክ “አሳ ናይ ዳሮ ዋዬ ኤካናስ ቤሴስ፤ ዴሬ ጩማታን፥
ቄሴ ሃላቃታኒኔ ሙሴ ዎጋ ፃፊዛይታን ኢዪታናኔ ኢስታ ኩሼን
ሃይቃናሲኔ ሄዳንሉ ጋላሳን ሃይቆፕ ዴንዳና” ጊዴስ።

23-24 ቃሴክ ኡባስ “ባ ሼምፖ አሻና ጊዛ አሲ ወሪ ዳይሳና
ሺን ባ ሼምፖ ታ ጊሽ ጊዲ ዳይሲዛ አሲ አሻና። ሄሳ ጊሽ ታና
ካላና ኮዬዛ አሲ ዲኮ ባና ካዶ፤ ኡባ ጋላስ ባ ማስቃሌ ቶኪዲ
ታና ካሎ። * 25 አሲ አላሜ ጎዓ ሙሴ ዴሚዲ ባ ሼምፖ ዳይሲኮ
አዛ ጎዓይ ዲዜ? 26 አኒካ ታናኒኔ ታ ቃላን ዮላቲኮ አሳ ናይ ባ
ቦንቾራ፥ አዋ ቦንቾራኔ ጌሻ ኪታንቻታ ቦንቾራ ዩዛ ዎዴ ታኒ
ኢዛን ዮላታና። 27 ታ ኢንቴስ ቱሙ ጋይስ፤ ሃይሳን ኤቂዳ አሳፕ
ሃይቃናፕ ሲንላን ያሳ ካዎቴስ ቤያና ኢሲ ኢሲ አሳቲ ዴቴስ”
ጊዴስ።

ዮሴፊ ሚዶይ ላሜቲዴስ
(ማቶ 17:1-8፤ ማር 9:2-8)

28 ዮሴፊ ሄሳ ጊዳ አሱፑን ጋላሳ ማላፕ ጉዬ ዎሳናስ ዙማ ቦላ
ኪዜዴስ። ቢሼ ባናራ ጴጥሮሳ፥ የሃኒሳኔ ያቆቤ ኤኪ ቢዴስ።

29 ኢዚ ዎሲሺን ኢዛ አይፌሶይ ላሜቲዴስ። ኢዛ ሚዳይካ
ዎልቃንሳ ማላ ያለቂዲ ቦቲዴስ። 30 ናምዑ አሳቲ ሙሴይኔ
ኤላሲ ኢዛራ ሃሳዬቲዳ 31 ኢስቲካ ቦንቾራ ቆንጩዲ ዮሩሳላሚን
ፖሌታና ዲዛ ዮሴፊ ሃይቆ ጊሽ ሃሳዔቲዳ። 32 ጴጥሮሳኔ ኢዛራ
ዲዛይታ ዴዎ ዲስኮይ አይኪዴስ። ኢስቲካ ዲስኮይ ቤጊዲ ዮሴፊ
ቦንቾኔ ናምዑ አሲ ኢዛራ ኤቂዳይታ ቤዩዳ። 33 ሄ ናምዑ አሳቲ
ዮሴፊፕ ሻኪቲ ቢሺን ጴጥሮሲ ዮሴፊ “ጎዶ! ኢሲ ዳሴ ኔስ፥
ኢሲ ዳሴ ሙሴስ፥ ኢሲ ዳሴ ኤላሳስ አሲዲ ሃን ዲዛኮ ኑስ ሎዎኮ!
ሺን” ጊዴስ። ጊዶ አቲን ጴጥሮሲ ባ ጊዛይሳ ኤርንታ ጊዴስ።

34 ኢዚ ሄሳ ሃሳዩሺን ሻራይ ዩዲ ኢስታ ጌንሲዴስ። ሻራ ጊዶ
ጌሊዲ ባቢዳ። 35 ሻራ ጊዶፊካ “ታኒ ዶሪዳ ታ ናይ ሃይሳ፤ ኢዛ
ሲዩቴ” ጊዛ ቃላይ ሴቴቲዴስ። *

36 ቃላይ ሴቴቲዳ ዎዴ ዮሴፊ ሃላ ቤቲዴስ። ዮሴፊ ካሊዛይቲካ
ሃኒዳ ሚሻ ዉርሲ ባ ዎዝናን አይኪዳ አቲን አናስካ የቲቤቴና።

ዮሴፊ ኢታ አያናይ አይኪዳ ናዛ ፓሲዴስ
(ማቶ 17:14-18፤ ማር 9:14-27)

37 ዎንቴሳ ጋላስ ኢስቲ ዙማ ቦላፌ ዎዲን ዳሮ አሳይ ዩዲ
ዮሴፊራ ጋጊዴስ። 38 ሄ ዎዴ አሳ ጊዶፌ ኢሳዴይ ቃላ ዶቁ

* 9:23-24 ማቶ 10:38-39፤ ሉቃ 14:27፤ 17:33፤ የሃ 12:25 * 9:35
ኢሳ 42:1፤ ማቶ 3:17፤ 12:18፤ ማር 1:11፤ ሉቃ 3:22

ሂስቲዲ “ታማሪሲዛይሶ! ታስ ኢሲ ናይ ፃላ ዲዛ ጊሽ ኢዛ ኔ ፃላና ማላ ታ ኔና ዎሳይስ።³⁹ ኢዛ ኢታ አያናይ አይኪሺን ሃሳዓይ ባይንዳ ዋሴስ፤ ቃኬቲሼ ዱናራ ጎፖንቶ ኬሴስ፤ ቆሆ ጋሲዳፔ ጉዬ ዳር ዋይሲዲ አጌስ።⁴⁰ ኔና ካሊዛይቲ ናዛፔ ኬሳና ማላ ኢስታ ታ ዎሳዲስ፤ ጊዶ አቲን ኬሳና ዳንዳዩቤቴና” ጊዴስ።

⁴¹ ዩሱሲካ ኢስታስ ዛሪዲ “አማኖንታ ሃ ዎዴ ዎቤ አሳቶ! ታኒ ኢንቴናራ አይዴ ጋካናስ ዳኔ? ኢንቴናካ አይዴ ጋካናስ ዳንዳያኔ? ናዛ አኔ ሃ ኤሃ!” ጊዴስ።

⁴² ናዚ ዩሺን ኢታ አያናይ ኢዛ ቦላፌ ዩጊን ቃኬቲዴስ። ዩሱሲካ ኢታ አያናዛ ሴሪዲ ናዛ ፓሲዲ ናዛ አዋስ ኢሚዴስ።

⁴³ አሳይካ ዉሪ ዎሳ ጊታቴሳን ማላሌቲዴስ።

ዩሱሲ ባ ሃይቆ ጊሽ ናምዓንሶ ዮቲዴስ
(ማቶ 17:22-23፤ ማር 9:30-32)

⁴⁴ ኢዚ አሲዳይሳን አሳይ ዉሪ ማላሌቲሺን ዩሱሲ ባና ካሊዛይታ “አሳ ናይ አሳ ኩሺን አዲዲ ኢሚታና፤ ኢንቴካ ሃ ዮዎዛ ባሎፕቲ” ጊዴስ።

⁴⁵ ጊዶ አቲን ኢዚ ጊዛይሲ ኢስታስ ጌሊቤና። አይስ ጊኮ ኢስቲ አኪኮንታ ማላ ዮዎዚ ኢስታፌ ጌሜቲዴስ፤ ዛሪዲካ አይቾንታ ማላ ባቢዳ።

ኡባፌ አዲዛይ አኔ?
(ማቶ 18:1-5፤ ማር 9:33-37)

⁴⁶ ኢዛ ካሊዛይቲ “አኒ አናፔ አዲዜ?” ጊዲ ባ ጊዶን ፓላሜቲዳ። * ⁴⁷ ዩሱሲካ ኢስታ ዎዝና ቆፋ ኤሪዲ ጉሳ ና ኤኪ ዩዲ ባ ማታን ኤሲዲ ⁴⁸ “ሃ ጉሳ ና ታ ሱንሳን ኤኪዛዴይ አኒካ ዲኮ ታና ኤኬስ፤ ታና ኤኪዛዴይካ ታና ኪቲዳይሳ ኤኬስ። ኢንቴ ኡባፌ ጉሳ አሲ ኢዚ ኡባፌ አዴስ” ጊዴስ። *

ኢንቴ ጊዛይሳ ኢዎንታይ ኢንቴ ባጋ
(ማር 9:38-40)

⁴⁹ ዮሃኒሲካ “ጎዶ! ኢሲ አሲ ኔ ሱንሳን ዳይዳንሶ ኬሲሺን ቤይዶስ። ጊዶ አቲን ኢዚ ኑናራ ካሎንታ ጊሽ ዲጋናስ ኮይዶስ” ጊዴስ።

⁵⁰ ዩሱሲካ “ኢንቴና ኢዎንታ አሲ ዉሪ ኢንቴ ባጋ ጊዲዳ ጊሽ ዲጎፍቲ” ጊዴስ።

ሳማሪያ አሳይ ዩሱሳ ሞካናስ ኮይቤቴና

* 9:46 ሉቃ 22:24 * 9:48 ማቶ 10:40፤ ሉቃ 10:16፤ ዮሃ 13:20

51 ዮሴፊ ሳሎ ቢዛ ዎዴይ ማቲያ ጊሽ ዮሩሳላሜ ባናስ ዴንዲዴስ። 52 ኢዚካ ሲንሳሲዲ አሴ ኪቲዴስ። ኢስቲካ ኮሺዛ ሚሽ ጊጊሳናፔ ካሴቲዲ ሳማሪያ ቢታን ዲዛ ኢሲ ጉታ ቢዳ። 53 ጊዶ አቲን ዴሬይ ኢዚ ዮሩሳላሜ ቢዛይሳ ኤሪዳ ጊሽ ሞኪ ኤኪቤቴና። 54 ኢዛ ካሊዛይታፔ ያቆቤይኔ ዮሃንሲ ሃንዛይሳ ቤዱዲ “ጎዶ! ኤላሲ አሶይሳሶ ‘ታማይ ሳሎፔ ዎዲዲ ኢስታ ዲፕ ሂስቶ!’ ጊዲ አዛዛና ማላ ኮያይ?” ጊዳ። **

55 ጊዶ አቲን ዮሴፊ ኢስታኮ ዩዱዲ “ኢንቴስ አይ ማላ አያናይ ዲዛኮኔ ኤሬኬቲ? አሳ ናይ ዩዳይ አሳ ሽምፖ አሻናስ አቲን ዳይሳናስ ጊዴና” ጊዲ ኢስታ ሴሪዴስ። 56 ኢስቲ ዉሪካ ሃራ ጉታ ቢዳ።

ዮሴፊ ካሊዛይታ ጋኪዛ ፓጩ
 (ማቶ 8: 19-22)

57 ኢስቲካ ቢርሺን ኢሲ አሲ ኢስታኮ ሺቂዲ “ታኒ ኔኒ ቢዛ ኡባሶ ኔና ታ ካላና” ጊዴስ።

58 ዮሴፊ “ዎርኬናታስ አቂዛ አላይ፥ ካፎታስ ቃሴ አቂዛ ካፎ ኬሲ ዴስ፤ ጊዶ አቲን አሳ ናስ ባ ሁዔ አይሲዛሶይካ ባዎ” ጊዴስ።

59 ዮሴፊካ ሂንኮይሳ “ታና ካላ” ጊዴስ። ሄ አዴዚካ “ጎዶ! ታ ካሴታ ባዳ ታ አዎ ሞጎ?” ጊዴስ።

60 ዮሴፊካ “አጋጋ፥ ሃይቂዳይቲ ሃይቂዳይታ ሞጌቶ። ኔኒ ጊዲኮ ባዳ ያሳ ካዎቴሳ አሳስ ዮታ” ጊዴስ።

61 ቃሴካ ሃራ አሲ “ጎዶ! ታ ኔና ካላና ሺን ኮይሮ ሶ ባዳ ታ ኬሳ አሳ ሳሮ ጋዳ ዮዎ?” ጊዴስ። *

62 ጊዶ አቲን ዮሴፊ “ቦራ ካሶ አይኪዲ ጎዩሼ ጉዬ ዛሪ ዪሊዛይይ አኒካ ያሳ ካዎቴሳስ ቤሴና” ጊዴስ።

10

ሚሺራቾ ቃላ ታማርሳና ማላ ዮሴፊ ባና ካሊዛ ላፑን ታማኔ ናምዓታ ኪቲዴስ

1 ሄሳፌ ጉዬ ጎዳይ ሃራ ላፑን ታማኔ ናምዑ አስ ዶሪዲ ሱንሲዴስ። ኢስታካ ናምዑ ናምዑ ሂስቲዲ ኢዚ ባና ሶሆታኔ ካታማታ ዉርሲካ ኢስቲ ካሴቲዲ ባና ማላ ኪቲዴስ። * 2 “ማፃ ጋኪዳ ካሳይ ዳሮ፤ ካሳ ማፂ ሺሺዛይቲ ጉሳታ ሄሳ ጊሽ ካሳ

* 9:54 ኢሲ ኢሲ ጌሻ ማፃፋቲ “ኤሊያሲ አሶይሳ ማላ” ጊዛ ቃላ ጉጂቴስ።
 * 9:54 2ካዎ 1:9-16 * 9:61 1ካዎ 19:20 * 10:1 ላፑን ታማኔ ናምዓታ ኢሲ ኢሲ ጌሻ ማፃፋታ ቢርሺሳስ “ላፑን ታማ” ያ ጌቴስ።

ጎዳይ ካላ ማሂዲ ሸሽዛይታ ካላይ ዲዛሶ ዩዳና ማላ ዎሲቱ። *
3 ሂሳ ጊሽ ቢቴ ዶርሳቲ ካና ሱይቴ ጊዶራ ቢዛ ማላ ታ ኢንቴና ዩዳይስ። * 4 ኮሮጆ ዎይኮ ቃራዒቴ ዎይኮ ጫማ ኤኮፍቴ፤ አጌ ቦላ አናካ ሳሮ ጎፕቴ። *

5 “ኢንቴ አና ኬሲካ ጌሊዛ ጊዲኮ ኮይሮቲዲ ‘ኬላ አሶ ሳሮ!’ ጊቴ። 6 ሄ ኬላን ሳሮ ዶሲዛ አሲ ዲኮ ኢንቴ ሳሮታይ ሄ ኬላን ሸምፓና፤ ሳሮ ዶሲዛ አሲ ዶንታ አጊኮ ኢንቴ ሳሮታይ ኢንቴስ ሲማና። 7 ኢንቴስ ማና ሸሸዳ ካስ ዉርሲ ሚሼኔ ኡዩሼ ሄ ኢንቴ ጌሊዳ ኬላን ኡቴቴ፤ አሲዛዴስ ባ ዎልቃ ዋጋ ኤካናስ አዛስ ቤሴስ። ሃ ኬላፊ ሄ ኬሴ ዩፕፕቴ። *

8 “ኢንቴ አይ ካታማካ ጋኪዛ ዎዴ አሳይ ኢንቴና ሞኪ ኤኪኮ ኢስቲ ኢንቴስ አሲዳ ቁማ ሚቴ። 9 ሄ ካታማን ዲዛ ሃርጋንቻታ ፓሲዲ ዎሳ ካዎቴሲ ኢንቴኮ ማቲዴስ ጊዲ ዮቴቴ። 10 ጊዶ አቲን ኢንቴ ቢዲ ኢሲ ካታማ ጌሊሺን ሄ ካታማ አሳይ ኢንቴና ሞኪ ኤኮንታ ኢዲኮ ሄ ካታማ አሳይ ሸቁዛ ዱቡሻ ኬዚዲ፤ 11 ኑ ቶሆ ቦላ ዲዛ ኢንቴ ካታማ ጉዱላ ኢንቴስ ማርካ ጊዳና ማላ ኑ ቶሆ ቦላፊ ፒቶስ ሸን ዎሳ ካዎቴሳይ ኢንቴኮ ማቲዳይሳ ኤሪቴ። ጊቴ። 12 ታ ኢንቴስ ዮታይስ ፐርዳ ጋላስ ሄ ካታማ ፐርዳፊ ሶዶሜ ካታማ ፐርዳይ ካዉሼ ጊዳና። *

አማናንታ ኢዲዳ ጊሽ ዋላሴቲዳ ካታማታ
(ማቶ 11:20-24)

13 “ኩራዚኔ ኔና አዩ-አና! ቤቴሳይዳ ኔና አዩ አና! ኢንቴናን አሴቲዳ ማላታቲ ዲሮሴኔኔ ሲዶናን አሴቲዳኮ ኢስቲካ ማይዎ ማይዲዲኔ ቢዲንስ ጎርፔቴዲ ሄ ዎዴ ቤኔ ማሬታናሺን። *

14 ጊዶ አቲን ፐርዳ ዎዴ ኢንቴፊ ዲሮሴሲኔ ሲዶናስ ካዉያና። 15 ሃኔ ቂፊርናሆሜ ፑዴ ሳሎ ዶቁ ዶቁ ጋዲ? ኔኔ ዱጌ ሲዎሴ ዎዳና። *

16 “ኢንቴ ጊዛይሳ ሲዩዛ አሲ ታና ሲዩስ፤ ኢንቴና ኤኮንታ አሲ ታናካ ኤኬና፤ ታና ኤኮንታይካ ታና ኪቲዳይሳ ኤኬና” ጊዴስ። *

ዩሱሲ ኪቲዳ ላፑን ታማኔ ናምዓቲ ቢዳሶፔ ሲሚዳ

* 10:2 ማቶ 9:37-38 * 10:3 ማቶ 10:16 * 10:4 ማቶ 10:7-14፤ ማር 6:8-11፤ ሉቃ 9:3-5 * 10:7 1ቆሮ 9:14፤ 1፲፱ም 5:18 * 10:12 ሜዴ 19:24-28፤ ማቶ 10:15፤ 11:24 * 10:13 ኢሳ 23:1-18፤ ሂዚ 26:1-28:26፤ ኢዩ 3:4-8፤ አሞ 1:9-10፤ ዛካ 9:2-4 * 10:15 ኢሳ 14:13-15 * 10:16 ማቶ 10:40፤ ማር 9:37፤ ሉቃ 9:48፤ ዮሃ 13:20

17 ላፑን ታማኔ ናምዓቲካ ኡፋዮቲሼ ሲሚዲ “ጎዶ! ሃራይ አቶ ሺን ዳይዳንጎቲካ ኔ ሱንጎን ኑስ ሃራቲዳ” ጊዲ ዮቲዳ።

18 ኢዚካ ኢስታስ “ግላዔይ ዎልቃንጎ ማላ ሳሎፔ ኩንዲሺን ታ ቤያዲስ።

19 “ሂስቲኮ ሸሻኔ ማሲማሶ ኢንቴ ዩዳና ማላ ሞርኬ ዎልቃ ኡባ ቦላ ኢንቴስ ጎዳቴሰ ኢማዲስ፤ ኢንቴና ቆሂዛ ኢሲ ሚሺካ ዴና። * 20 ኢንቴ ሱንጎይ ሳሎን ግፌቲዳ ጊሽ ኡፋዮቲቴ አቲን ቴና አያናቲ ኢንቴስ ሃራቲዳ ጊሽ ኡፋዮቶፍቴ” ጊዴስ።

ዮሱሲ ባ ኡፋይሳ ቆንጨሲዴስ
(ማቶ 11:25-27፤ 13:16-17)

21 ሄ ዎዴ ዮሱሲ ዒሎ አያናን ኡፋዮቲዲ “ሳሎሲኔ ሳዓስ ጎዳ ጊዲዳ አቦ ሃይሳ ዉርሳካ አዶ ኤራንቻታፔኔ ኤራንቻታፔ ቆታዳ ቆሪ ጉላ ናይታስ ኔ ቆንጨሲዳ ጊሽ ታኒ ኔና ጋላታይስ፤ ኤ፥ ታ አዎወ! ሃይሲ ኔ ሎፖ ሹኔይ ሃኒዴስ።

22 “ዉሪ ታ አዎ ማታፔ ታስ ኢሜቲዴስ፤ ቃሴካ ኢዛ ናይ አናኮኔ አዎፔ አቲን ኤሪዛይ ባዎ። አዎይ አናኮኔ ናዛፔ አቲን ዎይኮ ናዚ ኢዛስ ቆንጨሳናስ ዶሲዳዴፔ አቲን ኤሪዛዴይ ባዎ” ጊዴስ። *

23 ባና ካሊዛይታኮ ሲሚዲ ኢስታስ ዱማ “ኢንቴ ቤዩዛይሳ ቤዩዛ አይፌቲ አንጄቲዳይታ። 24 ታ ኢንቴስ ቴማ ጋይስ ዳሮ ናቤቲኔ ካዎቲ ኢንቴ ሃዒ ቤዩዛይሳ ቤያናስ ኮይዲ ቤይቤቴና፤ ኢንቴ ሃዒ ሲዩዛይሳካ ሲያናስ ኮይዲ ሲይቤቴና” ጊዴስ።

አሳስ ቃዴቲዛ ሳማሪያ አዴዛ

25 ኢሲ ጋላስ ሙሴ ዎጋ ታማርሲዛ ኢሲ አሲ ዮሱሳ ፓጫናስ ኮይዲ “ታማሪሲዛይሶ ታኒ ሜርና ዴፖ ላታናስ አይ አሶ?” ጊዲ አይቺዴስ። *

26 ዮሱሲካ ዛሪዲ “ዎጋ ማፃፋን አይ ጌቴቲ ግፌቲዴ? ኢዛፔ ኔስ ጌሊዳይ አዜ?” ጊዲ አይቺዴስ።

27 አዴዚ ዛሪዲ “ኔ ጎዳ ሶሳ ኔ ኩሜሳ ዎዝናፔ፥ ኔ ኩሜሳ ሹምፖፌ፥ ኔ ኩሜሳ ዎልቃፌኔ፥ ኔ ኩሜሳ ቆፋፔ ሲቃ፤ ኔ ላጌካ ኔ ሁዔ ማላ ሲቃ ጌስ” ጊዲ ዛሪዴስ። *

28 ዮሱሲካ “ሎፖ ዛራዳሳ። ኔኒካ ሄሳሶ አሲኮ ሜርና ዴፖ ዴማና” ጊዴስ። *

29 አዴዚ ባና ዒሊሳናስ ኮይዲ “ሂስቲን ታ ላጌይ አኔ?” ጊዲ ዮሱሳ አይቺዴስ

* 10:19 ማዛ 91:13 * 10:22 ዮሃ 3:35፤ 10:15 * 10:25 ማቶ 22:35-40፤ ማር 12:28-34 * 10:27 ዛሬ 6:5፤ ሉቁ 19:18 * 10:28 ሉቁ 18:5

30 ዮሴፍ ላይና ለገረዳ “አሲ አደዘ ዮሩሳላሜ፤ ኢየርሱሳ ወዲህ ገንጋቲ ደሚዲ ኢዛ ማይዎ ቃሪ ኤኪዳ፤ ኬሂ ቆዩሬሲዲ ሃይቆፔኔ ገፃፔ ጊዶን ዮጊ አጊዲ ቢዳ። 31 አሲ ቁሴይ ሄ አጊራ ባሲ ዱጌ ወዲህ አሙንሶንታ ሄ ቆዩቲዳ አደዛ ደሚዲ ፖቁሳራ ዮጊ አዲደስ። 32 ቃሴካ አሲ ሌዌ ባጋ አሳፔ አሲ አደዘ ሄ አጊራ አዲህ ቆዩቲዳ አደዛ ቤዱዲ ሃዲካ ፖቁዲ አዲደስ። 33 አሲ ሳማሪያ ቢታ አሲ ሄ አጊራ አዲ ቢሹ ቆዩቲዳ አደዛ ቦላ ጋኪ ወዲደስ፤ አደዛ ቤዱዲ ኬሂ ሚሹቲደስ። 34 አደዛኮ ሹቁዲኔ ማዱንሳ ዳላና ማላ ዎጋራ ሚሳ ዛይቲኔ ዎይኔ ጫጄ ማዱንሳ ቦላ ጉሲዲ ቃቺደስ፤ አደዛ ባ ሃሬ ቶጊሲዲ ኢማሲ ሹምፒዛሶ ኤሬዲ ሎዲሲ ያሊደስ። 35 ዎንቴሳ ጋላስ ኢማሲ ሹምፒዛ ኬሳ ጎዳስ ናምዑ ዲናሬ ኢሚዲኔ ሄና ሃራ ሚሻ ኬሲሲኮ ታ ሲማሹ ኔስ ኢማና፤ ኔፔ ኬሳዳ ሎዲሳ ናጋ” ጊደስ።

36 “ሂስቲኮ ሃ ሄኹ አሳታፔ ገንጋታን ቆዩቲዲ ሃይቆፔኔ ገፃፔ ጊዶን ዮጊቲዳደስ ኬሂ ማታ ላጌይ ኔስ አዋይሳ ሚሳቲዜ?” ጊደስ።

37 ሙሴ ዎጋ ታማርሲዛይሲካ “ሄሲ ኔ ሚቹቲዳይሳኔ ማዲዳይሳ!” ጊደስ። ዮሴፍ ኢዛስ “ኔካ ባዳ ኢዛይሳሳ አሳ” ጊደስ።

ዮሴፍ ማርታኔ ማራሚ ሶ ቢደስ

38 ዮሴፍ ኢዛ ካሊዛይቲ አጌ ቢሺን ዮሴፍ ኢሲ ጉታ ጌሊደስ፤ ማርታ ጌቲቲዛ ኢሲ ማጫሲያ ባሶን ዮሴፍ ሞካ ኤካዱስ። 39 ኢዚስ ማራሞ ጌቲቲዛ ኢሲ ሚቹያ ዳዉስ። ማራማካ ኢዛፔ ቃላ ሲያሹ ጎዳ ቶሆ ጋርሳን ኡታዱስ። * 40 ጊዶ አቲን ማርታይ አሶ ዳሮፔ ደንዲዳይሳን ዳቡራዳ ዮሴፍኮ ሹቃዳ “ጎዶ! ታ ሚቹያ አሶ ዉርሳ ታ ቦላ አጋዳ ኡቲሺን ኔኔ ጮዑ ጋይ? ኢዛ ታና ማዳና ማላ ኢዚስ ዮታ አቲን?” ጋዱስ።

41 ጊዶ አቲን ጎዳይ “ሃኔ ማርታኔ! ኔኔ ዳሮ ሚሻ ጊሽ ቆፋ ዳራሳ፤ ዲርባታሳ፤ ቱጋታሳ። 42 ኮሺዛይ ጊዲኮ ኢሲ ሚሽ ዓላ፤ ማራማካ ሎዎ ኤፃ ዶራዱስ፤ ሄሲካ ኢዚፔ ኤኬቴና።”

11

ዮሴፍ ዎሳ ጊሽ ታማርሲደስ (ማቶ 6:9-13፤ 7:7-11)

1 አሲ ጋላስ ዮሴፍ ኢሲሶን ዎሲደስ፤ ኢዚ ዎሳ ዉርሲሺን ኢዛ ካሊዛይታፔ ኢሶይ “ጎዶ! ዓማቂዛ ዮሃንሲ ባና ካሊዛይታ ዎሳ ታማርሲዳይሳሳ ኔካ ኑና ዎሳ ታማርሳ!” ጊደስ።

* 10:39 ዮሃ 11:1

2 ኢዚካ ኢስታስ “ዎሲሼ
 ኑ አዋዉ! ኔ ሱንሲ አንጄቶ፤
 ኔ ካዎቴሲ ሃዮ፤

3 ሃቺስ ጊዲዛ ቁማ ኑስ ኢማ፤

4 ኑና ቆሂዳይታ ኑ ማሪዛ ማላ ኑና ማራ፤
 ፓጩንካ ኑና ጌልሶፋ’ ጊ ዎሲቴ” ጊደስ።

5-6 ቃሴካ “ኢንቴፌ ኢሳዴስ ላጌይ ዲኮ ሌላ ጊደስ ሄ ላጌዛሶ ቢዲ ‘ታስ ኢሲ ኢማሲ አጌፔ ዪን ሚዛና ካስ ባይንዳ ጊሽ ሄቸ ሶሎይ ዲኮ ታስ ታልዓሪስ?’ 7 ላጌዚካ ዛሪዲ ‘ታና ዋይሶፓ፤ ካሬይካ ጎርዴቴዴስ፤ ታኒካ ናይታራ ኢቻዲስ። ሃዲ ዴንዳዳ ኢማናስ ዳንዳይኬ’ ኃንዴ? 8 ታካ ኢንቴስ ዮታይስ ላጌቴላ ጊሽ ዴንዲዲ ኢሞንታ አጊኮካ ኢዚ አይቾን ሳሴሲዳ ጊሽ ዴንዲዲ ኮዩዛይሳ ዉርሲ ኢሚዴስ።

9 “ሄሳ ጊሽ ታኒ ኢንቴስ ጊዛይ፤ ዎሲቴ ኢንቴስ ኢሜታና፤ ኮዩቴ ኢንቴ ዴሜና፤ ካሬ ቆሂቴ ኢንቴስ ዶዬታና። 10 አይስ ጊኮ ዎሲዛይ ዉሪ ኤካና፤ ኮዩዛይካ ዴሜና ካሬ ቆሂዛዴስካ ዶዬታና።

11 “ኢንቴፌ አዋ ጊዲ ኡተዲ ኢዚ ዩሊዳ ናይ ሞሌ አይቺኮ ሾሽ ኢሚዛይ ዳንዴ? 12 ዎይኮ ጳጳሌ አይቺኮ ማሲማሶ ኢሚዛይ ዳንዴ? 13 ኢንቴ ኢታታ ጊዲሼ ኢንቴ ናይታስ ሎዎ ኢሞታ ኢሞ ኤሪኮ፤ ሳሎን ዲዛ ኢንቴ አዋይ ባና ዎሲዛይታስ ዲሎ አያናን ዎስቲ ዳርሲ ኢሜኔ?” ጊደስ።

ዩሱሳኔ ቢዔሊዜቡላ

(ማቶ 12: 22-30፤ ማር 3: 20-27)

14 ኢሲ ኃላስ ዩሱሲ ሃሳይሶንታ ዱዴ ዳይዳንሕ ኬሲዴስ። ዳይዳንላዚካ ኬዚዳፔ ጉዩ ዱና ዱዴ አዴዚ ሃሳይዴስ፤ ቤዩዳ አሳቲካ ዳርሲ ማላሌቲዳ። 15 ጊዶ አቲን ኢሲ ኢሲ አሳቲ “ቢዔሊዜቡላ ጌቴቲዛ ዳይዳንላታ ሃላቃን ዳይዳንላታ ኬሴስ” ጊዳ። *

16 ኢሲ ኢሲ አሳይ ኢዛ ፓጫናስ “ሳሎፔ ማላታ ቤሳ” ጊዲ አይቺዳ። * 17 ጊዶ አቲን ዩሱሲ ኢስታ ቆፋ ኤሪዲ “ባ ጊዶን ሻኬቲዛ ካዎቴሲ ዉሪ ዳያና፤ ባ ጊዶን ሲጋይ ባይንዳ ኬሲካ ኩንዳና። 18 ኢንቴ ታና ‘ቢዔሊዜቡላን ዳይዳንላታ ኬሴስ’ ጊዲ ሃሳዬታ ሺን ዓላዔይካ ባ ጊዶን ኢሶይ ኢሳፌ ሻኬቲኮ ኢዛ ካዎቴሲ ዋኒ ሚናኔ? 19 ሂስቲኮ ታኒ ዳይዳንላታ ቢዔሊዜቡላ ኬሲኮ ኢንቴ ናይቲ አናን ኬሳንዴቶ? ሄሳ ጊሽ ኢንቴ ናይቲ ኢንቴ ቦላ ፐርዲዛይታ ጊዳና። 20 ጊዶ አቲን ታኒ ዳይዳንላታ

* 11:15 ማቶ 9:34፤ 10:25 * 11:16 ማቶ 12:38፤ 16:1፤ ማር 8:11

ከሲዛይ ያሳ ወልቃን ጋኪዴስ፤ ያሳ ካዎቴላይ ኢንቴኮ ማቲዳር ኤሪቴ።

21 “ሚኖ አሲ ሎዔሲ ጊዌቲዲ ባ ኬሴ ናጊኮ ኬሳን ዲዛ ሚሺ ሎዎን ናጊቴስ። 22 ጊዶ አቲን ኢዛፔ ሃራ ሚኖ አሲ ዩዲ ያኒኮ ኢዚ አማኔቲዳ አላ ሚሻታ ዎሲ ኤኪዲ ኢዛስ ዲዛ ሃሮዛካ ወርሲ ሃራስ ጊሻና።

23 “ታናራ ጊዶንታይ ታናራ ኤቁቴስ፤ ታናራካ ሺሾንታይይ ላሌስ፤ *

ኢታ አያናይ አጊ ቢዳሶ ሲሚ ዩስ
(ማቶ 12:43-45)

24 “ቱና አያናይ አሳፔ ከዚዳ ዎዴ ሽምፖሶ ኮዩሺ ሃሲ ባይንዳ ሚላ ሶን ዋዩቴስ፤ ሽምፖሶይ ዳይኮ ‘ታኒ ካሴ ከዚዳሶ ጉዩ ሲማና’ ጌስ። 25 ኢዛፔ ሲሚዲ ዩሺን ካሴ ኢዚ አጊ ቢዳ ከሳይ ፒቴቲዲኔ ጊጊ ኡቲዳይሳ ዴሚስ። 26 ሄሳፌ ሲሚ ቢዲ ባፔ ኢቲዛ ሃራ ላፑን ዳይዳንሳታ ባናራ ኤኪዲ ዩስ፤ ኢስቲካ ጌሊዲ ሄን ዳና፤ ሄሳዴስካ ኮይሮይሳፌ ጉዩይሲ ከሄ ኢታ ጊዳና” ጊዳ።

ቱሙ አንጆ

27 ዩሱሲ ሄሳ ሃሳዩዛ ዎዴ አሳ ጊዶፌ ኢሲ ማጫስ ዲዛራ ባ ቃላ ዶቁ አሳዳ “ኔና ቶኪዳ ቃንሳኔ ኔ ዳሚዳ ዳንሳቲ አንጄቲዳይታ” ጋዱስ።

28 ጊዶ አቲን ኢዚ “አንጄቲዳይቲ ያሳ ቃላ ሲይዲ አዛኬቲዛይታ” ጊዴስ።

ዮናሲ ማላታ ጊዴስ
(ማቶ 12:38-42፤ ማር 8:12)

29 ዳር ዴሬይ ዩሱሳኮ ሺቂዳ ዎዴ ዩሱሲ “ሃይሲ ዩሌታይ ኢታ ዩሌታ፤ ጊታ ማላታ ቤያናስ ኮዩስ። ጊዶ አቲን ዮናሳ ማላታፔ ሃራ ዱማ ማላታይ ኢሜቴና። 30 ጋሶይካ ዮናሲ ናናዌ አሳስ ማላታ ጊዲዳ ማላ አሳ ናይ ታኒ ሃ ዩሌታስ ማላታ ጊዳና። * 31 ዱጌሃ ዴሬ ማጫ ካዎያ ሶሎሞኔ ኤራቴስ ቤያናስ ቢታ ጋዋፔ ዴንዳዳ ዩዳ ጊሽ ፐርዳ ዎዴ ኢዛ ሃ ዩሌታራ ዴንዳዳ ፐርዳና፤ ሄኮ ሶሎሞኔፔ አዲዛዴይ ሃን ዴስ። * 32 ዮናሲ ሳባኪሺን ሲይዲ ናናዌ አሳይ ባ ናጋራፔ ማርቲዳ ጊሽ ሃ ዩሌታራ ኢሲፌ ዴንዲዲ ፐርዳና። ጊዶ አቲን ዮናሳፔ አዲዛይ ሃን ዴስ።

* 11:23 ማር 9:40 * 11:30 ዮሃ 3:4 * 11:31 1ካዎ 10:1-10፤ 2ታር 9:1-12

33 “ምጥ ኦይሲዲ ካሬፔ ጌሊዛ አሳስ ፖዓና ማላ ቆንጩሶን ዎሴቲስ አቲን ጌማሶን ዎሲዛ አሲ ዴና። 34 ኔ አሳቴሳስ ፖያይ ኔ አይፌ፤ ኔ አይፌይ ፓፃ ጊዲኮ ኔ ኩሜሳ አሳቴሳይ ፖፖ ጊዳና። ኔ አይፌይ ሳኩቲኮ ኔ ኩሜሳ አሳቴሳይ ዱማ ጊዳና። 35 ሄሳ ጊሽ ኔናን ዲዛ ፖፖይ ዱሞንታ ማላ ናጌታ። 36 ሂስቲኮ ኔ አሳቴሳይ ፖፖ ጊዲኮ ዱሚዳ አሳቴሲ ዴና አጊኮ ኔ ኩሜሳ አሳቴሳይ ፖፖፔ ሎዔሲ ፖሚዛ ማላ ሎሚ ቤታና” ጊዴስ።

ዮሱሲ ፋርሳዌታኔ ዎጋ ታማርሲዛይታ ዋሳሲዴስ (ማቶ 23:1-36፤ ማር 12:38-40)

37 ዮሱሲ ሃሳያ ዉርሲዳ ማላ ኢሲ ፋርሳዌይ ባናራ ቁማ ማናስ ዮሱሳ ዪይጊዴስ። 38 ዮሱሲ ቁማ ማና ኩሼ ሜጩቶንታ አጊዳይሳ ቤዱዲ ማላሌቲዳ።

39 ጎዳይ ኢዛስ “ሃሚ ኢንቴ ፋርሳዌቲ ፀዓሲኔ ኬሬስ ቦላ ባጋ ሜጪ ጌሼታ፤ ኢንቴ ጊዶ ባጋዚ ኡዜቴሳኒኔ ኢታቴሳን ኩሚዴስ። 40 ኢንቴኖ ኤያቶ! ካሬ ባጋ ሜዲዳይ ጊዶ ባጋ ሜዲቤኔ? 41 ዮፖን ጊዲኮ ጊዶን ዲዛይሳ ሙፀዋታ ኢሚቲ፤ ሄ ዎዴ ዉሪካ ኢንቴስ ጌሽ ጊዳና።

42 “ኢንቴኖ ፋርሳዌቶ! ኢንቴስ አዩ አና! አኑጋፔኔ ፃሎታፔ ቃሴካ ዱማ ዱማ ካሳፌ ታማፌ ኢሲኖ ኬሴታ፤ ጊዶ አቲን ቴማ ፒርዳኔ ያሳ ዶሳናይሳ አጊ አዴታ። ዮፖን ጊዲኮ ኢንቴ አጊ አዳናስ ቤሴና። ሃንኮይሳ አጎንታ ኢንቴ አሳና ቤሲዛይቲካ ሃይታ።

43 “ኢንቴኖ ፋርሳዌቶ! ኢንቴስ አዩ-አና! አይሁዳ ዎሳ ኬሳን ኡታናስ ቦንቾ አይዴ ኮዬታ፤ ጊያ ጊዶንካ አሳይ ኢንቴ ሲንሳን ሆካና ማላ ዶሴታ። 44 አሲ ኤሮንታ ኢዛ ቦላራ ቢዛ ቆቴቲ ዲዛ ዱፎ ኢንቴ ሚሳቲዛ ጊሽ ኢንቴና አዩ-አና!” ጊዳ።

45 ሙሴ ዎጋ ኤሪዛይታፔ ኢሶይ ዛሪዲ “አስታማሬ! ኔ ሄሳሳ ሃሳዪዛ ዎዴ ኑናካ ጫያሳ” ጊዴስ።

46 ዮሱሲካ ዛሪዲ “ኢንቴኖ ሙሴ ዎጋ ኤሪዛይቶ ኢንቴስካ አዩ-አና! አሲ ቶካናስ ዳንዳዮንታ ዴዎ ቶሆ አሳ ቶሴታ። ኢንቴ ጊዲኮ ኢንቴስ ቢራዴ ዪራኒካ ቦቼኪታ።

47 “ኢንቴ አዋቲ ዎዲዳ ናቤታ ዱፎ ኢንቴ ሎዔሲዛ ጊሽ ኢንቴስ አዩ አና። 48 ሂስቲኮ ኢንቴ ኢንቴ አዋታ አሶ ሚንሲዛ ማርካታ፤ ኢስቲ ናቤታ ዎዲዳ፤ ኢንቴካ ኢስታ ዱፎ ሎዔሴታ።

49 “ሄሳ ጊሽ ያሳ ኤራቴሳ ሂዝጋዱስ ናቤታኔ ሃዋሬታ ታ ኢስታስ ዩዳና፤ ኢስቲካ ኢስታፌ ኢሳ ኢሳ ዎዲና፤ ሃራታካ ጎዳና። 50 ሄሳ ጊሽ ሃ ዩሌታይ ቤታይ ሜዴቶሶፔ ሃሚ ጋካናስ ጉኪዳ ናቤታ ኡባ ሱሳ ጊሽ አይሼታና። 51 አቤሌ ሱሳፌ አይኪዲ

ያርሺዛሶቴኔ ያሳ ኬሳ ጊዶን ጉኪዳ ዛካራሳ ሱሳ ጋካናስ ኮዬቴስ። ሆኖ ኤ ታ ኢንቴስ ጊዛይ ሃ ዩሌታይ ሃይሳስ አይሹታና።

52 “ኢንቴኖ ዎጋ ኤሪዛይቶ! ኢንቴስ አዩ-አና! ኤራቴሳ ፔንጌ ቁልፌ ዎልቃራ ዎሲ ኤኪዲ ኢንቴስካ ጌሊቤኬታ፤ ጌላናይታካ ዲጌታ” ጊዴስ።

53 ዩሱሲ ሄፔ ኬዚዳፔ ጉዩ ሃፌቴኔ ፋርሳዌቲ ኤቁቲሼ አይሻን ሹምፖ ዲጊዳ። 54 ኢዛ ዱናፔ ኬዚዛ ቃላን ኢዛ ቃፃናስ ናጌቴዳ።

12

ዩሱሲ “ሎፖ ሚሳቲዛ ፋርሳዌታ ኢታቴሳፌ ናጌቴቴ” ጊዴስ

1 ሄ ዎዴ ዳሮ ዴሬይ ባ ጊዶን ኢሶይ ኢሳራ ዩዴታና ጋካናስ ሺቂ ኡቴዳሼ ዩሱሲ ባና ካሊዛይታ “ፋርሳዌታ ኢርሾፌ ናጌቴቴ፤ ሄሲካ ቆዴፔ ቆሞ ሃኖ። * 2 ቆንጮንታ ካሜቲዲ አታናይኔ ኤሬቶንታ ቆታን አታና ሚሺ ዴና። * 3 ሄሳ ጊሽ ኢንቴ ጌማን ሃሳዩዳዚ ዉሪ ቆንጮ ኬዛና፤ ቃሴካ ኢንቴ ቆልፃን ሃይሳን ሳሱኬቴ ሃሳዩዳዚ ዉሪ ዴሬ ሲንሳን ዮቴታና።

አናስ ባባናስ ቤሲዛኮኔ
(ማቶ 10:28-31)

4 “ታ ላጌቶ! ታ ኢንቴስ ጊዛይ አሾ ሃላ ዎዳናፔ አቲን ሃራ አይኮካ አሳናስ ዳንዳዮንታይታስ ባቦፍቴ። 5 ጊዶ አቲን ኢንቴ ባባናስ ቤሲዛይ አናኮኔ ታ ኢንቴና ቤሳና፤ አሾ ዎዲዳፔ ጉዩ አሾኔ ሹምፖ ኢሲፌ ጋሲ ጋናሜ ታማን ዩጋናስ ዳንዳዩዛይሳስ ባቢቴ። ኤ ኢዛስ ባቢቴ ጋይስ።

6 “ሲኔ ካፎ ኢቻሻቲ ናምዑ ሳንቴስ ባይዜቴቴስ፤ ጊዶ አቲን ኢስታፌ ኢሲኒዮካ ያሲ ዶጌና። 7 ኢንቴ ሁዔ ቢናናይ ኩሜስ ታይቦን ዴስ። ሄሳ ጊሽ ባቦፍቴ፤ ዳሮ ሲኔ ካፎታፔ ኢንቴ አዴታ።

ኪርስቶሳ ጊሽ ማርካታና ኮሼስ
(ማቶ 10:32-33፤ 12:32፤ 10:19-20)

8 “ታ ኢንቴስ ዮታይስ ታ ጊሽ አሳ ሲንሳን ማርካቲዛ አሳ ኡባስ አሳ ናይ ቃሴካ ያሳ ኪታንቻ ሲንሳን ኢዛ ጊሽ ማርካታና። 9 ጊዶ አቲን አሳ ሲንሳን ታና ካዲዳዴይ ያሳ ኪታንቻ ሲንሳን ካዴታና።

10 “አሳ ና ቦላ ካዉሻ ቃላ ሃሳዩዳዴስ ናጋራይ ዉሪ ማሬታና ሺን ዪሎ አያና ጫዩዛዴይ ማሬቴና። *

* 12:1 ማቶ 16:6፤ ማር 8:15 * 12:2 ማር 4:22፤ ሉቃ 8:17 * 12:10 ማቶ 12:32፤ ማር 3:29

11 “አሳይ ኢንቴና አይኪዲ ዴሬ ሃሪዛይታኮኔ ጎዳቲዛይታኮኔ፥ አይሁዳ ዎሳ ኬሴ አይኪ ኤፊኮ ‘አይ ጊ ዛሪኖ? አይ ጊኖ?’ ጊዲ ሂርጎፍቴ። 12 አይስ ጊኮ ኢንቴ ሃሳያናስ ቤሲዛይሳ ዒሎ አያናይ ሄ ዎዴ ኢንቴና ታማርሳና።”

ዱሬ አዴዛ ኤያቴስ

13 ዳሮ አሳ ጊዶሬ ኢሳዴይ “አስታማሬ! ታ ኢሻይ ኑ አዎ ላታ ሚሻሬ ታና ጋኪዛይሳ ታስ ኢማና ማላ ኢዛስ ዮታ” ጊዴስ።

14 ዮሱሲካ “ሃይሶ! ታና ኢንቴ ቦላ ፒርዲዛ ዳና አሳዳይ አኔ?” ጊዴስ። 15 ቃሴካ ኢስታስ “አሳስ ዳሮ ሚሽ ዲኮካ ሼምፖይ ሄ ዱሬቴላን ዶንታ ጊሽ ናጌቲቴ፤ ዩቁቴላሬ ኢንቴና ኬሂ ናጊቴ” ጊዴስ።

16 ዛሬሲዲካ ኢስታስ “ሎዴሲ ካስ ኢሚዛ ጋዴ ጎዳ ጊዲዳ ኢሲ ዱሬ አሲ ዴስ። 17 ሄ አዴዚካ ባ ዎዝናን ‘ታ ካላ ሺሻዳ ዎሲዛሶይ ባይንዳ ጊሽ አይ አሳ?’ ጊዲ ቆፒዴስ።

18 “አዴዚካ ‘ታስ ዲዛ ጎታራታ ላላዳ ሃራ አኪዛዝ ኬፃና፤ ሂስታዳ ታስ ዲዛ ካላኔ ታስ ዲዛዝ ዉርሳ ኢዛን ሺሻና። 19 ታ ሼምፖዮካ ታ ሼምፖዮ! ዳሮ ዎዴስ ጊዲዛ ካስ ሺሺዳ ጊሽ ሼምፓ ኡታዳ ማ፤ ኡያ፤ ኡፋዬታ” ጋና ጊዴስ።

20 “ጊዶ አቲን ‘ዎሲ ሃይሶ ኤያዞ! ኔ ሼምፖዮ ሃቺ አማርስ ኔፔ ኤካና ኮዮቴስ፤ ሄሳ ጊሽ ኔ ኔስ ሺሺዳይስ አናስ ጊዳኔ?’ ጊዴስ።

21 “ሄሳ ጊሽ ዎሳ አቻን ዱሬ ጊዶንታ ባስ ሚሼ ሺሺዛ አሳ ዉርሴሲካ ሄሳ ማላ” ጊ ሌሚሶን ዮቲዴስ።

ዎሳን አማኔቴስ

(ማቶ 6:25-34)

22 ሄሳሬ ጉዬ ዮሱሲ ባና ካሊዛይታስ “ኢንቴስ ታ ዮታይስ ኢንቴ ዱሳስ ‘አይ ማናኮኔ ዎይኮ ኢንቴ ቦላስ አይ ማይፃናኮኔ’ ጊዲ ጩጮፒቴ። 23 አይስ ጊኮ ሼምፖይ ካላሬ አሳቴሲ ቃሴ ማይዎፔ አዴስ። 24 ቁሮታ ያሊቴ ዜሬቴና፤ ማይቴና፤ ካስ ሺሺዛ ጎታራይ ኢስታስ ባዎ ሺን ዎሲ ኢስታ ሚዜስ። ሂስቲኮ ኢንቴ ኢስታሬ ኬሂ አዴኬቴ? 25 ጊዶ አቲን ኢንቴሬ ዳርሲ ቆፒዲ ባ ላይሳ ቦላ ኢሲ ጋላስ ጉጃና ዳንዳዩዛይ አኔ? * 26 ሂስቲኮ ጉሳ ሚሽ አሶይ ኢንቴስ ዳንዳዩቶንታሼ አይስ ሃራ ሚሻስ ኬሂ ቆፒቴ?

* 12:25 ባ ላይሳ ቦላ ኢሲ ጋላስ ጉጃና ጊዛይሳ ኢሲ ኢሲ ጊሻ ማጌሬታ ቢርሼላን ባሲ ዲዛ አዱሳቴላ ቦላ ኢሲ ዋዳ ፑዴ ጉጃናስ ዳንዳዩዛይ አኔ? ጊዛዚ ዴስ።

27 “ጨሻቲ ዋነዲ ዲጨዛኮኔ አኔ ያሊቲ፤ ዋዬቲና፤ ሱቄቲና፤ ጊዶ አቲን ታ ኢንቴስ ዮታይስ፤ ሶሎሞኔይካ ጊታ አሳ ሺን ኢስታፊ ኢሲኔይሶ ማይዲቤና። * 28 ሂስቲኮ ያሲ ሃቺ ቤቲዲ ዎንቶ ታማን ዎዳና ማታ ሃይሳሶ ማይዚዛ ጊዲኮ ኢንቴኖ አማኖይ ፓጨዳይቶ! ኢንቴና ዎስቲ አሲ ማዩዜኔ?

29 “ሄሳ ጊሽ ‘አይ ሚኖ? አይ ማይዲኖ?’ ጊዲ ኢንቴ ዎዝናይ ዳርሲ ቆፖፎ። 30 ቢታ ቦላን ዲዛ አሲ ዉሪ ሃይሳ ኮዩስ፤ ጊዶ አቲን ሃይሲ ዉሪ ኢንቴስ ኮሺዛይሳ ኢንቴ ሳሎ አዋይ ኤሬስ። 31 ኡባሬካ ኮይሮሲዲ ያሳ ካዎቴስ ኮዩቲ፤ ሃይሲ ዉሪ ኢንቴስ ጉጂቲ ኢሜታና።

ሳዓ ቦላ ሚሽ ሺሻናስ ቤሴና

(ማቶ 6:19-21)

32 “ኢንቴኖ ጉሳ ዉዴ ሜሄ ማላ ጊዲዳይቶ! ካዎቴስ ኢንቴስ ኢማናስ ኢንቴ አዋስ ሎዎ ቆፋ ጊዲዳ ጊሽ ባቦፍቲ። 33 ኢንቴስ ዲዛይሳ ባይዚዲ ማንቆታስ ኢሚቲ፤ ካይሶይ ኤኮንታሶን፣ ቢላይ ሞንታሶን፣ ጨሞንታ ኮሮጆን ዉሮንታ ሚሽ ሳሎን ሺሺቲ። 34 ኢንቴ ዎዝናይ ኢንቴ ሚሺ ዲዛሶን ዳና” ጊዴስ።

አሳንቻታ ሚኖቴስ

35 “ቃንሳን ጊዲዲ ጊጌቲቲ፣ ኢንቴ ፖዎይካ ፖዎ፣ * 36 ኢስታ ጎዳይ ቡላቻ ዲጊሳፔ ሲሚዲ ያናሺ ናጌቲዛይታኔ ኢዚ ዩዲ ፔንጌ ቆዲሺን ኤሌ ዶያናስ ጊጊ ኡቲዳ አሳታ ሚሳቲቲ። * 37 ኢስታ ጎዳይ ዩዛ ዎዴ ዲስኮንታ ናጊዲ ኡቲዳ አሽካራቲ ኢስቲ አንጄቲዳይታ፤ ታ ኢንቴስ ቱሙ ጋይስ፤ ኢስታ ጎዳይ ባስ ቃንሳን ጊዲ ኤቂዲ ኢስታ ማዳን ኡቲሲዲ ሙዛና። 38 አማርስ ዎይኮ ሌላ ጊዶላን ዩዲ ኢስቲ ዲስኮንታ ዲሺን ዴሚኮ ሄ አሽካራቲ አንጄቲዳይታ። 39 ካይሶይ አይ ዎዴ ያናኮን ኤሪዛ ጊዲዳኮ ኬላ ጎዳይ ካይሶይ ቦኪሺን ጮዑ ጊዲ ቤሶንታይሳ ኤሪቲ። * 40 አሳ ናይ ኢንቴ ቆፖንታ ዎዴን ያናይሳ ኤሪዲ ኢንቴካ ጊጌቲዲ ናጊቲ” ጊዴስ።

ኢታ አሳንቻታኔ ሎዎ አሳንቻታ ሌሚሶ

(ማቶ 24:45-51)

41 ጴጥሮስካ “ጎዶ! ሃይሳ ሌሚሶ ኔ ዮቲዛይ ኑስ ዓላዬ? ኡባ አሳሳራ?” ጊዴስ።

42 ጎዳይካ “ሂስቲኮ ባሶ አሳስ ኮሺዛ ዎዴን ቁማ ኢማና ማላ ኬላዴይ ኬላ አሳ ቦላ ዎሲዛ አማኔቲዳ ዎዝናማ አሲ አኔ?

* 12:27 1ካዎ 10:4-7፤ 2ታር 9:3-6 * 12:35 ማቶ 25:1-13 * 12:36 ማር 13:34-36 * 12:39 ማቶ 24:43-44

43 ጎዳይ ሲሚሺን ሄሳሶ አሲሹ ቤተዛዴይ ኢዚ አንጄቲዳዴ።
 44 ታ ኢንቴስ ቱሙ ጋይስ፤ ባስ ዲዛ ሚሽ ኡባ ቦላ ሄሳዴ ጎዳሳና። 45 ጊዶ አቲን ‘ኢዛዴይ ታ ጎዳይ ኤሌ ዬና ጋምዓና’ ጊዲ ቆፒዲ አዴ አሽካራታኔ ማጫ አሽካራታ ቡኪኮ፣ ቃሴካ ኮይዳ ማላ ሚዲኔ ኡዩዲ ማሶቲኮ፣ 46 ሄሳዴ ጎዳይ ኢዚ ቆፖንታ ጋላሳን ያና ጊዲ ኤዙጎንታ ሳቴን ያና። ዩዲካ ኢዛ ቃንዩሬሳ ዩጊዲ ኢዛ ኤፃ አማኖንታይታራ ኢሲፌ አሳና።
 47 “ባ ጎዳ ቆፋ ኤሪዲ ጊጌቶንታይኔ ጎዳ ሹኔ አሶንታ አሽካራይ ኢታ ሾቶ ሾጩታና። 48 ጊዶ አቲን ኤሮንታ ዲሹ ሾቻስ ቤሲዛ ሞሮ አሲዳ አሽካራይ ጉሳራ ሾጩታና። ዳሮ ኢሜቲዳ አሳ ኡባፌ ዳሮይ ኮዩቴስ፤ ዳሮ ሃዳራ ኤኪዳዴፌ ዳሮይ ኮዩቴስ።

ዉርሲ አጊዲ ዩሱሳ ካሎ
 (ማቶ 10:34-36)

49 “ታኒ ዩዳይ ቢታ ቦላን ታማ ኤሳናሳ። ሄ ታማይ ሃዲ ኤዲ ኬዚዳኮ ታና ዳሮ ኡፋይሳና። 50 ጊዶ አቲን ታኒ ፃማቄታና ፃንቃታይ ዴስ፤ ሄ ፃንቃታይ ፖሌታናሹ ታኒ ኬሃ ሜቶቴታዲስ።
 * 51 ኢንቴስ ታኒ ቢታ ቦላ ሳሮ ኤሃና ዩዳ ሚሳቲኬ? ጊዴና፤ ታ ኢንቴስ ዮታይስ ታኒ ዩዳይ ኢሳ ኢሳፌ ሻካናሳ። 52 ሃይሳፌ ሲንሳን ኢሲ ኬሳን ባ ጊዶን ሻኬቲዳ ኢቻሹ አሳቲ ዳና። ናምዓቲ ሄሻታ ቦላ ሄሻቲ ናምዓታ ቦላ ዴንዲዲ ባ ጊዶን ሻኬታና።
 53 አዋይ ባ አቱማ ና ቦላ፣ አቱማ ናይካ ባ አዋ ቦላ፣ አያ ባ ማጫ ናይ ቦላ ማጫ ናያካ ባ አዩይ ቦላ፣ ቦሎታ ባ ና ማች ቦላ፣ ና ማቻካ ባ ቦሎቲ ቦላ ዴንዲዲ ባ ጊዶን ሻኬታና” ጊዴስ።
 *

ዎዴዛ ሃኖታ ኤሮ
 (ማቶ 16:2-3)

54 ቃሴካ ዴሬዛስ “ኢንቴ አዋ አርሼይ ሞኪዛ ባጋራ ሻራይ ኬዚሺን ቤዩዲ ‘ኤሌራካ ኢራይ ያና’ ጌስ ጌታ፤ ኢንቴ ጊዳ ማላካ ሃኔስ። 55 ዱጊሃ ባጋራ ፑዴሃ ጫርኪሺን ጋላሳይ ሆፖ ጊዳና ጌታ፤ ኢንቴ ጊዳ ማላካ ሃኔስ። 56 ኢንቴኖ! ሎፖ ሚሳቲዛ ኢታቶ፤ ሳሎይሳኔ ሳዓ ሜዳ ቤዩዲ ሃናናይሳ ኤሬታ ሺን ሂስቲን ሃ ዎዴዛ ኤሮይ ኢንቴና ዋኒ ዎኒዜ?” ጊዴስ።
 57 “ሂስቲኮ ኢንቴ አይስ ቱማ ፒርዴኬቲ?”

ሞርኬራ ሲጌቴስ
 (ማቶ 5:25-26)

* 12:50 ማር 10:38 * 12:53 ሚክ 7:6

58 “ኔ ሞርኬራ ዳና ሲንሳን ኤቃና ቢሺን ቡሮ አጌ ቦላን ዳሼ ኢዛራ ጊጋና አጌ ኮያ፤ ኔ ሂስቶንታ አጊኮ ኢዚ ኔና ጎቺዲ ዳና ሲንሳ ኤፋና፤ ዳናይካ ኔና አሲዲ ሃላቃስ ኢማና፤ ሃላቃይካ ኔና ዎይኔን ዬጋና። 59 ታ ኔስ ዮታይስ፤ ዳናይ ፐርዲዳ ዉርሴላ ሳንቲሜዮ ቃንፃ ዉርሳና ጋካናስ ሄፔ ኬዛካ።”

13

ናጋራፔ ሲሞንታይ ዉሪ ዳያና

1 ሄ ዎዴ ኢሲ ኢሲ አሳቲ ዮሱሳኮ ዬዲ “ጲላዎሲ ኢስታ ሱሴ ኢስታ ያርሾራ ጋሴ ዋላኪዳ ጋሊላ አሳታ” ጊሽ ዮሱሳስ ዮቲዳ።
2 ኢዚካ ዛሪዲ “ሂስቲን ሄሳ ማላ ሜቶይ ኢስታ ቦላ ጋኪዳ አሳቲ ሃንኮ ዋዬይ ጋኮንታ አቲዳ ጋሊላ አሳ ኡባፌ አዲዳ ናጋራንቻ ጊዲዳ ጊሽ ጊዲ ቆፔቲ? 3 ጊዴና! ታ ኢንቴስ ዮታይስ ኢንቴ ማሬቶንታ ኢዲኮ ኢንቴ ዉሪካ ሄ አሳታ ማላ ዳያና። 4 ዎይኮ ሳልሆሜን ጊምቤይ ኢስታ ቦላ ኩንዲን ሃይቂዳ ታማኔ አሱፑን አሳቲ ዮሩሳላሜን ዲዛ አሳ ኡባፌ ናጋራንቻ ጊዲዳ ጊሽ ጊዲ ቆፔቲ? 5 ጊዴና! ታ ኢንቴስ ዮታይስ ኢንቴ ማሬቶንታ ኢዲኮ ኢንቴ ዉሪካ ሄ አሳታ ማላ ዳያና” ጊዴስ።

አይፎንታ ባላሴ ሚሳይ ሌሚሶ

6 ቃሴካ ኢስታስ “ኢሲ አሲ ዎይኔ ቶኪዛሶን ቶኬቲዳ ኢሲ ባላሴ ጊዛ ሚሴ ዳዉስ፤ ሄ ባላሴ ሚሳይኮ አይፌ ኮያና ዬዲ ኢሲ አይፌካ ዴሚቤና። 7 ዎዬኔ አታኪልቲ አሲዛይሳስ ሄኮ ታኒ አይፌ ዴማና ጋዳ ሃቺራ ሄኹ ላይሳ ሃ ባላሴይኮ ሲሜሬታ ያዳ ኢሲ አይፌካ ዴማቤኬ፤ ሄሳ ጊሽ ኢዞ ቃንፃ ዲጋ፤ አዛስ ጮ ቢታ ፀንፃዜ?” ጊዲ ሌሚሶ ዮቲዴስ። 8 ኢዚካ ዛሪዲ “ጎዶ! ታኒ ኢዚ ፃጵን አሻ ዮጋዳ አሴላ ዪላና ማላ ሃላይሳስ አጋጋርኪ? 9 ዬዛ ላይሳስ ኢዛ አይፊኮ ሎዎ፤ አይፎንታ ኢዲኮ ቃንፃንዳሳ” ጊዴስ።

ዮሱሲ ኢሲ ቁና ማጫሲዮ ሳምባታ ጋላስ ፓሲዴስ

10 ዮሱሲ ሳምባታ ጋላስ ኢሲ አይሁዳ ዎሳ ኬላን ታማርሲሺን፤ 11 ታማኔ አሱፑን ላይሳ ኩሜሳ ኢታ አያናይ አይኪዲ አሳቴሳ ፓጨሲዳ ኢሲ ማጫሳያ ሄን ዳዉስ፤ ኢዛካ ዞኮይ ቁኒዳ ጊሽ ሙሌካ ዶቁ ጋናስ ዳንዳዑኩ። 12 ዮሱሲ ኢዞ ቤዬዳፔ ጉዬ ዪይጊዲ “ሄኔ ማጫሳዬ! ኔኒ ኔና ሳኪዛ ሃርጌዛፔ ፓፃዳሳኮ” ጊዴስ። 13 ዮሱሲ ባ ኩሼ ኢዚ ቦላ ዎሴን ኢዛ ሄራካ ሲቲ ጋዳ ኤቃዱስ፤ ዎሳካ ጋላታዱስ።

14 አይሁዳታ ምሳ ኬሳ ሃላቃዚካ ሳምባታ ጋላስ ፓሲዳይሳስ ዩሱሳ በላ ሃንቁቲዲ ኢዛኮ ዩዛ ዴሬዛ “ኦሶስ ቤሲዛ ኡሱፑን ጋላሳቲ ዲዛ ጊሽ ሄ ኦሶ ጋላሳታን ዩዲ ፓዊቴ ኦቲን ሳምባታ ጋላስ ዮፒቴ” ጊዴስ። *

15 ጎዳይካ ዛሪዲ “ኢንቴኖ ቆዴፔ ቆሞን ሃሳዩዛይቶ! ኢንቴ ጊዶፌ ኢሳዴይ ባ ቦራ ምይኮ ባ ሃሬ ሳምባታ ጋላስ ባሶን ቃሹቲዳሶፔ ቢርሺዲ ሃሴ ኡሻናስ ኤሬ ኤሬኔ? 16 ሂስቲን ሃና ማጫሳያ ኣብራሃሜ ና ጊዳዳ ታማኔ ኦሱፑን ላይሳ ኩሜስ ሃላዔይ ቃቻን ዲዛሶፔ ሳምባታ ጋላስ ቢርሹታናስ ኢዚስ ቤሴኔ?” ጊዴስ። 17 ዩሱሲ ሂዝጊ ኦይቺዳ ምዴ ኢዛራ ኤቁቲዛይቲ ዉሪካ ዩላቲዳ፤ ጊዶ ኦቲን ዴሬይ ዉሪካ ኢዚ ኦይቺዳ ማላሊሲዛ ኦይሻን ኡፋዩቲዴስ።

ሳናፊጩ ጌቴቲዛ ሚሳይ ዜሬሳ ሌሚሶ
(ማቶ 13: 31-33፤ ማር 4: 30-32)

18 ቃሴካ ዩሱሲ ዛሪዲ “ዶሳ ካዎቴሳ ኦይ ሚሳቲዜ? ኢዞ ኣዛራ ሌሚሶ? 19 ኢሲ ኦሲ ሳናፊጩ ጌቴቲዛ ሚሳ ኦይፌ ባ ጋዴን ቶኪን ሞካ ዲጫዳ ጊታ ጊዲን ካፎቲ ኢዚ ሃጋ ጊዶን ዱሳሶ ጊጊሳና ጋካናስ ዲጪዳ ሳናፊጩ ሚሳ ሚሳታዉስ” ጊዴስ። *

ኢርሾ ሌሚሶ
(ማቶ 13: 33)

20 ቃሴካ “ዶሳ ካዎቴሳ ኣዛራ ሌሚሶ? 21 ኢሲ ማጫሲ ሙኑቃ ጫሊሳናስ ዳሮ ዲሌራ ዋላኪዳ ጉሳ ኢርሾ ሚሳታዉስ” ጊዴስ።

ፁንሳ ፔንጌ
(ማቶ 7: 13-14፤ 21-23)

22 ሄሳፌ ጉዩ ዩሱሲ ዩሩሳላሜ ቢሹ ካንሳ ቢዛ ካታማኔኔ ጉታታን ኦሳ ታማርሲሹ ኦዲሹን። 23-24 ኢሳዴይ ኢዛኮ ሹቁዲ “ጎዶ! ፐርዳፌ ጉሳ ኦሳቲ ሃላ ኦታኔ?” ጊዲ ኦይቺዴስ። ኢዚካ ዛሪዲ “ፁንሳ ፔንጌይራ ጌላናስ ባዴቲቴ፤ ዳሮቲ ጌላናስ ኮዩቴስ ሹን ኢስታስ ሃኔና። 25 ኬሳ ጎዳይ ዴንዲዲ ባ ካሬ ጎርዲ ጊዲን ኢንቴ ካሬን ኤቁዲ ‘ጎዶ! ካሬ ዶያርኪ!’ ጊዲ ፔንጌ ቆፃና ሹን ኢዚ ዛሪዲ ‘ኢንቴ ኦናኮኔ ኦዋፔ ዩዳኮኔ ታ ኢንቴና ኤሪኬ’ ጋና ጊዴስ።

26 “ኢንቴኒካ ኢዛስ ዛሪዲ ‘ኑኒ ኔናራ ኢሲፌ ሚዶሲኔ ኢሲፌ ኡዩዶስ፤ ኑ ዱቡሻን ኑና ኔ ታማርሳዳሳ’ ጋና።

* 13:14 ኬሳ 20:9-10፤ ዛሬ 5:13-14 * 13:19 ሃጋ ጊዛይሳ ኢሲ ኢሲ ጋሞ ዴሬ ኦሳቲ ሃንጌ ጌቴስ።

27 “ኢዚካ ዛሪዲ ‘ኢንቴና ኢንቴ ኦናኮኔ ኢንቴ ኦዋፔ ዩዳኮ ታ ኢንቴና ኤሪኬ፤ ኢንቴ ማካላቲ ዉሪካ ታፔ ሃኪቴ’ ጋና ጊዴስ። * ”

28 “ኢንቴ ኦብራሃሜ፥ ዩሳቃ፥ ያቆቤኔ ናቤታ ኡባታ ያሳ ካዎቴላን ቤዩዛ ዎዴ ኢንቴ ካሬን ዩጌቲ ኦቲኮ ሄ ዎዴ ኢንቴስ ዩሆኔ ኦቻ ጋርጩቸ ጊዳና። * 29 ኦሳይ ኦዋ ኦርቪይ ሞኪዛ ባጋፊኔ ዉሊዛ ባጋፊ ፑዴሃፔኔ ዱጌሃፔ ዩዲ ያሳ ካዎቴላ ማዳን ኡታና። 30 ሄኮ ጉዩን ዲዛይታፔ ባጋይቲ ሲንፊ ኦዳና ሲንላን ዲዛይታፔ ባጋቲ ጉዩ ኦዳናይቲ ዴቴስ” ጊዴስ። *

ዩሱሲ ዩሩሳላሚ ዋላሲዴስ

31 ሄ ዎዴ ፋርሳዌታፔ ኢሲ ኢሲ ኦሲ ዩዲ “ሄርዶሲ ኔና ዎዳናስ ኮዩዛ ጊሽ ሃይሳፌ ዴንዳ ኪቻ” ጊዳ።

32 ዩሱሲ ኢስታስ “ታኒ ቡሮ ‘ሃቺኔ ዎንቶ ዳይዳንላታ ኦሳፔ ኪሳና፤ ሃርጊዛይታካ ፓሳና፤ ሄቫንሳ ጋላስ ታ ቆፋሶ ታ ጋሳና’ ጊዴስ ጊዲ ሄ ዎርካናስ ዮቲቴ። 33 ጊዶ ኦቲን ናቤይ ዩሩሳላሚፔ ካሬን ሃይቃናስ ቤሶንታ ጊሽ ሃቺኔ ዎንቶ ዎንቶፔይንካ ታ ሲንፊ ቡስ ጉጃና።

34 “ሃኔ ዩሩሳላሚ ናቤታ ዎዳዛሬ ኔኮ ኪቴቲዳይታ ሹቻራ ጫዲዛሬ! ኩቶይ ባ ጪዮታ ባ ቁፌ ጋርስ ሺሺዛ ማላ ኔ ናይታ ሺሻናስ ኦፑን ዎዴ ኮያዲናሺን ኔ ጊዲኮ ኦካይ ጋዳሳ። 35 ሄኮ ኢንቴ ኬሳይ ካይዚዴስ፤ ታ ኢንቴስ ዮታይስ፥ ‘ሃዳ ሱንላን ዩዛዴይ ኦንጄቲዴስ’ ኢንቴ ጋና ዎዴይ ጋካናሺ ናምዓንሳ ታና ቤዩኬታ” ጊዴስ። *

14

ቃሴካ ዩሱሲ ኢሲ ሃርጋንቻ ሳምባታ ጋላስ ፓሲዴስ

1 ኢሲ ጋላስ ዩሱሲ ቁማ ማናስ ፋርሳዌታ ሃላቃታፔ ኢሳ ሶ ጌሊዳ ዎዴ ኦሳይ ዉሪ ዩሱሳ ኦይ ኦሳናኮኔ ጊዲ ኦይፌ ኢዛ ቦላ ቶኪ ጸሊዴስ። 2 ሄንካ ኦሳቴላይ ኢዛስ ፑሪን ዋዩቲዛ ኢሲ ኦሲ ኢዛ ሲንላን ዴስ። 3 ዩሱሲካ ሙሴ ዎጋ ኤሪዛይታኔ ፋርሳዌታ “ሳኬቲዛዴ ሳምባታ ጋላስ ፓሳናስ ኮሺዜዩ? ኮሺኔ?” ጊዲ ኦይቺዴስ።

4 ኢስቲካ ጮው ጊዳ፤ ኢዚካ ኦዴዛ ቦቺዲ ፓሲ ዩዲዴስ። 5 ቃሴካ “ኢንቴፌ ኢሲ ኦሳስ ሳምባታ ጋላስ ናይ ዎይኮ ቦሪይ

* 13:27 ማዛ 6:8 * 13:28 ማቶ 22:13፤ 25:30 * 13:30 ማቶ 19:30፤ 20:16፤ ማር 10:31 * 13:35 ማዛ 118:26

ኩንዲዲ አላን ጌሊኮ ኤሶን ሄራካ ከሶንታዴይ አኔ?” ጊዴስ።
*

6 ኢስቲካ አይሻስ አይኮ ዛሮካ ዴማናስ ዳንዳዩቤቴና

ባና ዚቂ ሂስቴሲኔ ኢማሳ ሞኮ

7 ዌይጌቲዳ አሳቲ ኡታናስ ቦንቾ ሶ ኮዩሺን ዩሱሲ ቤዩዲ ሌሚሶራ ኢስታስ። 8 “ኢሲ አሲ ኔና ሳርጌስ ዌይሲኮ ቦንቾሶን ኡቶፋ፤ ኔፔ ቦላራ ቦንቾቲዛዴይ ዌይሴቲኮ፤ 9 ኢንቴና ናምዓታካ ዌይጊዳዴይ ዩዲ ‘ኔ ኡቲዳሶዛ ሃይሳዴስ ዩዳ’ ጋና፤ ኔኒካ ዩላታሼ ዚቃሶ ባንዳሳ። 10 ጊዶ አቲን ኔ ዌይሴቲዳ ዎዴ ዚቃሶ ዌላዳ ኡታ፤ ኔና ዌይጊዳዴይ ዩዲ ‘ታ ላጌዞ! ሃያ ጵቃሶን ኡታ’ ጋንዴስ፤ ኔኒካ ሄ ዎዴ ኔናራ ማዳን ኡቲዳ አሳ ኡባ ሲንላን ቦንቾታና። 11 አይስ ጊኮ ባና ጵቁ ሂስቲዛዴይ ዉሪ ዚቂ ጋና፤ ባና ዚቂ ሂስቲዛዴይ ዉሪ ጵቁ ጋና” ጊዴስ። *

12 ዩሱሲካ ዌይጊዳዴይ “ቁማ ዎይኮ ካዎ ሚዛናስ ዌይሲኮ ኔይሳሶ ኔና ዌይሴዲ ሚዞንታ ማላ ኔ ላጌታ ዎይኮ ኔ ኢሻታ፥ ኔ ዳቦታ ዎይኮ ዱሬታ ዎይኮ ዱሬ ጉታታ ዌይሳ። 13 ጊዶ አቲን አሳ ዌይሳዳ ሚዛና ኮይኮ ማንቆታ፥ ኩሼይ፥ ቶሆይ ባይንዳ ዎሴታኔ ቆቁታ ዌይሳ፤ ኔኒ አንጄታና። 14 ዌይሴቲዳይቲ ኩሼ ዛራናስ ዳንዳዩንታ ጊሽ ዊሎታ ዴንሳ ዎዴ ኔስ ኩሼይ ዛሬታና” ጊዴስ።

ዎጋ ዲጊሴ ሌሚሶ

(ማቶ 22: 1-10)

15 ማዳን ዩሱሳራ ኢሲፌ ኡቲዳይታፔ ኢሶይ ሃይሳ ሲይዲ “ዎሳ ካዎቴላን ሺቂዲ ማዳፌ ሚዛ አሲ አንጄቲዳዴ” ጊዴስ።

16 ዩሱሲካ “ኢሲ አሲ ዎልቃማ ዲጊሴ ጊጊሲዲ ዳሮ አስ ዌይጊዴስ።

17 “ዲጊሴ ማና ዎዴይካ ጋኪን ዌይጌቲዳ ኢማሳታ፥ ‘ዉሪካ ጊጊዳ ጊሽ ሃ ዩቴ!’ ጊዲ ዌይጋና ማላ ባ አሽካራ ዩዲዴስ።

18 ጊዶ አቲን ዉሪካ ባሲ ሃራ ጋሶ ሺሺዲ ኢሶይ ናሃራ ጋዴ ሻማዲስ፤ ታ ባዳ ቤያናስ ቤሴስ፤ ሃቺስ ታና ላንጮፋ’ ጊዴስ።

19 “ሃንኮይሲካ ‘ታኒ ኢቻሹ ዋፃ ቦራ ሻማዲስ። ኢስታ ፓጫ ዌላና ጊሽ ሃቺ ታና ላንጮፋ’ ጊዴስ።

20 “ቃሴ ሃራ ኢሳዴይካ ‘ታኒ ቡሮ ሚሺራቴላን ዳይስ፤ ባናስ ዳንዳይኪ’ ጊዴስ።

21 “አሳንቻይካ ኪቴቲዳሶፔ ሲሚዲ ሄቫቲ ጊዳይሳ ባ ኅዳስ ዮቲዴስ። ሄ ዎዴካ ዲጊሳ ጊጊሲዳይሲ ሃንቁቲዲ አሳንቻ ‘ኤሌላ

* 14:5 ማቶ 12:11 * 14:11 ማቶ 23:12፤ ሉቃ 18:14

አይዱ አጌ ከዛዳ ማንቆታ፤ ኩሼይኔ ቶሆይ ባይንዳ ዎቤታ ቆማግታኔ አይፌይ ባይንዳ ቆቁታ ሃ ጌልሳ' ጊዴስ።

22 “አሳንቻዚካ ዛሪዲ ‘ታ ጎዶ! ኔ ታና አዛዚዳይሳ ዉርሳ ፖላዲስ፤ ሃዲካ ሃራ ኡቴሳሶይ ዴስ’ ጊዴስ።

23 “ጎዳዚካ አሳንቻዛ ‘ጌዴ አይዱ አጌ ከዛዳ ታ ኬሴ ኩማና ማላ ፑዴኔ ዱጌ አዲዛይታ ዎልቃራ ሃ ጌልሳ። 24 ታኒ ቴማ ጋይስ፤ ዲጊሳ ማና ዪይቤቴዳይታፕ ኢሳዴይካ ዱናን ጌልሴና’ ” ጊዴስ።

ዮሱሳ ካሎይ ባና ያርሾ ኮዬስ
(ማቶ 10:37-38)

25 ዳሮ ዴሬይ ኢዛራ ኢሲፌ ቢዛይሳ ዮሱሲ ቤዬዲኔ ጉዬ ሲሚ 26 “ታኮ ዩዛይ ዉሪ ባ አዎ፤ ባ ማቾኔ ናይታ፤ ባ ኢሻታኔ ሚቼታ፤ ባ ሺምፖ ጊዲን ኢዎንታ አጊኮ ታና ካሊዛዴ ጊዳናስ ዳንዳዬና። * 27 ባ ማስቃሌ ቶኪዲ ታና ካሎንታይ ታና ካሊዛዴ ጊዳናስ ዳንዳዬና። *

28 “ኢንቴፌ ኢሲ አሲ ኬሴ ኬፃናስ ኮይኮ ፖላናስ ዳንዳያናኮኔ ዳንዳዮንታኮ ኮይሮቴዲ ባስ ዲዛ ቢራ ቆፖንታይ አኔ? 29 ኬሳ ኬፃና ዶሚዲ ዉርሳናስ ሃናንታ ኢዲኮ ቤዬዳ አሲ ዉሪ ኢዛ ቦላ ሚጫና። 30 ኢስቴካ ‘ሃይሲ አዴዚ ኬሴ ኬዎ አይኪዴስ ሺን ፖሊቤና’ ጊ ሚጫና።

31 “ዎይኮ ኢሲ ካዎይ ሃራ ካዎራ አላስ ጊጌቴዲ ናምዑ ታሙ ሺ አሲ ኤኪ ዬዛ ካዎ ዛራናስ ታሙ ሺ አላ አሳራ ዛራናኮኔ ኡቴዲ ቆፖንታይ አኔ? 32 አላ ዛራናስ ዳንዳዬቶንታ ሚሳቴዲ ቤቴኮ ቡሮ ሃሆን ዲሺን ማቃይናናስ ጋና ዮዴስ። 33 ሄሳሶካ ኢንቴፌ አናካ ጊዲን ባስ ዲዛይሳ አጎንታይ ታና ካሊዛዴ ጊዳናስ ዳንዳዬና።

ማልዎንታ ማፂኔ ሌሚሶ
(ማቶ 5:13፤ ማር 9:50)

34 “ማፂኔይ ሎዎሺን ባ ማፂኔቴሳ ማልዎ ዮዲኮ ዛሪዲ ዋኒ ማልዎና ዳንዳዬኬ? 35 ጋዴን ዮጊን አራዲሶንታ ጊሽ ጮ ካሬ ዎራ ዮጌቴስ፤ ሲዬዛ ሃይሲ ዲዛ አሲ ሲዮ!” ጊዴስ።

15

ዳዩዲ ቤቴዳ ዶርሳ ሌሚሶ
(ማቶ 18:12-14)

* 14:26 ማቶ 10:37 * 14:27 ማቶ 10:38፤ 16:24፤ ማር 8:34፤ ሉቃ 9:23

1 ኢሲ ጋላስ ቃራፃ ሺሺዛይቲኔ ናጋራንቻቲ ወሪ ዩሱሳፔ ሲያናስ ኢዛ አቲ ሺቂዳ። 2 ፋርሳዌቲኔ ፃፌቲ “ሃይሲ አዴዚ ናጋራንቻታ ኢዩና፤ ኢስታራካ ሜስ” ጊዲ ባ ጊዶን ዙዙሜቲዳ።

3 ዩሱሲካ ኢስታስ ሌሚሶ ሂዝጊ ዮቲዴስ፤

4 “ኢንቴ ጊዶፌ ኢሳዴስ ዌቱ ዶርሲ ዲኮ ሄ ዌቱ ዶርሳታፔ ኢሲና ዳይኮ አቲዳ ኡዱፋን ታማኔ ኡዱፋናታ ዴንባን ዩጊዲ ዳይዳይሳ ዴማና ጋካናስ ኮያና ቦንታይ አኔ? 5 ዴሚዲ ኡፋይሳራ ሃሺን ቶኪ ኤኪዲ፤ 6 ባሶ ሲሜስ፤ ባ ላጌታኔ ጉታ አሳታ ኢሲ ቦላ ዌይጊዲ ‘ዳይዳ ታ ዶርሳዮ ዴማዲስ፤ ታናራ ኢሲፌ ኡፋዮቲቱ’ ጋና። 7 ታ ኢንቴስ ዮታይስ ‘ሄሳሶካ ማሮቴስ ኮሾንታ ኡዱፋን ታማኔ ኡዱፋን ጊሎታፔ ማሬቴሳን ጌሊዛ ኢሲ ናጋራንቻን ሳሎን ኡፋይስ ጊዳና።’

ዳይዲ ቤቲዳ ቦላ ሺሊንጌ ሌሚሶ

8 “ዎይኮ ኢሲ ታሙ ቢራ ሳንቲሜይ ዲዛ ማጫሳያ ሄ ታማፌ ኢሲኔያ ዳይኮ ያምፔ አይሳዳ ዴማና ጋካናስ ኬላ ጋርስ ፒታዳ ሎዌላ ኮዮንታ ማጫስ አኔ? 9 ኢዛካ ዴሚዳ ዎዴ ባ ላጌታኔ ባ ጉታታ ኢሲፌ ዌይጋዳ ‘ታፔ ዳይዳ ቢራ ሳንቲሜዮ ዴሚዳ ጊሽ ታናራ ኢሲፌ ኡፋዮቲቱ’ ጋንዱስ። 10 ታ ኢንቴስ ዮታይስ ‘ሄሳሶካ ማሮታን ጌሊዛ ኢሲ ናጋራንቻ አሳን ያሳ ኪታንቻታ አቻን ኡፋይስ ጊዳና።’

ዳይዲ ቤቲዳ ናዛ ሌሚሶ

11 “ኢሲዴስ ናምዑ ናይቲ ዴቴስ። 12 ኢስታፌካ ካሎ ናዚ ባ አዋ ‘አቦ! ኔስ ዲዛ ሚሻፌ ታ ጊሻ ታስ ኢማ’ ጊዴስ። አዋይካ ባስ ዲዛ ሚሻ ባ ናይታስ ጊሺዴስ።

13 “ዳሮ ዎዴ ጋምዮንታ ዲሼ ካሎ ናዚ ባ ሚሻ ወርሲ ሺሺ ኤኪዲ ሃሆ ቢታ ቢዴስ። ሄንካ ባስ ዲዛ ሚሻ ኅፃይ ባይንዳ ጮሜላ ዳይሲዴስ። 14 ኢዚካ ባስ ዲዛይሳ ወርሲ ዳይሲዳፔ ጉዩን ሄ ቢታን ኢታ ኮሻይ ዴንዲን ዳሮ ዋዮቲዴስ። 15 ሄሳ ጊሽ ሄ ዴሬን ዲዛ አሳፔ ኢሳዴኮ ሺቂዴስ። ኢዛዴይካ ባ ጉዱንሳ ሄማና ማላ ጉዱንሳ ሄሚዛሶ ዩዲዴስ። 16 ናዚካ ጉዱንሳቲ ሚዛ ሃርቆዛፔ ማናስ አሞቲዴስ ሺን ሄሳካ ኢሚዛዴይ ቤቲቤና።

17 “ጊዶ አቲን ኢዛ ዎዝናይ ሲሚዳ ዎዴ ‘ታ አዋ አሽካራታ አፑናታፔ ካሊ ቲርፒዜ ሺን ታኒ ሃይሳን ጋፋን ሃይቃና ማታዲና? 18 ዴንዳዳ ታ አዋ ሶ ባዳ፤ አቦ! ሳሎን ያሳ፤ ሳዓን ታ ኔና ቆሃዲስ።’ 19 ሃይሳፌ ጉዩ ‘ታኒ ኔ ና ጌቱታዳ ዌይጌታናስ ታስ ቤሴና፤ ኔ አሽካራታፔ ኢሳ ማላ ታና ቆዳ’ ጊዴስ። 20 ሄሳ ጊሽ ዴንዲዲ ባ አዋኮ ቢዴስ። ጊዶ አቲን ቡሮ ኢዚ ሃሆራ

ዩሺን አዋይ ቤዩዲ ሚሼቲዲኔ ኢዛኮ ዎጊ ቢዲ ኢዲሚ አይኪዲ ዮሪዴስ።

21 “ናዚካ ‘አቦ! ሳሎን ያሳ፥ ሳፃን ታ ኔና ቆሃዲስ፤ ሃይሳፌ ጉዬ ታ ኔ ና ጌቴታዳ ዪይጌታናስ ታስ ቤሴና’ ጊዴስ።

22 “ጊዶ አቲን አዋይ አሽካራታስ ‘ኤሶቲዲ ኡባፌ ዶሬቲዳ ማይዎ ኤሂዲ ማይዚቴ፤ ኢዛ ቢራዴን ሚግዳ፥ ኢዛ ቶሆንካ ጫማ አሲቴ። 23 ሞዶ ሚርጎ ቦራ ኤሂዲ ሹኪቴ፤ ሚዲ ኡፋዬቶስ። 24 ሃይሲ ታ ናዚ ሃይቂዴስ ሺን ፓጊዴስ፤ ዳዩዴስ ሺን ቤቲዴስ’ ጊዴስ፤ ሄሳፌ ጉዬን ኡፋዬቴሰ አይኪዳ።

25 “ሄሲ ሃንዛ ዎዴ ባይራ ናዚ ኅሻሶን ዴስ፤ ሄፐካ ሲሚዲ ሶ ማቲዳ ዎዴ ዲሳ ዱሪስ ሲይዴስ። 26 ኢዚካ አሽካራታፔ ኢሳ ዪይጊዲ ‘ሄሲ አዜ?’ ጊ አይቺዴስ። 27 አሽካራዚካ ‘ኔ ኢሻይ ዩዴስ፤ ኢዚ ሳሮኒኔ ሎዎን ሲሚዳ ጊሽ ኔ አዋይ ሞዶ ሚርጎ ቦራ ሹኪዴስ’ ጊዴስ።

28 “ባይራ ኢሻዚካ ሃንቄቲዲ ሶ ጌላናስካ ኮይቤና፥ አዋይካ ካሬ ኬዚዲ ኢዚ ሶ ጌላና ማላ ዎሲዴስ። 29 ጊዶ አቲን ኢዚካ ዛሪዲ አዋስ ሄኮ ታኒ ሃይሳ ጋካናስ ኔስ አይሌ ማላ አሳዲስ፤ ኔ አዛዞፔ ኢሲኖካ ፓጩሳቤኬ፤ ጊዶ አቲን ታኒ ታ ላጌታራ ኡፋዬታና ማላ ኔ ታስ ኢሲ ዴይሻ ላቃካ ኢማቤካ። 30 ጊዶ አቲን ሃይሲ ኔ ናዚ ኔስ ዲዛይሳ ዉርሲ ላይማቲዛይታራ ዉርሲዲ ዩሺን ሞዶ ሚርጎ ቦራ ኢዛስ ሹካዳሳ’ ጊዴስ።

31 “አዋይካ ‘ታ ናዞ ኔ ኡባ ዎዴ ታናራ ዳሳ፤ ታስ ጊዲዳይ ዉሪካ ኔሳ። 32 ሃይሲ ኔ ኢሻይ ሃይቂዴስ ሺን ፓጊዴስ፤ ዳዩዴስ ሺን ቤቲዴስ፤ ሄሳ ጊሽ ኑኔ ኡፋዬታናስ ቤሴስ’ ” ጊዴስ።

16

ጨንጫ ሄንሳንቻ ሌሚሶ

1 ዮሱሲ ባና ካለዛይታስ “ኢሲ ዱሬ አዴ ዳይሳስ ኢዛ ኬሳ አይሲዛ ኢሲ አሲ ዴስ፤ ኢዚ ሄ ዱሬ አዴዛ ሚሻ አጌይ ባይንዳ ሳለዛይሳ ዎሬይ ሃ ዱሬ አዴዛ ሃይሳን ዎዲዴስ። 2 ዱሬ አዴዚ ሄ አዴዛ ዪይጊዲ ነይሶ ታ ሲይዛይሲ ሄሲ አዜ? ሃይሳፌ ዶማዳ ኔ ታ ኬሳስ አይሲዛዴ ጊዳናስ ዳንዳዮንታ ጊሽ ኔ አላፌቴሳ ጊዶን ዲዛ ሚሻ አይኪዳ ማዘጋባ ታስ ዛራ’ ጊዴስ።

3 “ኬሳ አይሲዛ አዴዚ ባ ዎዘናራ ‘ታ ጎዳይ ታና ታ አላፌቴሳፌ ጎዳና ጌስ፤ ጎይ ማናስ ታስ ዎልቃይ ባዋ፤ ዎሳናስ ዮላታይስ፤ ሄሳ ጊዲዳ ጊሽ አይ አሉ?’ ጊዲ፥ 4 ታኒ አላፌቴሳፌ ኬዚኮ አሳይ ታና ሞኪ ኤካና ማላ አላና አጌ ታ ኤራይስ።

5 “ሄሳ ጊሽ ኢዛ ጎዳ አጮይ ኢስታ ቦላ ዲዛ አሳታ ኢሳ ኢሳ ዓይጊደስ። ኮይሮ ዩዳይሳ ‘ኔ ቦላ ጎዳ አጮይ አፑኔ?’ ጊደስ።

6 “ ‘ኢሲ ዔቱ ገሮ ኩሚሳ ዛይቴይ ታ ቦላ ደስ’ ጊደስ። አላፌዚ ዛሪዲ ካሴ ኔ ፋራሚዳ ዋራቃታ ሄዩ ኤካ ኡታዳ ኤሌ ኢቻሹ ታሙ ገሮ ጋዳ ገፋ ጊደስ።

7 “ካሊዲ ሃንኮይሳ ‘ኔቸ ኔ ቦላ አፑን ዲዜ?’ ጊደስ። ‘ዔቱ አጎሮ ጊስቴይ ደስ’ ጊደስ። አላፌዚ ዛሪዲ ‘ካሴ ኔ ታልዓሽ ፋራሚዳ ዋራቃታ ሄይ አሱፑን ታሙ አጎሮ ጋዳ ገፋ’ ጊደስ።

8 “ጎዳዚካ ሾጩቸዛ አላፌዚ አሲዳ ጨንጫቴላ ጊሽ ኢዛ ናሽደስ። ሃ አላሜ ናይቲ ባና ሚሳቲዛይታራ ዲዛ ጋጎቴላን ፖፖ ናይታፔ አዲዳ ጨንጫታ።

ሚሼ ቤሲዛሶን ፔይሾ ኮሼስ

9 “ሄሳ ጊሽ ታኒ ኢንቴና ጊዛይ ሃ ቢታ ሚሻይ ወሪዳ ዎዴ ሚርና ኬላን ኢንቴ ኤኬታና ማላ ሃዒ ኢንቴስ ዲዛ ሚሻራ ኢንቴስ ላጌ ሜዲቴ ጋይስ። 10 ጉላ ሚሻን አማኔተዛዴይ ዳሮ ሚሻንካ አማኔታና፤ ጉላ ሚሻን አማኔቶንታዴይ ዳሮ ሚሻንካ አማኔቴና። 11 ሂስቲኮ ኢንቴ ሃ ቢታ ሚሻን አማኔቶንታ ኢዒኮ ቱማ ሚሻ ሃዳራ አይኪቴ ጊዲ ኦኒ ኢንቴስ ኢማኔ? 12 አሳ ሚሻን ኢንቴ አማኔቶንታ ኢዒኮ ኢንቴስ ቡዞ ጊዳና ሚሽ ኦኒ ኢማኔ?

13 “ናምዑ ጎዳስ ኢሲቶ ኢሲ ቦላ አዛዜታና ዳንዳዩዛዴይ ኦኒካ ዴና፤ ዎይኮ ኢሳ ዶሲዲ ኢሳ ኢዒስ ዎይኮ ኢሳኮ ሽቂዲ ሃንኮይሳ ሌቁስ። ምሳሲኔ ሚሻስ ኢሲፌ ጋሲ ሃሬታናስ ዳንዳዩኬታ” ጊደስ። *

14 ሚሽ ዳርሲ ሲቂዛ ፋርሳዌቲ ሄሳ ወርሲ ሲይዲ ዩሱሳ ቂዲዳ። 15 ዩሱሲካ ኢስታስ “ኢንቴ ኢንቴና አሳ አቻን ዒሊሴታ፤ ጊዶ አቲን ምሲ ኢንቴ ዎዝና ኤሬስ። አሳ አቻን ቦንቹቲዳዴይ ምሳ ሲንላን ቱና” ጊዲ ኢስታስ ዮቲደስ።

ሙሴ ዎጋኔ ኤኮ ጌሎ ጊሽ

(ማቶ 5:31-32፤ 11:12-13፤ ማር 10:11-12)

16 “ሙሴ ዎጋይኔ ናቤቲ ዮሃንሲ ያና ጋካናስ ዮቲሼ ጋምዒዳ። ሄሳ ካሊዲ ቃሴ ምሳ ካዎቴላ ሚሽራቾ ቃላይ ሳባኬቲደስ። አሲ ወሪካ ሄ ጌላናስ ዋዴቴስ። * 17 ጊዶ አቲን ሙሴ ዎጋፔ ኢሲ ቈርና ኩንዳ አታናይሳፌ ሳሎይኔ ሳዓይ አዳናይሲ ካወሻ ጊዳና። *

* 16:13 ማቶ 6:24 * 16:16 ማቶ 11:12-13 * 16:17 ማቶ 5:18

18 “ባ ማቾ አንጂ ዩዲዲ ሃራ ማቾ ኤኪዛ አሲ ዉሪካ ላይማቴስ፤ ባ አዚናፔ አንጄታ ቢዳሮ ኤኪዳይሲካ ላይማቴስ። * ”

ዱሬ አዴዛኔ ማንቆ አላዛሬ

19 “ቃሴካ ዩሱሲ ኢስታስ ‘ሎዎ ማይዎ ማይዲዲ ጋላስ ጋላስ ሎዎ ዱሳ ኡፋይሳን ዲዛ ኢሲ ዱሬ አሲ ዴስ’ ጊዴስ። 20 ሄ አዴዛ ፔንጌን ኩሜሳ ቦላይ ማዱንስ ፃላ ጊዲዳ ኢሲ አላዛሬ ጌቴተዛ ማንቆ አዴ ዲዛይሲ ኢቺዲ ዴስ። 21 ኢዚካ ሄ ዱሬ አዴዛ ኬሳን አሳይ ካስ ሚሺን ማዳፌ ጋዴን ዎዲዛ ሱፓ ማፂ ማናስ አሞቴስ። ካናቲካ ኢዛ ማዱንሳ ላጩቴስ።

22 “ሃ ማንቆ አዴዚ ሃይቂን ሳሎ ኪታንቻቲ አብራሃሜ ኪዎ ኤኪ ቢዳ፤ ቃሴ ዱሬ አዴዚካ ሃይቂዲ ሞጌቴዴስ። 23 ኢዚ ሲዎሌን ዋዩቴሽ ዶቂ ጊዲ ሃሆን አብራሃሜ ያሊዴስ፤ አላዛሬካ ባ ኪዎን አይኪ ዲሺን ቤይዴስ።

24 “ዱሬ አዴዚ ‘አዋ አብራሃሜ! ሃይሳን ዋዩቴዛ ታስ ሚቼታርኪ! ጊ አላዛሬይ ባ ቢራዴ ያራ ኢርፃ ሃሳን ቦቺዲ ታ ኢጎፃርስ ኢርፃሳና ማላ ሃ ዩዳርኪ!’ ጊዲ ዋሲዴስ።

25 “ጊዶ አቲን አብራሃሜይ ‘ታ ናዞ ኔኒ ቢታ ቦላ ዳሼ ሎዎ ዱስ ዴዲዳይሳ ማላ አላዛሬይ ካሴ ዋዩ ቤዩዳይሳ ኔ ቆፓ፤ ጊዶ አቲን ሃዲ ኢዚ ኡፋዩቴሺን ኔኒ ዋዩታሳ’ ጊዴስ። 26 ሄሲ ዉሪ ሃኒሺን ሃን ዲዛ አሲ ሃፔ ሄ ኢንቴኮ አዶንታ ማላ ቃሴካ ኢንቴኮን ዲዛይ ሃ ኑኮ አዳና ኮዩዛዴይ ሃ አዶንታ ማላ ኢንቴሲኔ ኑስ ጊዶን ጊታ አፎይ ጊጌቴዴስ ጊዴስ።

27-28 “ዱሬ አዴዚ ቃሴ ‘አቦ! ሄሲ ሄሳ ጊዲኮ ኔኒ አላዛሬ ዱጌ ታ አዋሶ ዩዳና ማላ ታ ኔና ዎሳይስ፤ ታስ ኢቻሹ ኢሻቲ ዴቴስ፤ ሃይቲ ሃይሳ ሃ ዋዩሶ ዮንታ ማላ ቢዲ ኢስታስ ሎዴሲ ዮታና ማላ አላዛሬ ዩዳርኪ?’ ጊዴስ።

29 “አብራሃሜይ ኢዛስ ዛሪዲ ‘ሙሴይኔ ናቤቲ ሄን ኢስታ አቻን ዲዛ ጊሽ ኢስታፌ ሲዮቶ’ ጊዴስ።

30 “ኢዚካ ዛሪዲ ‘አዋ አብራሃሜ ሄሳ ማላ ጊዴና፤ ሃይቂዳ አሳፔ ኢሲዴይ ሃይቆፔ ዴንዲ ቢኮ ኢስቲ ያሳ ማሮቴሳን ጌላና’ ጊዴስ።

31 “አብራሃሜይካ ዛሪዲ ‘ሙሴይኔ ናቤቲ ጊዛይሳ ሲዮንታ ኢዲኮ ሃይቂዳ አሳፔ ኢሳዴይ ዴንዲዳኮካ ኢስቲ አማኔቴና’ ” ጊዴስ።

* 16:18 ማቶ 5:32፤ 1ቆሮ 7:10-11

17

አሳስ ዱጴ ጊዳናፔ ናጌቴስ

(ማቶ 18:6-7፣ 21-22፤ ማር 9:42)

1 ዮሱሲ ባና ካሊዛይታ “አሳ ዱጴዲ ናጋራን ዩጊዛ ሚሺ ዮንታ አጌና፤ ጊዶ አቲን ያና ዱጴዛስ ጋሶ ጊዲዛዴስ አዩ-አና!

2 ሄ አዴዚ ሃ ጉሳታፔ ኢሳስ ዱጴ ጊዳናፔ ዎፃ ሹቺ ኢዛ ቆዴን ቃሹቲን አባ ጊዶ ኢዚ ዩጌቲዛኮ ኢዛስ ሎዎ ጊዳና። 3 ሄሳ ጊሽ ኢንቴ ሁዔስ ናጌቴቴ። ‘ኔ ኢሻይ ኔና ቆሂኮ ሃንቁታ፤ ኢዚ ባ ሞሮ ኤራዲ ሲሚኮ ማራ።’ * 4 ኢሲ ጋላሳን ላፑንቶ ዛሪ ዛሪ ቆሂዲ ላፑን ቶካ ዛሪ ዛሪ ‘ማራ ጊኮ ማራ’ ” ጊዴስ።

5 ሃዎራቲካ “ጎዶ! ኑስ አማኖ ጉጃ” ጊዳ።

6 ጎዳይካ “ጋሹ አይፌ ላጌ አማኖይ ኢንቴስ ዲኮ ሃይሳ ‘ኤሳ ደቃሌታ ባዳ አባን ጌላ ቶኬታ’ ኢንቴ ጊኮ ኢዚ ኢንቴስ አዛዜታና” ጊዴስ።

7-8 ቃሴካ ዮሱሲ “ኢንቴ ጊዶፌ ኢሲ አሳስ ጎሻንቻይ ዎይኮ ዶርሳ ሄሚዛ አሽካራይ ዲኮ ኢዚ ጎሻሶፔ ሲሚሺን ‘ታስ ማና ካዎ ጊጊሳ፤ ታ ማዳ ኡያና ጋካናስ ጊዴታዳ ታስ አሳ፤ ሄሳፌ ጉዬ ባጋን ማንዳሳ፤ ኡያንዳሳ’ ጌስ አቲን ሃዲ ቁማ ማና ሃ አዳ ጊዜ? 9 ሂስቲኮ ሄ አሽካራ ጎዳይ ኢዚ ኢዛ አዛዛ ፖሊዳ ጊሽ ኢዛ ጋላቲ ኤሪዜ? 10 ሄሳ ጊሽ ኢንቴኒካ ኢንቴ አዛዜቲዳይሳ ዉርሲ ፖሊዳ ዎዴ ‘ጉኒ ጎዳይ ባይንዳ አሳንቻታ ኑስ አሳናስ ቤሲዛይሳ ፖሊ አሲዶስ’ ጊቴ” ጊዴስ።

ዮሱሲ ታሙ አሳታ ኢንቺራንቻሃርጌፌ ፓሲዴስ

11 ሄሳፌ ጉዬ ዮሱሲ ዮሩሳላሜ ቢሹ ሳማሪያራኔ ጋሊላ አቻራ አዲዴስ። 12 ኢሲ ጉታ ጌሊዳ ዎዴ ኢንቺራቻ ሃርጊዛ ታሙ አሳቲ ኢዛ ዴሚዳ። ኢስቲካ ሃሆን ኤቂዲ፤ 13 ባ ቃላ ዶቁ ሂስቲዲ “ዮሱሳ! ጎዶ! ኑስ ሚሹታርኪ!” ጊዳ።

14 ኢዚካ ኢስታ ቤዩዲ “ቢቴ! ኢንቴና ቁሴታስ ቤሲቴ” ጊዴስ። ኢስቲካ ቡሮ ቢሹ አጌ ቦላ ፓዲዳ። * 15 ኢስታፌ ኢሶይ ባ ፓዲዳይሳ ቤዩዲ ባ ቃላ ዶቁ ሂስቲዲ ዎሳ ቦንቺሹ ሲሚዴስ።

16 ኢዛዴይካ ዮሱሳ ቶሆ ቦላ ኩንዲዲ ጋላቲዴስ፤ ኢዚካ ሳማሪያ ቢታ አሳ።

17 ዮሱሲካ አዴዛ “ፓዲዳይቲ ታም አስ ዴቴኔ? ሂስቲን ኡዱፉናቲ አዎ ቢዶ? 18 ሃይሳ ዱማ ዴሬ አዴዛፔ አቲን ዎሳ ጋላቲዛይ ባዎ ጉሴ?” ጊዲ አይቺዴስ። 19 አዴዛካ ዛሪዲ “ዴንዳዳ ባ! ኔና ኔ አማኖይ ፓሲዴስ” ጊዴስ።

* 17:3 ማቶ 18:15 * 17:14 ሌዌ 14:1-32

የሳ ካዎቴሳ ዩሳ ጊሽ
(ማቶ 24: 23-28፥ 37-41)

20 “የሳ ካዎቴሳ አይዴ ያኔ?” ጊዲ ፋርሳዌቲ ዩሱሳ አይቺዳ ዎዴ ዩሱሱሲ “የሳ ካዎቴሳ ቤቲዛ ማላታታን ዩኩ።” 21 አሳይ ዎሳ ካዎቴሳ ሃን ዳዉስ ዎይኮ ሄን ዳዉስ ጋናስ ዳንዳዩቴና፤ ዎሳ ካዎቴሳ ኢንቴ ጊዶን ዳዉስ” ጊዲ ዛሪዴስ።

22 ባና ካሊዛይታስካ “አሳ ና ጋላሳታፔ ኢሲ ጋላሳዮ ቤያናስ ኢንቴ አዎታና ዎዴይ ያና፤ ጊዶ አቲን ኢንቴ ቤዩኬታ።” 23 አሳይ ኢንቴስ ‘ሃን ዳዉስ’ ዎይኮ ‘ሄን ዳዉስ’ ጋና ሺን ኢንቴ ኢስታ ካሲዲ ቦፒቴ። 24 ጋሶይካ ዎልቃንሲ ዎልቃሚዲ ሃ ጋዓፔ ሄ ጋዓ ጋካናስ ፖዲሲዛ ማላ አሳ ናይ ዩዛ ጋላስ ኢዛ ማላ ሃናና። 25 ጊዶ አቲን ሃይሲ ዉሪ ሃናናፔ ኮይሮ አሳ ናይ ዳሮ ሜቶ ኤካናሲኔ ሃይሳ ሃ ዩሌቴሳን ካዴታናስ ቤሴስ።

26 “ናሄ ዎዴ ሃኒዳይሳ ማላ አሳ ና ዎዴንካ ሄሳሶ ሃናና። * 27 ናሄይ ማርካቤን ገላና ጋላስ ጋካናስ አሳይ ሚሺኒኔ ኡዩሺን፤ ኤኪሺኒኔ ገሊሺን ዳይሲዛ ሃሲ ዩዲ ዉርሲካ ዳይሲዴስ። *

28 “ሎዔ ዎዴካ ኢዛ ማላ ሃኒዴስ፤ አሳይ ሜሲኔ ኡዩስ፤ ባዩዜሲኔ ሻሜስ፤ ቶኪዛዝ ቶኬስ፤ ኬሲካ ኬዩቴስ።” 29 ጊዶ አቲን ሎዔይ ሶዶሜፔ ኬዚዳ ጋላስ ሹቺኔ ሚሳ ቆሮንታ ዲኔ ታማይ ሳሎፔ ቡኪዲ ዉርሲ ዳይሲዴስ።

30 “አሳ ናይ ቆንጨዛ ጋላስ ሄሳሶ ሃናና።” 31 ሄ ዎዴ ባ ኬሳ ቦላ ዲዛዴይ አኒካ ኬሳ ጊዶን ዲዛ ሚሽ ኤካና ጊዲ ዱጌ ዎዶፎ፤ ሄሳሶካ ጎሻ ሶን ዲዛ አሲ ጉዩ ሶ ሲሞፎ። * 32 ሎዔ ማቾ ቆፒቴ። * 33 ባ ዴዎ ጋምዲሳና ኮዩዛይ ዉሪ ዳይሳና፤ ባ ሺምፖ አሲ ኢሚዛዴይ ጋምዲሳና። * 34 ታ ኢንቴስ ጊዛይ ሄ ዎዴ አማርስ ናምዑ አሲ ኢሲ ሂፃን ኢቻና፤ ኢሶኔያ ኤኬታና፤ ኢሶይ አታና። 35 ናምዑ ማጫሳቲ ኢሲፌ ጋጨሺን ኢሲኔያ ኤኬታና፤ ሃንኮራ አታና። 36 ናምዑ አሲ ኢሲፌ ጎሻሶን ዳና፤ ኢሶይ ኤኬታና፤ ኢሶይ አታና። *

37 “ኢስቲካ ዛሪዲ ‘ጎዶ! ኢስቲ አዎ ኤኬታኔ?’ ጊዳ። ኢዚካ አሃይ ዲዛሶን አንኮቲ ሺቃና” ጊዴስ።

* 17:26 ሜዴ 6:5-8 * 17:27 ሜዴ 7:6-24 * 17:31 ማቶ 24: 17-18፤ ማር 13: 15-16 * 17:32 ሜዴ 19:26 * 17:33 ማቶ 10: 39፤ 16: 25፤ ማር 8: 35፤ ሉቃ 9: 24፤ ዮሃ 12: 25 * 17:36 ኢሲ ኢሲ ጊሻ ማፃፋታን ፓይዶ 36 ቦላ ዲዛ ቆፋ ጉጄቴስ፤ ቆፋዚካ ማቶ 24: 40 ዲዛይሳ ሚሳቴስ።

18

አምላክ ማከላ ዳና

1 ባና ካሊዛይቲ አዛሎንታ ኡባ ዎዴ ዎሳናስ ቤሲዛይሳ ኤሪሳናስ ዮሱሲ ሃ ሌሚሶዛ ኢስታስ ዮቲዴስ። 2 “ኢሲ ካታማን ያሳስ ያዮንታ አሲኔ ቦንቾንታ ኢሲ ዳናይ ዴስ። 3 ሄ ካታማንካ ኢሲ አምላ ማጫሲ ዳዉስ። ኢዛካ “ታ ባልጋራራ ታስ ሞቶይ ዲዛ ጊሽ ፐርዳርኪ?” ጋሼ ኢዛኮ ሲሜሬታዱስ።

4 ዳናዚካ ዳር ዎዴ ጋካናስ ኢዚስ ፐርዲቤና፤ ጊዶ አቲን ጉዬፔ ባ ዎዝናን “ያሳስ ያዮንታ አሴካ ቦንቾንታ አጊኮ። 5 ሃና አምላ ማጫሳያ ታና ዋይሲዛ ጊሽ ታ ኢዚስ ፐርዳና” ሄሳ ሂስቶንታ አጊኮ ኡባ ዎዴ ሲሜሬታዳ ኢዛ ታና ዳቡርሳና” ጊዴስ።

6 ጎዳይካ “ማከላንቻ ዳናይ ጊዳይሳ ሲዬቴ፤ 7 ያሲ ቃማ፥ ጋላሲኔ አማርስ ኢዛኮ ዋሲዛ ዶሬቲዳይታስ ፐርዴኔዬ? ታና አይ ሜቲዴ! ጊዲ ባ ማዶ ጋምሲሳንዴ? 8 ታ ኢንቴስ ጋይስ፤ ኢስታስ ኤሌ ፐርዳና፤ ጊዶ አቲን አሳ ናይ ዩዛ ዎዴ ቢታ ቦላ አማና ዴማንዴሻ?” ጊዴስ።

አቶራንቻ ፋርሳዌኔ አሽኬ ቃራፃ ሺሺዛዴ ሌሚሶ

9 ባና ዒሎ አሳ ማላ ቆዲዲ ጨቁቲዛይታሲኔ ሃራታ ሌቆ አይሬን ዒሊዛይታስ ሌሚሶራ። 10 “ናምዑ አሳቲ ዎሳናስ ያሳ ኬሴ ቢዳ፤ ኢሶይ ፋርሳዌ፥ ሂንኮይሲ ቃራፃ ሺሺዛዴ። 11 ፋርሳዌዚካ ኤቂዲ ባ ጊሽ ‘ዎሶ! ታኒ ሃራ አሳ ማላ ቦንቁዛዴ፥ ማከሊዛዴ፥ ሳይማቲዛዴ ሃራፔካ ሃይሳ ቃራፃ ሺሺዛዴ ማላ ጊዶንታ አጊዳ ጊሽ ታ ኔና ጋላታይስ። 12 ሳሚንታን ናምዓ ያማይስ፤ ታስ ዲዛ ታማሬ ኢሳ ኢማይስ’ ጊዲ ዎሲዴስ።

13 “ጊዶ አቲን ቃራፃ ሺሺዛዴዚ ሃሆን ኤቂዲ ፑዴ ሳሎ ጶቁ ጊዲ ዒላናስ ኮይቤና፤ ጊዶ አቲን ባ ቲራ ኢጨሽ ‘ዎሶ! ታና ናጋራንቻዛ ማራርኪ!’ ጊዴስ።

14 “ታ ኢንቴስ ዮታይስ፤ ያሳ ሲንሳን ፋርሳዌዚ ዒሎቴሲ ዴሚቤና ሺን ሃይሲ ቃራፃዛይሲ ዒሊዲ ባሶ ሲሚዴስ። ባና ጶቁሲዛይ ዉሪ ዚቁ ጋና፤ ባና ዚቁሲዛይ ጊዲኮ ጶቁ ጋና” ጊዴስ። *

15 ዮሱሲ ቦሼሬሳና ማላ አሳይ ጉሳ ናይታ ኢዛኮ ኤሂዴስ። ኢዛ ካሊዛይቲካ ሄሳ ቤዩዲ ሃንቁቲዳ። 16 ጊዶ አቲን ዮሱሲ ጉሳ ናይታ ባኮ ዒይጊዲ “ጉሳ ናይቲ ታኮ ያናይሳ ዲንፍቴ፤ ያሳ

* 18:14 ማቶ 23:12፤ ሉቃ 14:11

ካዎቴሲ ሃይታንታ ማላታሳ። 17 ታ ኢንቴስ ቱሙ ጋይስ፤ ሦሳ ካዎቴሲ ጉሳ ና ማላ ኤኮንታይ ዉሪ ኢዚን ጌሌና” ጊዴስ።

ሃ ቢታ ሃሮኔ ሳሎ ካዎቴሳ
(ማቶ 19፡16-30፤ ማር 10፡17-31)

18 አይሁዳታ ሃላቃታፕ ኢሶይ “ኪያ አስታማሬ! ሜርና ዴዎ ላታናስ ታ አይ አሶ?” ጊዴ አይቺዴስ።

19 ዩሱሲካ “አዛስ ታና ኪያ ጋይ? ኢሲ ሦሳሬ አቲን ሃራ ኪያይ ዴና። 20 ‘ላይማቶፓ፤ ዎጵፓ፤ ካይሶቶፓ፤ ዎርዶ ማርካቶፋ፤ ኔ አዎ ቦንቻ’ ጊዛ አዛዘዛታ ኔ ኤራሳ” ጊ ዛሪዴስ።
*

21 አዴዚካ “ሃይታ ጊዲኮ ጉሳ ናቴቴሳሬ ዶማዳ ናጋዲስ” ጊዴስ።

22 ዩሱሲካ ሄሳ ሲይዲ “ሂስቲኮ ኔስ ኢሲ ሚሺ ፓጩስ፤ ኔስ ዲዛዚ ዉርሳ ባዩዛዳ ማንቆታስ ኢማ፤ ሳሎ ማዝጋባን ዴማንዳሳ፤ ኢዛፕ ጉዬ ያዳ ታና ካላ” ጊዴስ። 23 ጊዶ አቲን አዴዚ ሄሳ ሲዩዳ ዎዴ ዳሮ ሃሮይ ኢዛስ ዲዛ ጊሽ ኬሂ ሚሹቲዴስ።

24 ዩሱሲካ አዴዛ ዌሊዲ “ዳሮ ሚሺ ዲዛ አሳቲ ሦሳ ካዎቴሲ ጌላናይሲ አይ ማላ ሚቶ! 25 ዱሬይ ሦሳ ካዎቴሳ ጌላናይሳሬ ጋሜላይ ናርፕ ሉኮራ አዳናይሲ ማታና” ጊዴስ።

26 ሄሳ ሲዩዳ አሳይ “ሂስቲን አኒ አታና ዳንዳዩዜ?” ጊዴስ።

27 ዩሱሲካ አሳ አቻን ዳንዳዩቶንታይ ሦሳ አቻን ዳንዳዩቴስ ጊዴስ።

28 ጴጥሮሲካ “ሄኮ ኑኒ ኑስ ዲዛዝ ኡባ አጊዲ ኔና ካሊዶስ” ጊዴስ።

29 ዩሱሲካ ኢስታስ “ታ ኢንቴስ ቱሙ ጋይስ፤ ሦሳ ካዎቴሳ ጊሽ ጊዲ ባ ኬሴ፥ ባ ማቾ፥ ባ ኢሻንታ ዎይኮ ባና ዩሊዳይታ ዎይኮ ባ ናይታ አጊዳዴይ፥ 30 ሃዲ ዎዴ ዳሮ ዳኮ ኩሼ ኤኮንታይ ኔ ዩዛ ዎዴ ቃሴ ሜርና ዴዎ ኤኮንታይ አኒካ ዴና” ጊዴስ።

ዩሱሲ ባ ሃይቆ ጊሺኔ ዴንሳ ጊሽ ሄቫንሶ ዮቲዴስ
(ማቶ 20፡17-19፤ ማር 10፡32-34)

31 ዩሱሲካ ባና ካሊዛ ታማኔ ናምዓታ ዱማ ኤሬዲ “ሃዲ ኑኒ ዩሩሳላሜ ኬዛና ንስ፤ ናቤቲ አሳ ና ጊሽ ዓሬዳይሲ ዉሪ ፖሌታና። 32 ዴሬ አሳስ አሲ ኢማና፤ ኢስቲካ ኢዛ ቂዲ ካዳናኔ ዎይሳና፤ ኢዛ ቦላ ጩታና። 33 ጋራፋና፤ ሄሳሬካ ዛሪዲ ዎዳና፤ ኢዚካ ሄቫንሶ ጋላስ ሃይቆፕ ዴንዳና” ጊዴስ።

* 18:20 ኬሳ 20፡12-16፤ ዛሬ 5፡16-20

34 ኢዛ ካለዛይቲ ጊዲኮ ሄሳ ኡባፌ ኢሲኖካ ኤሪቤይቱና። ኢዛ ጊዛይሲካ ኢስታስ ጌሊቤና። ኢዚ ኦዛ ጊሽ ሃሳዩዳኮኔ ኤሪቤይቱና።

35 ዩሱሲ ኢያርኮ ጌቴቲዛሶ ማቲዳ ዎዴ ኢሲ ቆቆ አደይ ኦጌ ዱናን ኡቲዲ ዎሴስ። 36 ሄ ቆቆ አደይኪካ ዳሮ አሳይ ኦጌራ አዲዛይሳ ሲይዲ “ሄሲ አዜ?” ጊ አይቺደስ። 37 ኢስቲካ ኢዛስ “ናዚሬቴ ዩሱሲ ሃይሳራ አደስ” ጊዲ ዮቲዳ።

38 ኢዚካ “ዳዉቴ ና ዩሱሳ ታስ ቃደታ” ጊ ዋሲደስ።

39 ዩሱሳፔ ሲንሴቲ ቢዛይቲ “ጮዑ ጋ!” ጊዲ ሃንቁቲዳ። ጊዶ አቲን ኢዚ “ዳዉቴ ናዉ! ታስ ቃደታ” ጊዲ ዳርሲ ዋሲደስ። 40 ዩሱሲካ ኤቂዲ አደዛ ኢዛኮ ኤሃና ማላ አዛዚደስ፤ ኢዚካ ኢዛኮ ሺቂዳ ዎዴ 41 “ታ ኔስ አይ አሳና ማላ ኮያይ?” ጊዲ አይቺደስ። ቆቆዚካ “ጎዶ ያላናስ ኮያይስ” ጊደስ።

42 ዩሱሲካ “ኔና ኔ አማኖይ ፓሲደስ ያላ” ጊደስ። 43 አደይ ሄራካ ያሊደስ፤ ያሳካ ቦንቺሼ ዩሱሳ ካሊደስ። ሄሳ ቤዩዳ ደሬይ ዉሪ ያሳ ጋላቲደስ።

19

ዩሱሳኔ ዜኪዮሳ

1 ዩሱሲ ኢያርኮ ጌቴቲዛሶራ አዲ ቢሺን፣ 2 ዜኪዮሳ ጌቴቲዛ ኢሲ አሲ ሄን ዩሱሲ ቢዛ ኦጌ ቦላ ደስ። ኢዚካ ደሬ ቃራፃ ቃንዲሲዛይታስ ሃላቃኔ ኬሂ ዱሬ አሳ። 3 ኢዚ ዩሱሳ ጌቴቲዛይሲ አዋይሳኮኔ ቤያናስ ኮዩሺን ቃንሳ አሳ ጊዲዳ ጊሺኔ ዳሮ ደሬይ ዩሱሳ ካሊዛ ጊሽ ዩሱሳ ቤያናስ ዳንዳይቤና። 4 ዩሱሲ ሄ ኦጌራ አዲሺን ሲንሴ አዲዲ ኦጌ ቦላ ዲዛ ኢሲ ኤሳ ሚሳ ቦላ ኬዚደስ።

*

5 ዩሱሲ ኤሳ ጋርስ ጋኪዲ ዶቂ ሂስቲ ያሊዲ “ዜኪዮሳ! ሃኛ ታ ኔ ኬሳን ፔፃናስ ቤሴስ። ኤሌላ ዎዳ” ጊደስ።

6 ኢዚካ ኤሌ ዎዳዲ ኡፋይሳን ሞኪ ኤኪደስ። 7 ሄ ዎዴ ሄን ኢዛራ ዲዛ አሳይ ሄሳ ቤዩዲ “ናጋራንቻ አሳ ኬሳን ኢማቶ ማና ጌስ” ጊዲ ዉሪካ ባ ጊዶን ዙዙሜቲዳ።

8 ጊዶ አቲን ዜኪዮሲ ኤቂዲ “ጎዶ! ታኒ ታስ ዲዛ ሚሼ ኡባፌ ባጋ ሻካዳ ማንቆታስ ኢማና፤ ታኒ አናፔካ ዎርዶራ ቦንቃ ኤኪዳዚ ዲኮ አይዱ ኩሼ ጉጃዳ ኢዛደስ ኢማና” ጊደስ።

9 ዩሱሲካ “ሃ አደይ አብራሃሜ ና ጊዲዳ ጊሽ ሃኛ ሃ ኬሳስ ፓፃቴሲ ዩደስ” ጊደስ።

* 19:4 ኢሲ ኢሲ ባጋ ጋሞሶ ቃላን ኤሳ ሚሳ ጊዛይሳ ቦላ ጌቴስ።

10 ሃይሳስ ጋሶይካ አሳ ናይ ሃ ዩዳይ ጳዩዳይሳ ኮያናሲኔ አሻናሳ። * 11 አሳይ ሃይሳ ሲዩሺን ሌሚሶራ ሃሳያ አይኪዴስ፤ ጋሶይካ ኢዚ ዩሩሳላሜ ጋካናስ ማቲዳ ጊሺኔ አሳታስ ያሳ ካዎቴስ ቆንጫና ሃኒዛ ሚሳቲዳ ጊሻሳ። * 12 ሄሳ ጊሽ “ኢሲ ካዎ ናይ ባ ካዎቴሳ ሹሜቴስ ኤኪ ያናስ ሃሆ ቢታ ቢዴስ። 13 ባ አሽካራታ ጊዶፌ ታማታ ዩይጊዲ ታሙ ሚናኔ ኢስታስ ኢሚዲ ‘ታ ሲማዳ ያና ጋካናስ ሃይሳ ሚሻን ዛልዲቴ’ ጊዴስ። †

14 “ሄ ዴሬ አሳቲ ቃሴ ኢዛ ኢዲዳ ጊሽ ‘ሃይሲ አዴዚ ኑ ቦላ ካዎታና ማላ ኮዮኮ’ ጊዲ አስ ኢዛ ጌዶራ ኪታ አሲ ዩዲዳ።

15 “ጊዶ አቲን ሃ ካዎ ናዚ ካዎ ጊዲዲ ጉዩ ባ ዴሬ ሲሚዴስ። ካሴ ቢሼ ታሙ ሚናኔ ኢሚዳ ታሙ አሽካራቲ ኢዚ ኢሚዳ ቢራን ዛልዲዲ አይ ኬና ቲርፊሲዳኮኔ ኤራናስ ኢስታ ዩይጊዴስ።

16 “ኢስታፌ ኮይሮይ ሺቂዲ ‘ጎዶ! ኔ ታስ ኢሚዳ ታሙ ሚናኔይ ሃራ ታሙ ዩሊዴስ’ ጊዴስ።

17 “ጎዳዚካ ኢዛ ‘ኔ አማኔቲዳ አሽካራ፤ ሎዎ አሳዳሳ። ኔ ጉላ ሚሻን አማኔቲዳ ጊሽ ታሙ ካታማታ ኔ ሃራና ማላ ኔስ ኢማዲስ’ ጊዴስ።

18 “ናምግንሶዚካ ኢዛኮ ሺቂዲ ‘ጎዶ! ኔ ታስ ኢሚዳ ሚናኔፔ ሃራ ኢቻሹ ሚናኔይ ዎዲዴስ’ ጊዴስ።

19 “ኢዛ ጎዳዚ ኢዛስ ዛሪዲ ‘ኔኒ አይሳና ማላ ታሙ ካታማቲ ኔስ ኢሜቲዳ’ ጊዴስ።

20-21 “ቃሴካ ሃንኮ አሳንቻይ ሺቂዲ ‘ጎዶ! ኔኒ ዎሶንታሶፔ ኤኪዛዴ፤ ዜሮንታሶፔ ማዲዛዴኔ ሜንዬ ኢታ አስ ጊዲዳ ጊሽ ታ ኔስ ባባዳ ጨርቃን ዓዓ ዎሲዳ ኔ ሚናኔዮ ሄይ ኤካ’ ጊዴስ።

22-23 “ኢዛ ጎዳዚ ዛሪዲ ኢዛስ ‘ሃይሶ ኢታ አሳንቻዞ! ታ ኔ ቃሳን ኔና ዛራ ፐርዳይስ። ታኒ ዎሶንታሶፔ ኤኪዛዴኔ ዜሮንታሶፔ ማዲዛ ሜንዬ ኢታ አስ ጊዲዳይሳ ኤራሳሺን ታኒ ታ ሚሻ ዩሎራ ኤካና ማላ ሄ ሚሻን አሳና አሳታስ አዛስ ኢማቤኪ?’ ጊዴስ።

24 ኢዛ “ጎዳዚካ ሄን ኤቂዳ አሳታ ‘ኢዛ ኩሹፔ ሚናኔዛ ኤኪዲኔ ታሙ ሚናኔይ ዲዛይሳስ ኢሚቴ’ ጊዴስ።

25 “ኢስቲካ ዛሪዲ ‘ጎዶ! ኢዛስ ታሙ ሚናኔይ ዴሲኮ’ ጊዳ።

26-27 “ኢዚካ ዛሪዲ ‘ዲዛዴስ ኡባስ ሃራይ ጉጂታና፤ ባይንዳዴስ ካሴ ዲዛይሲ ኢዛፔ ኤኬቲቻና። * ጊዶ አቲን ታኒ

* 19:10 ማቶ 18: 11 * 19:11 ማቶ 25:14-30 † 19:13 ሚናኔ ሚናኔይ ሚሻቲ አይ ላኔ ዴዲዛኮ ኤራናስ ማዲዛ ሚሻ፤ ቃሴካ ሚሽ ጊዲዲ ዛልዲሲካ ማዴስ። ኢሲ ሚናኔይ ሄ ዎዴ ኢሳዴስ ሄቹ ጋላሳስ አሶ ዳሞዛ ሊኬ ጊዳና። * 19:26-27 ማቶ 13:12፤ ማር 4:25፤ ሉቃ 8:18

ኢስታ ሰላ ካዎቶንታ ማላ ኮይዳይታ ሃይታ ታ ሞርኬታ ታኮ ሃ ኤሂዲ ታ ሲንሳን ሹኪቱ” ጊደዕስ።

28 ሄሳ ሃሳዬ ሲሚዲ ዩሱሲ ዩሩሳላሚ ኪዛናስ ኢስታፊ ሲንሳቲ ቢደዕስ። 29-31 ዳብራዛይቱ ጌቴቲዛ ዙማ ሰላ ዲዛ ቤቴፋጌኔ ቢታኒያ ጌቴቲዛ ካታማታኮ ማቲዳ ዎዴ ባና ካሊዛይታፕ ናምዓታ “ሄኒ ኢንቴ ሲንሳን ዲዛ ቄሪ ካታማዮ ቢቴ፤ ቢዲ ካታማዮ ኢንቴ ጌሊሺን ኦኒካ ቶጊ ኤሮንታ ኢሲ ቃሹቲ ዲዛ ሃሪ ጉቴ ኢንቴ ደሜና፤ ኢዛ ቢርሺዲ ሃ ታስ ኤኪ ዩቴ፤ ኢንቴና ኦኒካ ‘ኦዛስ ቢርሹቲ?’ ጊዲ ኦይቺኮ ‘ጎዳስ ኮሹስ ጊቴ’” ጊ ኪቲደዕስ።

32 ኪቴቲዳይቲካ ቢዲ ኢዚ ኢስታስ ዮቲዳ ማላ ሃሪ ጉቴዛ ደሚዳ። 33 ኢስቲ ጉቴዛ ቢርሺን ጉቴዛ ጎዳቲ ቤዩዲ “ኦዛስ ቢርሹቲ?” ጊዲ ኦይቺዳ።

34 ኢስቲካ “ጎዳስ ኮሹስ” ጊዳ። 35 ሃሪ ጉቴዛ ዩሱሳኮ ኤሂዲ ባ ማይዎ ዉርሲ ጉቴዛ ሰላ ዩጊዲ ዩሱሳ ሃሪ ጉቴዛ ቶጊሲዳ።

36 ኦሳይ ዉሪካ ባ ኦፋላ ዩሱሲ ቢዛ ኦጌ ሰላ ሚጨደዕስ።

37-38 ዳብራዛይቱ ዙማ ሰላራ ዱጌ ዎሲዛ ኦጌዛኮ ማቲዳ ዎዴ ቆዳይ ባይንዳ ደሬይ ባ ቤዩዳ ማላታ ጊሽ ዉሪካ ኡፋይሳራ ባ ቃላ ጶቁ ሂስቲዲ “ጎዳ ሱንሳን ዩዛ ካዎይ ኦንጄቲዳይሳ፤ ሳሮይ ሳሎን ቦንቾይ ሳሎፕ ሰላ ሳሎን ጊዶ” ጊደዕስ። *

39 ደሬታፕ ኢሲ ኢሲ ፋርሳዌቲ ዩሱሳ “ኦስታማሬ! ሃ ኔና ካሊዛ ኦሳይ ጊዛይሳ ጎንታ ማላ ሃንቃ” ጊደዕስ።

40 ኢዚካ ኢስታስ ዛሪዲ “ሃይቲ ጮፀ ጊዳኮኔ ሹቻቲካ ዋሳና” ጊደዕስ።

41-43 ዩሱሲ ዩሩሳላሚ ማቲሹ ካታማዮ ቤዩዲ ኢዚስ ዩኪደዕስ። “ኔስ ሳሮ ጊዲዛዝ ሃቺ ኔ ኤሪዳኮ ኦዜ ዲዛይ? ሃዲ ኔ ኦይሬፕ ቆቴቲዳ ጊሽ ኔ ሞርኬቲ ሄራ ሃራ ኔና ጊዶሲዲ ኡንዔሳና ዎዴይ ያና። 44 ኔናኔ ኔ ጊቤ ጊዶን ኔናራ ዲዛ ኔ ናይታ ዉርሲ ቢታ ኪሳና። ሹቻካ ሹቻ ሰላፊ ሳሎንታ ኦጌቴና። ሄሲ ዉሪካ ያሲ ኔና ኮዩሺን ኔኒ ኤሮንታ ኦጊዳ ጊሻሳ” ጊደዕስ።

45 ሄሳፊ ካሊዲ ዩሱሲ ያሳ ኬሴ ጌሊዲ ያሳ ኬሳ ጊዶን ዛልዒዛይታ ኬሲደዕስ። 46 ቃሴካ “ታ ኬሳይ ዎሳ ኬሳ ጊዳና ጌቴቲዲ ዓፌቲደዕስ፤ ኢንቴን ጊዲኮ ፓንጋይ ዲዛ ጎንጎሎ ሂስቲደታ” ጊደዕስ። *

47 ዎንቲን ዎንቲን ያሳ ኬሳን ኢዚ ታማሪሲሺን ዓፌቲኔ ደሬ ሃላቃቲ ኢዛ ዎዳናስ ኮይዳ። * 48 ጊዶ ኦቲን ደሬይ ዉሪካ ኢዛራ

* 19:37-38 ማዛ 118:26 * 19:46 ኢሳ 56:7፤ ኤር 7:11 * 19:47 ሉቃ 21:37

አይኬቲዲ ኢዚ ታማርሲዛይሳ ካሊዛ ጊሽ አሳናዚ ኢስታስ ኪርቂ ጊዴስ።

20

ዮሱሳ ዎልቃ ፓጫና ሺቂዳ አይሻ
(ማቶ 21:23-27፤ ማር 11:27-33)

1 ኢሲ ጋሳስ ዮሱሲ አሳ ያሳ ኬሳን ታማርሲሺኔ ሚሺራቾ ቃላ ሳባኪሺን ቁሴ ሃላቃቲ ፃፌቲኔ ዴሬ ጨማቲ ሺቂቲዲ ኢዛኮ ዩዳ። 2 “ሃይሳ ኔ አሲዛይ እና ሸኔኔ? ኔስ ሸኔ ኢሚዳይ እኔ?” ጊዲ ኢዛ አይቺዳ።

3 ኢዚካ ኢስታስ “ታካ ኢንቴና ኢሲ አይሾ አይቻይስ፤ አኔ ታስ ዛሪቱ። 4 ዮሃንሳ ሂንቃታይ ሳሎፔዬ? አሳፔ?” ጊዴስ።

5 ኢስቲካ ባ ጊዶን ኢሶይ ኢሳራ “ኑ ዮሃንሳ ሂንቃታይ ሳሎፔ” ጊኮ ኢዚ ኑና ‘ሂስቲን አዛስ አማኒቤኬቲ?’ ጋና።

6 ‘አሳፔ’ ጊኮ አሳይ ዉሪ ዮሃንሲ ናቤ ጊዲዳይሳ አማኒዛ ጊሽ ኑና ሹቻራ ጫዳና” ጊ ዞሬቲዳ።

7 ሄሳ ጊሽ “ኢዚ አዋፔኮኔ ኑ ኤርኮ” ጊዲ ዛሪዳ።

8 ዮሱሲካ ሂስቲኮ “ታካ አዛ ዎልቃን አሲዛኮኔ ኢንቴስ ዮቲኬ” ጊዴስ።

ዎዩኔ አታክሊቲ ጎሻንቻታ ሌሚሶ
(ማቶ 21:33-46፤ ማር 12:1-12)

9 ቃሴካ ዮሱሲ አሳስ ሌሚሶራ “ኢሳዴይ ዎይኔ ሚስ ቶኪዴስ፤ ጋዴ ጎዩዛይታስ ኪራ ኢሚዲኔ ሃራ ዴሬ ቢዲ ሄን ጋምዲዴስ። * 10 ካጊዛ ቦኔ ዎዴ ካሳፌ ኤኪ ያና ማላ ባ አሽካራታፔ ኢሳዴ ጋዴዛ ጎይዳ አሳታኮ ዮዲን ጋዳ ጎዩዛይቲ ኪታ ቢዳይሳ ቆፃዲ ሚላ ኩሺ ዮዲዳ። 11 ካሌሲዲካ ሃራ አሽካራ ዮዲን ጎሻንቻቲ ሃዲካ አይኪ ቆፃዲኔ ካዉሺዲ ሚላ ዮዲዳ። 12 ሃዲካ ካሌሲዲ ሄሻንሶ አሽካራ ዮዲን ጎሻንቻቲ ኢዛካ ቆፃሬሲ ማዱንሲዲ ጌዴ ካሬ ኬሲ ዮጊዳ።

13 “ዎይኔ ሚሳ ጎዳይ ሃዲ አይ አሶ? እኔ ኤሪዛይ ታ ኬሃ ሲቂዛ ታ ናዛ ዮዲዳኮ ኢዛ ቦንቻንዴቶሻ?” ጊዴስ።

14 “ጊዶ አቲን ቢታ ጎዩዛይቲ ናዛ ቤዩዳ ማላ ባ ጊዶን ሃይሲ ኢዛ ላታና ናዛ ጊዴኔ? ሃ ዩቲ ኢዛ ዎዲዲ ቢታ ላቶስ” ጊዲ ዞሬቲዳ። 15 ዎዩኔ ሚሳ ቶኪዳሶፔ ጌዴ ካሬ ኬሲዲ ናዛ ዎዲዳ። ሂስቲኮ ሃዲ ዎይኔ ሚሳ ጎዳይ ሃ አሳታ ዎስታኔ? 16 ዩዲኔ ሄ ጎሻንቻታ ዳይሳና፤ ዎይኔ ሚሳ ቶኪዛሶዛ ሃራታስ ኢማና” ጊዴስ። ዴሬይካ ሄሳ ኢዚ ጊዳይሳ ሲይዲ “ሃይሳ ማላይ ሃኖፖ” ጊዴስ።

* 20:9 ኢላ 5:1

17 ዮሴፍ ለሁሉም “ኢስታኮ ያሊዲ ሂስቲን ሹቻን ከሌ ከዚዛ አሳቲ ሌቂ አጊዳ ሹቻይ ከላስ ዋና ሁዔ ጊዳና” ጌቲቲዲ ዓሬቲዳ ሌሚሶዛስ ቢርሼሳይ አዜ?” ጊዴስ። * 18 ሃ ሹቻ ቦላ ኩንዲዳይ ወሪ ሹቻን ቆዩታና፤ ሹቻይካ ኢዛ ቦላ ዎዲዳይ ወሪካ ሊቃና” ጊዴስ።

ጊራ ቃንዎ ጊሻስ ሸቂዳ አይሻ

19 ዓሬቲኔ ቁሴታ ሃላቃቲ ሄሲ ሌሚሶዚ ኢስታ ቦላ ሃላዬቲዳይሳ ኤሪዲ ሄራካ ኢዛ አይካናስ ኮይዳ ሸን ዴሬዛስ ባቢዳ። 20 ዮሴፍ ዎልቃራ ሃሪዛይታስ አሲ ኢሚናስ ኢዛ ዱናፔ ከዚዛ ባላ ቃላ ዴሚዲ አይካናስ ካሊ ካሊ ናጊዳኔ ዒሎ አሳ ሚሳቲዲ ኢዛ ካሊ ኢዛ ዱናፔ ዮዎ ናጊዛ አሳታ ኢዛኮ ዮዲዳ።

21 ኢዛ ዱናፔ ዮዎ ኮዬዛ አሳቲ ዮሴፍ “አስታማሬ! ኔኔ ቱማ ሃሳዬዛይሳኔ ቱማ ታማርሲዛይሳ ቃሴካ ያሳ አጌ ኔ ቱሙ ታማርሲዛይሳኔ እናካ ሻካ ማዶንታይሳ ኑ ኤሮስ። 22 ጊዶ አቲን ቁሳሬስ ጊራ ጊራናስ ቤሲዜ? ቤሴኔ?” ጊዲ አይቺዳ።

23 ኢዚካ ኢስታስ ዲዛ ጌኔ ቆፋ ኤሪዲ። 24 “አኔ ኢሲ ዲናሬ ታና ቤሲቱ፣ ሃይሲ ኢዛ ቦላ ዲዛ ሜዳዚኔ ዓሬቶይሲ እናይሴ?” ጊዴስ። ኢስቲካ “ቁሳሬይሳ” ጊዳ።

25 ኢዚካ ዛሪዲ ኢስታስ “ቁሳሬይሳ ቁሳሬስ፣ ያሳይሳ ያሳስ ኢሚቱ” ጊዴስ።

26 ሄሳ ጊሻ ኢዚ ሃሳዬዳ ቃላፔ ኤኪዲ አሳ ሲንሳን ኢዛ ቃዓናስ ዳንዳይቤቱና፤ ኢዚ ኢሚዳ ቃላን ማላሌቲዲ ጮው ጊዳ።

ሃይቂዳይታ ዴንሳ ጊሻ

(ማቶ 22: 23-33፤ ማር 12: 18-27)

27 ሃይቂዳይታ ዴንሲ ባዋ ጊዛ ሳዱቃዎታፔ ኢሲ ኢሲ አሳቲ ዮሴፍኮ ዩዲ አይሻ ሸሸዳ። * 28 “ጎዶ! ‘ኢሳዴይ ማቾ ኤኪዲ ና ዮሎንታ ሃይቂኮ ሄ ሃይቂዳይሳ ማቼዮ ኢዛ ኢሻይ ኤኪዲ ባ ኢሻ ሳታና ና ኢዛስ ዮሎ” ጊዲ ሙሴይ ኑስ ዓሬዴስ። * 29 ሂስቲን ላፑን ኢሻቲ ዴቱስ ሸን ኢስታሬ ባይራይ ማቺዲ ና ዮሎንታ ሃይቂዴስ። 30 ኢዛ ካሎዚካ ኢዛሳ ሃይቂዴስ፤ 31 ሄቫንሶዚካ ኢዛ ኤኪዴስ፤ ላፑናቲ ወሪካ ሄ ማጫሳዮ ኤኪዲ ወሪካ ና ዮሎንታ ሃይቂዳ። 32 ወርሴሳን ማጫሳዮ ሃይቃዱስ። 33 ላፑናቲካ ሃ ማጫሳዮ ኤኪዳ ሸን ሃ ማጫሳዮ ወርሴሳን ሃይቂዳይቲ ዴንዲዛ ዎዴ ኢዛ አዋይሳ ማቾ ጊዳኔ?”

34 ዮሴፍ ኢስታስ “ሃ ዴሬ ናይቲ ጌሌቲሲኔ ኤኬቱስ። 35 ቡሮ ያና አላሜን ሃይቂዳይታ ዴንሳ ዴማናስ ቤሲዛይቲ ጊዲኮ ጌሌቱናኔ

* 20:17 ማዘ 118:22 * 20:27 ሃዋ 23:8 * 20:28 ዛሬ 25:5

ኤኬቴና። ³⁶ ኢስቲ ኪታንቻታ ማላ ጊዳና ጊሽ ሄሳፌ ጉዬ ሃይቁቴናኔ ሃይቆፔ ዴንሳ ናይታ ጊዲዳ ጊሽ ኢስቲ ያሳ ናይታ።
³⁷ ሙሴይ ቁር ዎራ ጊሽ ፃፌቲዳ ታሪኬዛን ጎዳ ‘አብራሃሜ ያሳ፣ ዩሳቃ ያሳ ያቆቤ ያሳ’ ጉሳን ሃይቁዳይቲ ዴንዳናይሳ ቤሴስ። *
³⁸ ወሪካ ኢዛስ ዴይይ ዲዛ ጊሽ ኢዚ ፓፃታ ያሳፌ አቲን ሃይቁሳታ ያሴ ጊዴና” ጊዴስ።

³⁹ ኢሲ ኢሲ ፃፌቲ “አስታማሬ! ሎዎ ጋዳሳ” ጊዳ።
⁴⁰ ሄሳፌ ጉዬ አይ አሲካ ኢዛ አይቻናስ ፃሊቤና።

የሳይ ቲዩዳይሳ ጊሽ ሺቂዳ አይሻ
 (ማቶ 22:41-46፤ ማር 12:35-37)

⁴¹ ሄሳፌ ጉዬ ዮሱሲ “አሳይ ማሲሄ ዋኒዲ ኢዚ ዳዉቴ ና ጊኬ? ⁴²⁻⁴³ ጋሶይካ ዳዉቴይ ባ ፃፌዳ ማዛሙሬ ማፃፋታን ‘ታ ኔ ሞርኬታ ኔ ቶሆ ጋርስ አሳና ጋካናስ ጎዳይ ታ ጎዳ ኔ ታ ኡሻቻን ኡታ’ ዋኒዲ ጊዴ? * ⁴⁴ ሂስቲኮ ዳዉቴይ ኢዛ ‘ጎዳ’ ጊ ዩይጊሼ ዋኒ ኢዛስ ና ጊዳኔ?” ጊዴስ።

⁴⁵ ዴሬይ ወሪ ሲዩሺን ባና ካሊዛይታስ ⁴⁶ “ጎሼቲዛ አዳሳ ቃምሴ ማይዲዲ ዩሼ ዶሲዛይታፔኔ ጊያይ ዲዛሶን ሳሮኬቴስ ኮዩዛይታፔኔ አይሁዳ ዎሳ ኬሳን ዶቃ አይዴኔ ዲጊሳሶን ቦንቾሶ ኮዩዛይታፔ ፃፌታፔ ናጌቲቴ። ⁴⁷ ሃይታንቲ አምጫታ ኬሳ ካሎሲዛይታ። አሲ ኢስታ ቤያና ማላ ዎሳ አዳሴቴስ፤ ሄይታንታ ኢታ ፐርዳይ ናጌስ” ጊዴስ።

21

አምጫይ ኢሞታ
 (ማር 12:41-44)

¹ ዮሱሲ ዶቁ ጊ ዩሊሺን ዱሬ አሳቲ ያሳ ኬሴን ሙፁዎታ ኢዛን ሺሺዛይሳ ጊዶን ሙፁዎታ ዩጊሺን ቤይዴስ። ² ቃሴካ ኢሲ አምዎ ዲዛራ ናምዑ ሲኪና ጊዲዛ ናምዑ ፃርቁማላ ሄ ሙፁዎታ ኢዛን ሺሺዛይሳን ዩጊሺን ዩሊዲ፣ ³ “ታ ኢንቴስ ቱሙ ጋይስ፤ ሃና አምጫ ዩቱ ባ አሳፔ ቦላራ አዴስ ኢማዱስ ጊዴስ። ⁴ ሃይቲ አሳቲ ኢሚዳይ ባስ ዲዛ ቲርፓፌ ጊዲሺን ኢዛ ጊዲኮ ባስ ባይንዳ ዎልቃፌ ባስ ዲዛሮኔ ባ ዱሳስ ኮሺዛሮ ወርሳ ዩጋዱስ” ጊዴስ።

የሳ ኬሴ ላሌታናይሳ ዮሱስ ካሴቲዲ ዮቲዴስ
 (ማቶ 24:1-2፤ ማር 13:1-2)

⁵⁻⁶ ኢዛ ካሊዛይታፔ ኢሲ ኢሲ አሳቲ ያሳ ኬሳይ ሎዎ ሹቻኒኔ አሳይ ኢሚዳ ኢሞታን አይ ማላ ሎዲ ኬዩቲዳኮ ጊዲ ባ

* 20:37 ኬሳ 3:6 * 20:42-43 ማዛ 110:1

ጊደን ሃሳቦቶቹን ይሰሉ ሲይዱ “ሃይሲ ኢንቴ ቤዩዛይሲ ወሪ ላሌቶንታ ሹቺ ሹቻ ቦላ ኬሌቲዳ ማላ አቶንታ ዎዴይ ያና” ጊዴስ።

7 ኢስቲካ ኢዛ “አስታማሬ! ሃይሲ ወሪ አይዴ ሃናኔ? ቃሴ ሃይሲ ሃናናይሳስ ማላታይ አዜ?” ጊዴ አይቺዳ።

8 ኢዚካ ኢስታስ “ኢንቴ ባሌቶንታ ማላ ናጌቲቴ፤ ዳሮቲ ባና ‘ታ ኪርስቶስ! ዎዴይካ ማቲዴስ’ ጊሼ ታ ሱንሳራ ያና ሺን ኢንቴ ኢስታ ካሎፍቴ። 9 አላ ጊሺኔ ዴሬ ማካላቴሳ ጊሽ ሲዩዛ ዎዴ ዳጋሞፍቴ። ሄሲ ወሪ ካሴቲዲ ሃናናስ ቤሴስ፤ ወርሴሴ ጋኪዴስ፤ ጊዶ አቲን ሄራካ ሃኔና” ጊዴስ።

10 ቃሴ “ዴሬይ ዴሬ ቦላ፣ ካዎይ ካዎ ቦላ ዴንዳና። 11 ቢታይ ዎልቃማ ቃስ ቃፃና፤ ኮሻይኔ ቦሻይ ዱማ ዱማሶን ሃናና፤ ዳሮ ባቢሲዛዚኔ ሳሎፕ ጊታ ማላታይ ቤታና።

12 “ሄሲ ወሪ ሃናናፕ ካሴቲዲ አሳይ ኢንቴና አይካናኔ ጎዳና፤ አይሁዳ ዎሳ ኬሴኔ ቃሾ ኬሴ ጌልሳና፤ ካዎታ ሲንሴኔ ዳናታ ሲንሳ ሺሻና። ሄሲ ወሪ ታ ሱንሳ ጊሽ ኢንቴ ቦላ ጋካና። 13 ሄሲ ወራካ ማርካታናስ ሎዎ ቃዳ ጊዳና። 14 ሄሳ ጊሽ ኑና አይቺዛይታስ ኑ አይ ዛሪኖ? ጊዴ ካሴቲዲ ሂርጎንታ ማላ ሃይሳ ዎዝናን ዎሴቴ።

* 15 ኢንቴ ሞርኬታፕ አኒካ ኢንቴናራ ኤቁታናሲኔ ባሌሳናስ ዳንዳዮንታ ቃላኔ ጪንጫቴስ ታ ኢንቴስ ኢማና። 16 ኢንቴና ዩሊዳይቲኔ ኢንቴ ኢሻቲ፣ ኢንቴ ዳቦቲኔ ኢንቴ ላጌቲ ወሪ ኢንቴና አሴ ኢማና፤ ኢንቴሬ ባጋታ ዎዳና። 17 ታ ሱንሳ ጊሽ ኡባ አሳ አቻን ኢንቴ ኢዪታና። 18 ጊዶ አቲን ኢንቴ ሁዔ ቢናናታፕ ኢሲናካ ዳዩኩ። 19 ኢንቴ ሚኒ ኤቂኮ ኢንቴ ሹምፖ ኢንቴ አሻና።

**ዩሱሲ ዩሩሳላሜ ዳዮ ጊሻስ ካሴቲዲ ዮቲዴስ
(ማቶ 24:15-21፤ ማር 13:14-19)**

20 “አላ አሳይ ዩሩሳላሜ ጊዶሲሺን ቤይኮ ኢዚስ ዳዩዛ ዎዴይ ማቲዳይሳ ኤሪቴ። 21 ሄ ዎዴ ዩሁዳን ዲዛይቲ ፑዴ ዙማ ቦላ ጋንጌቶ፤ ካታማን ዲዛይቲካ ካታማፕ ኬዚቴ፤ ዴሬ ጊደን ዲዛይቲካ ሄ ካታማዮ ጌሎፕቶ። 22 ዓሬቲዳይስ ወሪ ፖሌታናስ ሃና ሃሎ ኬሲዛ ዎዴ። * 23 ቢታ ቦላ ጊታ ሜቶይ ሃናና፤ ሃይሳ ዴሬዛ ቦላ ሃንቆይ ያና፤ ሄሳ ጊሽ ሄ ዎዴ ቃንሳራ ዲዛ ማጫሳታሲኔ ዳንሲዛ አዩታስ አዩ አና! 24 ባጋ አሳይ ማሻን ሃይቃና፤ ባ ዴሬፕ ሃራ ዴሬ ዲዔታና፤ ዩሩሳላሜይካ ዖሴ ኤሮንታ ዴሬታ ዎዴይ ፖሌታና ጋካናስ፣ ዖሴ ኤሮንታ አሳታን ዩዴቲዳሮ ጊዳና።

* 21:14 ሉቃ 12:11-12 * 21:22 ሆሴ 9:7

**አሳ ና ናምዓንን ጸላ ጊሽ
(ማቶ 24:29-31፤ ማር 13:24-27)**

25 “አዋ አርሼ ቦላ፣ አጊና ቦላ፤ ለጊዜ ለሌሎች ጊዜ ማላታይ ቤታና፤ አባሬሬ አባ ዳምባላ ጊሪሳሬ ዴንዲዳይሳን ቢታ ቦላ ዲዛ ዴሬይ ሂርጋና፤ ሜቶቲታና። * 26 ሳሎ ዎልቃማቲ ቃዲዛ ጊሽ አሳይ ቢታ ቦላ አዜ ሃናኔሻ ጉሳኒኔ ናንን ፃላ ዳቡራና። 27 ሄ ዎዴ አሳ ናይ ዎልቃራ፣ ጊታ ቦንቾራ፤ ሻራራ ዩሺን ቤያና። * 28 ኢንቴካ ሃይቲ ሃ ታ ጊዳይቲ ፖሎቴስ አይኪሺን ኢንቴስ አቴሳ ዎዴይ ማቲዳ ጊሽ ሲቲ ጊ ኤቂቴ፤ ኢንቴ አይሬ ወዴ ዶቂ ሂስቲቴ” ጊዴስ።

ጎዳ ዩሳ ማላቲዛ ባላሴ ሚሳይ ሌሚሶ

29-30 ካሌሲዲ “ባላሴ ሚሳይ ሃራ ሚሳታ ወርሲ ያሊቴ፤ ሄ ሚሳቲ ሃይሴ ኬሲሺን ኢንቴ ቤዩዛ ዎዴ ቦይይ ማቲዳይሳ ኢንቴ ኤሬታ። 31 ሄሳሳካ ሃይታንቲ ጌቴቲዳይቲ ፖሎቴሺን ኢንቴ ቤዩዛ ዎዴ ያሳ ካዎቴሲ ኢንቴኮ ማቲዳይሳ ኤሪቴ።

32 “ታ ኢንቴስ ቱሙ ጋይስ፤ ሃይሲ ወሪ ፖሎታና ጋካናስ ሃ ዩሌታይ አዴና። 33 ሳሎይኔ ሳዓይ አዳና ሺን ታ ቃላይ አዴና።

34 “ሂስቲኮ ዎጋይ ባይንዳ ዱሳን፣ ዳሮ ኡሻኒኔ ዱሳስ ሂርጋን ኢንቴ ዎዝናይ ዳቡሮፖ፤ ሄሳ አሳንታ ኢዲኮ ሄ ጋላሳይ ኢንቴ ቆፖንታ ናርፃ ማላ ኢንቴ ቦላ ጋኮንታ ማላ ናጌቲቴ። 35 ሃይሲ ቢታ ቦላን ዲዛ አሳ ኡባ ቦላ ጋካና። 36 ሄሳ ጊሽ ቡሮ ያናይሳሬ ኢንቴ ኬሲ ኤካና ማላ፤ አሳ ና ሲንላን ኤቃናስ ዳንዳያና ማላ ኡባ ጋላስ ሚኒዲ ዎሲቴ” ጊዴስ።

37 ዩሱሲ ጋላስ ጋላስ ያሳ ኬላን ታማርሲ ታማርሲዲ አማርስ አማርስ ዳብራዛይቴ ጌቴቲዛ ዙማ ቦላ ኬዚ ኬዚ አቄስ። *

38 አሳይ ወሪካ ኢዛፔ ሲያናስ ማላዶ ዎንታራ ዩሱሳኮ ያሳ ኬሌ ዩስ።

22

**ዩሱሳ ቦላ ማቄቲዳ ማቆ
(ማቶ 26:1-5፤ 14:16፤ ማር 14:1-2፤ ዮሃ 11:45-53)**

1 ሄ ዎዴ ፓዚጋ ጌቴቲዛ ኡኬሳራ ቦንቾቲዛ ባዓሌይ ማቲ አቲዴስ። * 2 ቄሴታ ሃላቃቲኔ ፃፌቲ ሃንኮ ዴሬ አሳስ ባቢዛ ጊሽ ዩሱሳ ዳይሳና አጌ ኮይዳ።

* 21:25 ኢሳ 13:10፤ ሂዘ 32:7፤ ኢዩ 2:31፤ አጁ 6:12-13 * 21:27 ዳኔ 7:13፤ አጁ 1:7 * 21:37 ሉቃ 19:47 * 22:1 ኬሳ 12:1-27

የሁዳይ ዮሱሳ አሲ ኢማና ዞሬቲዴስ
(ማቶ 26: 14-16፤ ማር 14: 10-11)

³ ዮሱሳ ካለዛ ታማኔ ናምዓታፔ አስቆርንቶ ደሬ አሳ የሁዳ ጌቲቲዛይሳን ፃላዔይ ጌሊዴስ። ⁴ የሁዳይካ ቄሴታ ሃለቃታኮኔ ያሳ ኬሳ አሳፌታኮ ቢዲ ኢስታስ ዮሱሳ ዎስት አሲ ኢማናኮኔ ኢስታራ ሃሳዮቲዴስ። ⁵ ኢስቲካ ሄሳን ኡፋዮቲዲ ሚሼ ኢማናስ ኢዛራ ጊጊዳ። ⁶⁻⁷ የሁዳይካ ኢስታ ቆፋ ዶሲዴስ፤ ዮሱሳ ኢስታስ አሲ ቤዮንታ አሲ ኢማናስ ኢንጄ ዎዴ ናጊሺን ፓዚጋ ዶርሳ ሹኪዲ ኡኬሳራ ቦንቺዛ ባዓሌ ጋላስ ጋኪዴስ።

ዮሱሲ ባና ካሊዛይታራ ፓዚጋ ካዎ ሚዴስ
(ማቶ 26: 17-25፤ ማር 14: 12-21፤ ዮሃ 13: 21-30)

⁸ ዮሱሲካ ባና ካሊዛይታ “ፓዚጋ ካዎ ማናስ ቢዲ ኑስ ጊጊሲቲ” ጊዲ ጴጆርሳኔ ዮሃንሳ ኪቲዴስ።

⁹ ኢስቲካ “ኑ አዋን ጊጊሳና ማላ ኮያይ?” ጊዳ።

¹⁰ ኢዚካ ዛሪዲ “ኢንቲ ጌዴ ዮሩሳላሜ ካታማ ጌሊሺን ሃላ አቶ ቶኪዳ አሲ ኢንቲና ዴሚና፤ ኢንቲካ ኢዚ ቢዲ ጌሊዛ ኬሴ ጋካናስ ኢዛ ካሊቲ። ¹¹ ኬሳዴዛስ ‘አስታማሬይ ታና ካሊዛይታራ ፓዚጋ ካዎ ማናስ ኢማላ ኬሴ አዋን ዲዜ?’ ጌስ ጊቲ። ¹² ኢዚካ ኢማላስ ጊጊቲዳ አሆሶ ኢንቲና ቤሳና፤ ኢዚ ቤሲዛ ሶን ጊጊሲቲ” ጊዴስ። ¹³ ኢስቲካ ቢዲ ዮሱሲ ጊዳ ማላ ኬሳ ዴሚዲ ፓዚጋ ሄን ጊጊሲዳ።

ጎዳ ካዎ ኤኮ ዎጋ
(ማቶ 26: 26-30፤ ማር 14: 22-26፤ 1ቆሮ 11: 23-25)

¹⁴⁻¹⁵ ዎዴይ ጋኪዳ ማላ ዮሱሲ ሃዋሬታራ ቁማ ማዳን ኡቲዲ “ታ ዋዬ ቤያናፔ ካሴታዳ ሃይሳ ፓዚጋ ኢንቲናራ ኢሲፌ ማናስ ኬሂ አዋታዲስ። ¹⁶ ታ ኢንቲስ ቱሙ ጋይስ፤ ያሳ ካዎቲሳን ሃይሳ ቢርሼሲ ፖሌታና ጋካናስ ሃይሳ ፓዚጋ ናምዓንሶ ታ ኢንቲናራ ሚኪ” ጊዴስ።

¹⁷ ዎይኔፔ አሴቲዳ ኡሻ ፀዓራ ኤኪዲኔ ያሳ ጋላቲ ሲሚዲ “ሄይቲ፤ ዉሪካ ኢዛፔ ኡይቲ” ጊዲ ኢስታስ ኢሚዴስ። ¹⁸ “ታ ኢንቲስ ቱሙ ጋይስ፤ ሃይሳፌ ጉዬ ያሳ ካዎቲሳ ያና ጋካናስ ናምዓንሶ ሃ ዎይኔ ኡሻፌ ኡዩኬ” ጊዴስ።

¹⁹ ኡኬሳ ኤኪዲ ያሳ ጋላቲዴስ። ኢዛፔ ኢስታስ ሚንሲ ኢሚዲ “ሃይሲ ኢንቲ ጊሽ ኢሜታና ታ አሾ ሌሚሶ ጊዲዛ ጊሽ ሃይሳ ኡባ ዎዴ ታና ቆፓናስ አሲቲ” ጊዴስ። ²⁰ ኢዛሶካ ካዎፔ ጉዬ ኡሻ ፀዓ ዴንሲዲ “ሃይሲ ኡሻይ ኢንቲ ጊሽ ታ ሱሳን ሃናና አራስ ጫቆ ዎጋ። *

* 22:20 ኤር 31: 31-34

21 “ጊዶ አቲን ታና አሲ ኢማናዴ ኩሼይ ታ ኩሼራ ኢሲፌ ማዳን ዴስ። * 22 አሳ ናይ ካሴቲዲ ኢዛ ጊሽ ሃናናይሲ ዉሪ ኡቲዳ ማላ ኢዚ ባና፤ ጊዶ አቲን ኢዛ አሲ ኢሚዛዴስ አዩ-አና” ጊዴስ።

23 ኢስቲካ ሄሳ አላናይ አኔ? ጊዲ ባ ጊዶን ኢሶይ ኢሳ አይሼሬሲዳ።

24 ቃሴካ “አኒ አናፔ አዲዛኮኔ” ጊዲ ባ ጊዶን ኢሶይ ኢሳራ ፓላሜቲዳ። * 25 ዩሱሲካ ኢስታ “ዴሬ ሃሪዛ ካዎቲ ባ ዴሬ አሳ ዎልቃራ ሃሬቴሲኔ ኢስቲካ ሎዎ ካዎታ ጌቴቲዲ ዪይጌቴቴስ። *

26 “ኢንቴ ጊዲኮ ሄሳሶ ሃኖፒቴ፤ ኢንቴሬ ጊታ ጊዲዳዴይ ዎይኮ ታ አፕካ አዳይስ ጊዛ አሲ ኡባሬ ቁሪ ና ማላ ጊዶ፤ ሃሪዛዴይ ሃሬቲዛዴ ማላ ጊዶ። * 27 ቁማ ኡቁዲ ሚዚዳዴሬኔ ኡቲዲ ሚዛዴሬ አኒ አዲዜ? ኡቲዲ ሚዛዴ ጊዴኔ? ታኒ ቃሴ ኢንቴ ጊዶን አሽካራ ማላ ዳይስ። *

28 “ኢንቴን ጊዲኮ ታፔ ሻኬቶንታ ታ ዋዩሺን ታ ማታን ኡቁዳይታ። 29 ታ አዋይ ታና ካዎሲዳይሳ ማላ ታኒካ ታ ካዎቴላን ኢንቴና ካዎላና። 30 ሄሲካ ታ ካዎቴላን ታ ማዳሬ ኢንቴ ማና ማላኔ ኡያና ማላ። ቃሴካ ታ ካዎቴላ አልጋን ኡቲዲ ታማኔ ናምዑ ኢስራዬሌ ናይታ ቦላ ፒርዳናሳ” ጊዴስ። *

**ጳፅሮሲ ኢዛ ካዳናይሳ ዩሱሲ ካሴቲዲ ዮቲዴስ
(ማቶ 26:31-35፤ ማር 14:27-31፤ ዮሃ 13:36-38)**

31 ቃሴካ ዩሱሲ ሲሞና ዪይጊዲ “ሲሞና! ሃላዔይ ኢንቴና ጊስቴ ማላ ሱራጋናስ ዎሲዴስ። 32 ጊዶ አቲን ታኒ ኔፔ አማኖይ ዳዮንታ ማላ ኔ ጊሽ ያሳ ዎሳዲስ፤ ኔካ ሲሚዳ ዎዴ ኔ ኢሻታ ሚንሴላ” ጊዴስ።

33 ሲሞናካ ዛሪዲ “ንዶ! ታ ኔናራ ቃሼታናሲኔ ሃይቃናስ ጊጋ ኡታዲስ” ጊዴስ።

34 ዩሱሲካ ዛሪዲ “ጳፅሮሳ ሃች ኩቶይ ኢሲቶ ዋሳናስ ‘ታ ኢዛ ኤሪኬ’ ጋዳ ሄሹቶ ኔ ታና ካዳና” ጊዴስ።

35 ቃሴካ ዩሱሲ ኢስታ “ታ ኢንቴና ካሴ ጫማይ፥ ኮሮጀይኔ ቃራጊቴ ባይንዳ ኪቲዳ ዎዴ ኢንቴስ አዚ ፓጩዴ?” ጊዲ አይቺዴስ። ኢስቲካ “አይኮይካ ፓጩቤና” ጊዳ። *

36 ኢዚካ ዛሪዲ “ሃዲ ጊዲኮ ኮሮጀካ ቃራጊቴይካ ዲዛዴይ አይኮ፤ ጊሳ ማሻይ ባይንዳዴይ ባ ማይዎ ባይዚዲ ሻሞ። 37 ታ

* 22:21 ማዛ 41:9 * 22:24 ማቶ 18:1፤ ማር 9:34፤ ሉቃ 9:46
* 22:25 ማቶ 20:25-27፤ ማር 10:42-44 * 22:26 ማቶ 23:11፤ ማር 9:35 * 22:27 ዮሃ 13:12-15 * 22:30 ማቶ 19:28 * 22:35 ማቶ 10:9-10፤ ማር 6:8-9፤ ሉቃ 9:3፤ 10:4

ኢንቴስ ቱማ ጋይስ ማካላታራ ኢዚ ኢሲፌ ታይቤቲዴስን ጌቲቲ ካሴ ፃፌቲዳ ቃላይ ታ ቦላ ፖሌታና ቤሴስ፤ ታ ጊሽ ፃፌቲዳይሳስ ፖሎይ ቱማፕ ጋኪዴስ” ጊዴስ። *

38 ኢዛ ካሊዛይቲ ቃሴ “ጎዶ! ሄኮ ናምዑ ጊሳ ማሻቲ ሃይሳን ዴቲስ” ጊዳ። ኢዚካ ኢዛ ጊሽ “ሃይሲ ጊዳና” ጊዴስ።

39 ካሴ ኢዛስ ሎሴ ጊዲዳ ማላ ፑዴ ዳብራዛይቲ ጌቲቲዛ ዙማ ቦላ ኬዚ ቢዴስ። ኢዛ ካሊዛይቲካ ኢዛ ካሊ ቢዳ። 40 ሄ ጋኪዳ ማላ “ኢንቴ ፓጩን ጌሎንታ ማላ ዎሲቲ” ጊዴስ። 41 ዩሱሲ ባና ካሊዛይታፕ ኣሲ ሹች ኦሊዲ ጋላናሶ ማላ ሃኪ ቢዲ ጉልባቲ ዎሲዴስ። 42 “ታ ኣዎዉ! ኔ ሼኔ ጊዲኮ ሃኖ ሜቶቶ ታፕ ዲጋ፤ ጊዶ ኣቲን ኔ ሼኔይ ሃኖፕ ኣቲን ታ ሼኔይ ሃኖፕ” ጊዲ ዎሲዴስ። 43 ሳሎፕ ኪታንቻይ ቆንጩዲ ዩሱሳ ሚንሴሲዴስ።

44 ኢዚካ ኬሂ ፀጌቲዲ ዎሲሺን ኢዛ ኣሳቴሳፌ ጫዎይ ሱሳ ማላ ጉኪዴስ።

45 ዎሳፕ ዴንዲዲ ባና ካሊዛይታኮ ቢዴስ። ኢስቲካ ኢዛስ ሚሹቲዲ ቆፒሺን ዲስኮይ ኤፊዳሼ ዩሱሲ ኢስታኮ ዩዲ፥

46 “ኣይስ ዲሲኬቲ? ኢንቴ ፓጩን ጌሎንታ ማላ ሃዲ ዴንዲዲ ዎሲቲ” ጊዴስ።

ዩሱሲ ኣዲ ኢሜቲዴሲኔ ኦይኬቲዴስ

(ማቶ 26: 47-56፤ ማር 14: 43-50፤ ዮሃ 18: 3-11)

47 ኢዚ ቡሮ ሃሳዎን ዲሺን ዩሱሳ ካሊዛይታፕ ኢሶይ ዩሁዳ ጌቲቲዛይሲ ባናራ ዳሮ ኣሳ ካሌሲ ኤኪ ዩዲ ዩሱሳ ዩራናስ ኢዛኮ ሺቂዴስ። 48 ጊዶ ኣቲን ዩሱሲ ኢዛ “ዩሁዳ! ታና ኣሳ ና ዩሮን ኣሳ ኢማይ?” ጊዴስ።

49 ዩሱሳ ዩዩ ኣዲ ዲዛ ኣሳይ ሃኖዛ ሎዔሲ ጌሊዲ “ጎዶ! ሃይታንታ ማሻራ ቡሲኖ?” ጊዳ። 50 ኢስታፌ ኢሶይ ቁሴታ ኣላፌ ኣሽካራ ኡሻቻ ሃይሴ ማሻራ ቃንጊዴስ።

51 ዩሱሲ ኢስታ “ኢንቴ ሃዲ ታስ ኣጊቲ!” ጊዲ ኣሽካራ ሃይሳ ቦቺዲ ፓሲዴስ።

52 ቃሴካ ኢዛ ኦይካና ዩዳ ቁሴታ ሃላቃታ ዎሳ ኬሳ ኣላፌታኔ ጨማታ “ፓንጋ ኦይኪዛ ኣሳ ማላ ጊሳ ማሻኔ ዱርቃ ኤኪዲ ዩዴቲ? 53 ጋላስ ጋላስ ታ ኢንቴናራ ዎሳ ኬሳን ዲሺን ታ ቦላ ኩሹ ዎሲቤኬታ፤ ሃይሲ ዲማይ ካዎቲዳ ኢንቴ ዎዴ” ጊዴስ።

54 ሃሳፌ ጉዩ ዩሱሳ ኦይኪ ኤኪዲ ቁሴታ ሃላቃሶ ጌሊዳ፤ ጴፅሮሲካ ዩሱሳ ሃሆራ ካሊዴስ። 55 ኣሳይ ቁሴታ ሃላቃ ጋላን ታማ ኤሊዲ ሆዲሹ ኢሲ ቦላ ኡቲዳሼ ጴፅሮሲካ ኢስታራ ኢሲፌ

* 22:37 ኢሳ 53:12

ኡቲደስ። 56 ኢሲ ጋራደያ ጳጳሮሲ ታማ ሆሲዛይታራ ኡቲዳይሳ ቤያዳኔ ቲሺ አሳ ያላዳ “ሃይሲ አደዘካ ዮሱሳራ ደስ!” ጋዱስ።

57 ጳጳሮሲካ “ሃኔ ማጫሳዬ! ታ ኢዛ ኤሪኬ” ጊዲ ካዲደስ።

58 ጉስ ጋምሲሺን ሃራ ኢሳደይ ኢዛ ቤዱዲ “ኔካ ኢዛራ ዲዛይታፔ ኢሳ ጊዲኪ?” ጊደስ። ጳጳሮሲካ “ሃይሶ ታኔ ኢስታራ ዲኬ!” ጊደስ።

59 ኢሲ ሳቴ ማላ ጋምሲሺን ሃራ አሲ ቃሴካ “ጋሊላ አስ ጊዲዛ ጊሽ ሲደይ ባይንዳ ሃይሲ ኢዛራ ደስ” ጊደስ።

60 ጳጳሮሲካ ቃሴ “ሃይሶ ኔ ጊዛደ ታ ኤሪኬ!” ጊደስ። ሂኖ ጊ ኬሶንታ ዲሺን ኩቶይ ዋሲደስ። 61 ጎዳይካ ጳጳሮሳኮ ዮሼ ያሊን ጳጳሮሲ “ሃኛ ኩቶይ ዋሳናስ ኔ ታና ሄሹቶ ካዳና” ጊዲ ጎዳይ ካሴ ዮቶ ቃላይ ኢዛ ዎዝናን ካርፕ ጊደስ። 62 ጳጳሮሲካ ካሪ ኬዚዲ ሂቂሚዲ ዮኪደስ።

63 ዮሱሳ ቃቺዲ ናጊዛ አሳቲካ ኢዛ ቦላ ቂዲ ቂዲ ካዲሺ ሾጩሬሲዳ። 64 ኢዛ አይሬ ጎዚዲ “ኔ ናቤ ጊዲኮ ኔና ሾጩዳይ አናኮኔ አኔ ኤራ!” ጊዲ አይቺዳ። 65 ሃራ ዳሮ ጫሻ ቃላራ ካዉሺዳ።

ዮሱሳ አይሁዳታ ፐርዳ ዱላታ ሲንስ ኤፊዳ (ማቶ 26:59-66፤ ማር 14:55-64፤ ዮሃ 18:19-24)

66 ጋደይ ዎንቲን ደሬ ጩማቲ፣ ቁሴታ ሃላቃቲኔ ሙሴ ዎጋ ታማርሲዛይቲ ዱላታ ሺቂዲ ዮሱሳ ዱላታኮ ሺሺዳ። 67 ኢስቲካ ዮሱሳ “ኔ ኪርስቶስ? አኔ ኑስ ዮታ” ጊዳ። ዮሱሲካ “ታ ኢንቴስ ዮቲዳኮካ ታና አማኔኬታ። 68 ታ ኢንቴና አይቺዳኮ ታስ ዛሬኬታ። 69 ጊዶ አቲን ሃዲፔ ዶሚዲ አሳ ናይ ዎልቃማ ያሳ ኡሻቻን ኡታና” ጊደስ።

70 ሄ ዎደ ዉሪካ “ሂስቲን ኔ ያሳ ና?” ጊዲ አይቺዳ። ኢዚካ “ታ ያሳ ና ጊዲዳይሳ ኢንቴካ ጌታ” ጊደስ። *

71 ኢስቲካ “ሄኮ ኢዚ ባ ዱናራ ማርካቲሺን ኑ ሃይሳራ ሲይደስ፤ ሃይሳሬ ሃራ ማርካ አዛስ ኮሺዜ?” ጊዳ።

23

ዮሱሲ ጲላዎሳ ሲንስ ሺቂደስ (ማቶ 27:1-2፤ 11-14፤ ማር 15:1-5፤ ዮሃ 18:28-38)

1 ሄን ሺቂዳ አሳይ ዉሪ ደንዲዲ ዮሱሳ ጲላዎሳኮ ኤኪ ቢደስ። 2 “አይስ ኑ አሳይ ቁሳሬስ ጊራ ጊሮንታ ማላ ባሌሴሺኔ ባና ‘ታኔ

* 22:70 ያሳ ና? ጊዛ አይሻይ ኢሲ ኢሲ ባጋ ጋሞሶ ቃላን ያሳ ናይ? ጌቴሴ።

ኪርስቶስ ካዎ” ጊዲ ባሌሲሺን ሃይሳ አደዛ ደሚዶስ” ጊዲ ሞቲዳ።

3 ጲላዎሲካ ዮሱሳ “ኔኒ አይሁዳታ ካዎ?” ጊዲ አይቺደስ። ዮሱሲካ ዛሪዲ “ኔ ጊዳ ማላ” ጊደስ።

4 ጲላዎሲካ ቁሴታ ሃላቃታሲኔ ሺቂዳ አሳስ “ሃይሳ አደዛ ቦላ ኢዛ ሞቲሲዛ ኢታ ዮዖ ደማቤኬ” ጊደስ።

5 ኢስቲ ዛሪዲ “ሃይሲ አደዚ ጋሊላፔ ሃይሳ ጋካናስ ኩሜሳ ዮሁዳ ዋዩሶ ቦላ ደስ” ጊዲ ሚንሱ ዮቲዳ።

ዮሱሲ ሄርዶሳ ሲንህ ሺቂደስ

6 ጲላዎሲ አሳይ ጊዛይሳ ሲይዲ “ዮሱሲ ጋሊላ አሳኮኔ ጊዲ ሎዔሴ ኤራናስ” አይቺደስ። 7 ዮሱሲ ሄርዶሳ ካዎቴሳ ጊዶን ዲዛይሳ ሻኪ ኤራዲ ሄ ዎዴ ሄርዶሲ ዮሩሳላሜን ዲዛ ጊሽ ኢዛኮ ዮሱሳ ዮዲደስ።

8 ሄርዶሲካ ካሴ ዮሱሳ ቤያናስ ዳሮ ኮዩሼ ዲዛ ጊሽ ዮሱሳ ቤዩዲ ኬሂ ኡፋይደስ። ኢዛ ጊሽ ካሴ ሲይዲ ኢዚ አሲሺን ቤያናስ ኮይዲ ኡፋይቲደስ። 9 ዳሮ አይሻታካ ኢዛ አይሼጌቺደስ ሺን ዮሱሲ ኢዛ አይሻ ዛሪቤና። 10 ቁሴ ሃላቃቲኔ ሃፌቲ ሄን ኢዛ ማታን ኤቂዲ ኬሂ ዎርዶ ሞቶ ሞቲዳ። 11 ሄርዶሲካ ባ ዎታዳራታራ ኢሲፌ ኢዛ ካዲዳ፤ ካዎ ማይዖ ማይዚዲ ጌዴ ጲላዎሳኮ ዛሪ ዮዲደስ። 12 ሄርዶሲኔ ጲላዎሲ ካሴ ባ ጊዶን ኢሶይ ኢሳራ አሻ ሺን ሄ ጋላስ ጊጊዳ።

ዮሱሳ ቦላ ሃይቆ ፒርዳይ ፒርዴቲደስ

(ማቶ 27:15-26፤ ማር 15:6-15፤ ዮሃ 18:39-19:16)

13 ጲላዎሲ ቁሴታ ሃላቃታራ፥ ዴሬ ዳናታራኔ ዴሬ አሳ ሺሺዲ፤ 14 “ሃይሲ አደዚ አሳይ ዉሪ ማካሳና ማላ ዴንሴሴስ ጊዲ ኢንቴ ታኮ ኤሂንታ ቆርን ኢዛ አይሲዛ ኢሲ ኢታ ሚሺካ ደማቤኬ። 15 ቃሴካ ሄርዶሲ ኢሲ ኢታ ሚሺካ ኢዛ ቦላ ደሞንታ አጊዳ ጊሽ ሃ ኑኮ ዛሪ ዮዲደስ። ሃዲ ኢንቴ ቤዩዛ ማላ ኢዛ ሃይቆስ ጋሲዛ ኢሲ ኢታ ሚሺካ አሲቤና። 16 ሄሳ ጊሽ ቃፃያዳ ታ ኢዛ ዮዳና” ጊደስ። 17 ኢዚ ሄሳ ጊዳይ ኢስታ ባዓሌ ጋላስ ቃሼቲዳ አሳፔ ኢሳዴ ቢርሺዛ ዎጋይ ዲዛ ጊሻሳ። *

18 ዴሬይ ዉሪካ ኢሲ ቦላ “ባርባኔ ቢርሻዳ ሃይሳ አደዛ ዲጋ!” ጊዲ ዋሲደስ። 19 ባርባኔይ ካታማ ጊዶን አሳ ማካሳ ዮዖን ዴንሴሴዲ አስ ዎዲ ቃሼቲዳ አሳ።

* 23:17 ኢሲ ኢሲ ገሻ ማፃፋቲ ፓይዶ 17 ቦላ ዲዛ ቆፋ ጉጅቴስ፤ ቆፋዚካ ማርቆሳን ሺምፖ 15:6 ዲዛይሳ ሚሳቴስ።

20 ጲላዎሲካ ዮሱሳ ቢርሻናስ ኮይዳ ጊሽ ቃሴካ ዛሪዲ አይቺዴስ። 21 አሳይ ዛሪዲ ኢዛ “ካቃ! ካቃ!” ጊዲ ዋሲዴስ።

22 ጲላዎሲ ሄዳንገሳካ “አዛስ ካቆ? ሃይሲ አዴዚ አይ ኢታ አሲዴ? ታኒ ኢዛ ሃይቆስ ጋሲዛ ኢታ አሶ ኢዛ ቦላ ቤያቤኬ፤ ሄሳ ጊሽ ቃዓያዳ ታ ኢዛ ቢርሻ ዮዳና” ጊዴስ።

23 አሳይካ ቃላ ጶቁ ሂስቲዲ ዮሱሲ ካቆታና ማላ ጲላዎሳ ኬሂ ዎሲሼ ዋሲዳ። 24 ሄሳ ጊሽ ጲላዎሲ ኢስታ አይሾይ ፖሴታና ማላ አዛዚዴስ። 25 አሳ ማካሊሲዲ ሼምፖ ዎዲዳ ጊሽ ቃሼቲዳይሳ ቢርሻና ማላ ኢስቲ ዎሲዳዴ ቢርሺዲ ቃሴካ ዮሱሳ ኢስቲ ዶሲዳ ማላ አሴቶ ጊዲ ዴራስ አሲ ኢሚዴስ።

ዮሱሳ ካቆታስ

(ማቶ 27:31-44፤ ማር 15:21-32፤ ዮሃ 19:17-27)

26 ኢስቲካ ዮሱሳ አይኪዲ ኤኪ ቢሺን ቃሬና ጌቲቲዛ ካታማፔ ኢሲ ሲሞና ጌቲቲዛ አዴይ ሃሆፔ ዩዛይሳ ዴሚዳ ዮሱሲ ካቆታና ማስቃሌ ኮጫ ኢዚ ቶኪዲ ዮሱሳ ካላና ማላ ዎልቃሲዳ።

27 ዳሮ ዴሬይ ባ ቲራ ኢጩ ኢጩ ዮኪዛ ማጫሳቲ፥

28 ዮሱሳፔ ጉዮራ ኢዛ ካሊዳ። ዮሱሲ ኢስታኮ ሲሚ ዪሊዲ “ኢንቴ ዩፋሳላሜ ማጫሳይ ኢንቴሲኔ ኢንቴ ናይታስ ዮኪቴ አቲን ታስ ዮኮፍቴ። 29 ‘ሲንሳፌ ኢንቴ ሄኮ ማካራ ጊዲዳ ማጫሳቲ፥ ዮሎንታ ኡሎቴኔ ናይ ዳሞንታ ዳንሳቲ አንጄቲዳይታ!’ ጋና ዎዴይ ሲንሳራ ዮስ። 30 ሄ ዎዴ አሳይ ‘ዙማቶ! ኑ ቦላ ዎዲቴ፤ ቁሪ ዙማቲካ ኑና ቆቲቴ!’ ጋና።

* 31 ሂስቲን ቃዮ ሚሳ ቦላ ሃይሳሶ አሲዳይቲ ሜላ ሚሳ ቦላ ዎስታኔሻ?” ጊዴስ።

32 ኢዛራ ኢሲፌ ሃይቃና ማላ ሃራ ናምዑ ኢታ አሲዳ አሳታ ኢዛራ ኤፊዳ። 33 ቃራኒዮ ጌቲቲዛሶ ጋሲዲ ካቆዳ። ኢታ አሲዳይታፔ ኢሳ ኡሻቻ ባጋራ ኢሳ ሃዲርሳ ባጋራ ካቆዳ።

34 ዮሱሲካ “ታ አዋወ! ሃይቲ ባ አሲዛይሳ ኤሪዲ አሶንታ ጊሽ ኢስታስ አቶ ጋ!” ጊዴስ። ኢስቲካ ኢዛ ማይዎዛ ሳማ ዩጊዲ ባ ጊዶን ጊሼቲ ኤኪዳ። * 35 ሄሲ ሃኒሺን አሳይ ዉሪ ኤቁ ዪሊዴስ፤ ዳናቲካ “ኢዚ ሃራ አሳ አሺዴስ ሺን ያሳፌ ዶሬቲዳ ኪርስቶሲ ኢዛ ጊዲኮ አኔ ሃዲ ባና አሾ” ጊዲ ቁዲዳ። *

36 ዎታዳራቲካ ሺቁዲ ዎይኔፔ አጌቲዳ ጫላ ኡሻ ኡሺዲ ኢዛ ቁዲዳ። * 37 “ኔኒ አይሁዳ ካዎ ጊዲኪ? አኔ ሃዲ ኔና አሻ” ጊዳ።

* 23:30 ሆሴ 10:8፤ አጁ 6:16 * 23:34 ማዛ 22:18 * 23:35 ማዛ 22:7 * 23:36 ማዛ 69:21

38 ኢዛ ሁዔፔ ቦላ ባጋራ ማስቃሌ ኮጫ ቦላ “ሃይሲ አይሁዳታ ካዎ” ጊዛ ቃላ ፃፊ ቃጲዳ።

ዮሱሲ ናምዑ ፓገጋታራ ካቋቲዴስ
(ማቶ 27: 38-44፤ ማር 15: 27-32)

39 ኢታ አሲዲ ካቋቲዳ አሳታፔ ኢሶይ ጫሻ ቃላ ዮሱሳ ቦላ ቆቆፊዴስ። “ኔ ኪርስቶስ ጊዲኪ? አኔ ኔናካ ኑናካ አሻ” ጊዴስ።

40 ኢታ አሲዳይታፔ ኢሶይ “ኔኔ ኔስ ቤሲዛ ፐርዳ ኤካሼ ያሳስ ባበኪ? 41 ኑኔ ኑ አሲዳ ኢታ አሶስ ቤሲዳይሳ ኤኮስ፤ ሃይሲ አዴዚ ጊዲኮ ኢሲ ኢታካ አሲቤና” ጊዴስ።

42 ዮሱሳ “ኔኔ ኔ ካዎቴሳራ ዩዛ ዎዴ ታና ቆፓ!” ጊዴስ።

43 ዮሱሲካ ዛሪዲ “ታ ኔስ ቱሙ ጋይስ፤ ሃች ኔ ታናራ ጋናቴን ዳና” ጊዴስ።

ዮሱሲ ሃይቂዴስ
(ማቶ 27: 45-56፤ ማር 15: 33-41፤ ዮሃ 19: 28-30)

44 ሄሳ ዎዴ ጋዴይ ሴታ ጋላስ ሺን ቢዲ ኡዱፉን ሳቴ ጋካናስ ኩሜላ ቢታ ቦላ ዱማይ ዱሚዴስ። 45 አዎ አርሼ ፖዎይ ዳጌቲዴስ። ያሳ ኬላ ማጋላሻይካ ዳኬቲዲ ናምዑ ኬዚዴስ። *

46 ዮሱሲካ ኬሂ ዋሲዲ “ታ አዋዉ! ታኒ ታ ሼምፖ ኔ ኩሼን ኢማይስ” ጊዳ ማላ ሼምፖ ኬዚዴስ። *

47 ማቶ ሃላቃይ ሄሳ ቤዩዲ “ሃይሲ አዴዚ ቱማፔ ዊሎ አሳኮሺን” ጊዲ ያሳ ጋላቲዴስ።

48 ሄሳ ቤያናስ ሄን ሺቂዲ ዴሬይ ዉሪ ሄ ሃኒዳይሳ ቤዩዲ ቲራ ኢጪ ኢጪዲ ሲሚዴስ። 49 ጊዶ አቲን ዮሱሳ ካሴ ሎዔሲ ኤሪዛይቲ ዉሪ ቃሴካ ጋሊላፔራ ኢዛ ካሊዛ ማጫሳቲ ሄሳ ዌሊሼ ሃኪ ኤቂዳ። *

ዮሱሳ ሞጌቱስ
(ማቶ 27: 57-61፤ ማር 15: 42-47፤ ዮሃ 19: 38-42)

50 አይሁዳታ ዱላታ አሳፔ ኢሶይ ኢዚካ ዮሴፌ ጌቲቲዛይሲ ኢሲ ዳሮ ኪያኔ ዊሎ አሳ። 51 ኢዚካ ካሴ አሳይ ዮሱሳ ቦላ ዱላቲሺን ሄ ዱላታን ዴና፤ ኢዚካ ኢሲ አርማቲያሳ ጌቲቲዛ አይሁዳታ ካታማ አሳ ሺን ያሳ ካዎቴሲ ያናይሳ ናጊሼ ጋምዒዴስ። 52 ኢዚካ ጲላዎሳኮ ቢዲ ዮሱሳ አሃ ባስ ኢማና ማላ ጲላዎሳ ዎሲዴስ። 53 ጲላዎሲ ኢዛስ ኤሮ ጊን ዮሴፌይ አሃ ማስቃሌ ኮጫፔ ዎሲዳ ማላ ፃፂዲ ሹቻፌ ዎጩቲዳ ካሴ ሃራ አሲ ሞጌቶንታ ዱፎን ኤፊዲ ዎሲዴስ።

* 23:45 ኬላ 26: 31-33 * 23:46 ማዛ 31:5 * 23:49 ሉቃ 8: 2-3

54 ሄ ጋላሳይ አሳይ ሳምባታስ ጊጌቲዛ ጋላስ ጊዲዳ ጊሽ ሳምባታይ ጌላና ሃኔስ።

55 ጋሊላፔ ዴንዲዲ ዩሱሳራ ዩዳ ማጫሳቲካ ዮሴፌ ካሊ ቢዲ ዱፎዛ ቤዩዳ። ዩሱሳ አሃ ዎስት ዎሲዳኮኔ ቤዩዳ። 56 ሄፔ ሲሚዲ ሸቶኔ ቲዩዛ ሚሽ ጊጊሲዳ። ዎጋይ ጊዛ ማላ ሳምባታ ጋላስ ሽምፐዳ። *

24

ዩሱሲ ሃይቆፔ ዴንዲዴስ

(ማቶ 28፡1-10፤ ማር 16፡1-8፤ ዮሃ 20፡1-10)

1 ዎጋ ዎንታ ማላዶራ ማጫሳቲ ባ ጊጊሲዳ ሺቶዛ ኤኪዲ ዩሱሳ ዎሲዳ ዱፎዛኮ ቢዳ። 2 ሹቻይካ ዱፎዛ ዱናፔ ጌንዴሪዲ ዲዛይሳ ቤዩዳ። 3 ጊዶ አቲን ጊዶ ጌሊዲ ዩሱሳ አሃ ዴሞንታ አጊዳ ጊሽ። 4 ኢስታስ ሃንዛዚ ዳዩን ኢስቲ ቶሉ ጊዳሽ ቆፖንታ ያሊቁቲዛ ማይዎ ማይዲዳ ናምዑ አሳቲ ኢስታ አቻን ኤቂዳ። 5 ማጫሳቲካ ኬሂ ባቢዲ ዱጌ ቢታ ዪሊሺን “ሄ አሳቲ ፓዲዲ ዴንዲዳይሳ ሃይቆሳታ ጊዶን አይስ ኮዩቲ? 6 ኢዚ ዴንዲዴስ! ሃን ባዎ። ቃሴካ ኢዚ ጋሊላን ዲሽ ኢንቴስ ካሴ አይ ጊዳኮኔ አኔ ቆፐቴ። 7 አሳ ናይ ናጋራንቻታ ኩሼን አዲ ኢሜታናሲኔ ካቂታናስ፤ ሃይቆፔካ ሄዳንሶ ጋላስ ዴንዳናስ ቤሴስ” ጊዲ ዮቲ ዎሲዴስ። *

8 ማጫሳቲካ ሄ ዎዴ ካሴ ኢዚ ጊዳ ቃላ ሃሳዩዳ። 9 ማጫሳቲ ዱፎሶፔ ሲሚዲ ሄሳ ዉርሲ ዩሱሳ ካሊዛ ታማኔ ኢሲኔታሲኔ ሃራታስ ዮቲዳ። 10 ሄሳካ ሃዎሬታስ ዮቲዳይ ማግዳሌ ጊዛሶፔ ዩዳ ማራሞኔ ዮሃኖ ጌቴቲዛሪራ ያቆቤ ማራሞኔ ኢስታራ ኢሲፌ ዲዛ ሃራ ማጫሳታ። 11 ጊዶ አቲን ኢስታስ ማጫሳቲ ዮቲዳይሲ አጉሞ ሚሳቲን አማኒቤቴና። 12 ጊዶ አቲን ጴፐሮሲ ዎሳን ዩሱሳ ዱፎኮ ጋኪዲኔ ሆኪዲ ዱፎ ጊዶ ዪሊሺን ኢዛ አሃ ያዲዳ ማይዎይ ያላ ዲዛይሳ ቤዩዲ ኬሂ ማላሌቲሽ ባሶ ሲሚዴስ።

ዩሱሲ ባና ካሊዛ ናምዳታስ ቆንጨዴስ

(ማር 16፡12-13)

13 ሄ ጋላስ ኢዛ ካሊዛይታፔ ናምዳቲ ዩሩሳላሜፔ ታማኔ ኢሲ ኪሎሜቲሬ ሃኪዛ ኤማሆሴ ጌቴቲዛ ካታማ ቤቴስ። 14 ቢሽ ኢስቲ ሄ ዎዴ ሃኒዳ ዩሱሳ ሃይቆ ጊሽ ባ ጊዶን ሃሳዩቴቴስ። 15 ኢስቲ

* 23:56 ኬሳ 20:10፤ ዛሬ 5:4 * 24:7 ማቶ 16:21፤ 17:22-23፤ 20:18-19፤ ማር 8:31፤ 9:31፤ 10:33-34፤ ሉቃ 9:22፤ 18:31-33

ሃሳቦቹንን ዩሱሲ ኢስታኮ ሺቀዲ ኢስታራ ኢሲፌ ቢሺን፥
16 ኢስቲ ኢዛ ኤሮንታ ማላ ኢስታ አይፌይ አይኬቲደስ።

17 ዩሱሲ ኢስታ “ሃይሲ አጌ ሃሙቲሼ ኢንቱ ኢንቱ ጊዶን ሃሳቦቹዛይሲ አዜ?” ጊደስ። ኢስቲካ ዳጋማራ ሞዴቲሼ ሲቲ ጊ ኤቃጊዳ። 18 ኢስታ ጊደፌ ኢሶይ ቃሊዮጳ ጌቲቲዛይሲ ዛሪዲ “ሃ ማታ ጋላሳታን ዩሩሳላሜን ሃኒዳይሳ ኤሮንታ ኢማሳ አሲ ኔና ሃላ?” ጊደስ።

19 ኢዚካ ኢስታስ ዛሪዲ “አዚ ሃኒደ?” ጊን ኢስቲ ቃሴ ዛሪዲ ‘ዖሳ ሲንሳኒኔ ኡባ አሳ ሲንሳን አሶኒኔ ቃላን ሚኖ ናቤ ጊዲዳ ናዚራቴ ዩሱሳ ጊሽ’ ጊዳ። 20 ኢዛካ ቁሴታ ሃላቃቲኔ ዳናቲ ሃይቆ ፐርዳስ አሲ ኢሚዳኔ ካቂዳ። 21 ኑኒ ጊዲኮ “ኢስራጌሌ ዎዝናይ ኢዛ’ ጊዲ ኡፋዮቲዶሲሺን ሃራፔካ ሄሲ ሃኒን ቃሴ ሃቸ ሄቫንሶ ጋላሳ። 22 ቃሴ ኑ ጊደፌ ኢሲ ኢሲ ማጫሳቲ ኑና ኬሂ ማላሲሲዳ፤ ኢስቲካ ማላዶ ዎንታራ ጌዴ ኢዛ ዱፎኮ ቢዲ፥ 23 ኢዛ አሃይ ቤቶንታ ኢዲን ዩዲ ኢዚ ፓፃ ዲዛይሳ ኢስታስ ዮቲን ኪታንቻታ ቤዩዳይሳ ኑስ ዮቲዳ። 24 ኑፔካ ኢሲ ኢሲ አሲ ኢዛ ዱፎኮ ቢዲ ማጫሳቲ ጊዳ ማላ ቤዩዳ አቲን ዩሱሳ ደሚቤቴና” ጊዳ።

25 ኢዚካ ኢስታስ “ኢንቱ ዎዝናን ዎሶንታይቶ! ኢንቱ ዎዝናይ ካሴ ናቤቲ ዮቲዳይሳ አማናናፔ ታኪዳይቶ! 26 ዖሳፌ ኪቲቲዳይሲ ሃ ሜቶዛ ኤካናሲኔ ጌዴ ባ ቦንቾሶ ጌላናስ ቤሴኔ?” ጊደስ። 27 ሙሴፔኔ ናቤታፔ ዶሚዲ ጌሻ ማፃፋታን ኢዛ ጊሽ ሃፌቲዳይሳ ኢስታስ ሎዔስ ዮቲደስ።

28 ኢስቲ ባ ቢዛሶ ማቲዳ ዎዴ ዩሱሲ አዲ ቢዛ ሚሳቲደስ።
29 ኢስቲካ ቃሴ “ጋዴይ ቃሚዛ ጊሽ ኑናራ አቃ” ጊዲ ኢዛ ኬሂ ዎሲን ኢስታራ አቃናስ ጌሊደስ። 30 ኢስታራ ኢሲፌ ማዳን ኡቲዲ ኡኬሳ ባ ኩሼን አይኪዲ ኢስታስ ሚንሲ ሚንሲ ኢሚደስ። 31 ሄሳ ዎዴ ኢስታ አይፌይ ዶዮቲን ኢዛ ጊዲዳይሳ ኤሪዳ፤ ኢዚካ ኢስታ አይፌፔ ጌሚደስ። 32 ኢስቲካ “ኑ ዩሼ አጌ ቦላ ዲሺን ኑና ሃሳዩሲዲ ጌሻ ማፃፋታካ ቆንጨሲዲ ኑስ ጌላናሼ ዮቲን ኑ ዎዝናይ ታማ ማላ ፀጌቲቤኔ?” ጊዲ ኢሶይ ኢሳራ ሃሳቦቲዳ

33 ሄራካ ደንዲዲ ዩሩሳላሜ ሲሚ ቢዳ። ታማኔ ኢሲኔቲኔ ኢስታራ ኢሲፌ ዲዛይቲካ ኢሲ ቦላ ሺቂ ዲዛይታ ደሚዳ።
34 ኢስቲካ ባ ጊዶን ኢሶይ ኢሳስ “ጎዳይ ቱሙ ደንዲደስ! ሲሞናስካ ቤቲደስ” ጊዳ።

35 ኢዛ ካሊዛይታፔ ናምዓቲ አጌ ቦላ ሃኒዳይሳኔ ዩሱሲ ኡኬሳ ሚንሲ ሚንሲ ኢሚዳ ዎዴ ኢስቲ ዎስት ኤሪዳኮ ኢስታስ ዮቲዳ።

ዮሱሲ ባና ካሊዛይታስ ቆንጨዴስ

(ማቶ 28: 16-20፤ ማር 16: 14-18፤ ዮሃ 20: 19-23፤ ሃዋ 1: 6-8)

36 ሄሳ ጊሽ ኢስቲ ባ ጊዶን ሃሳዬቲሺን ዮሱሲ ኢስታ ጊዶን ኤቁዲ “ሳርይ ኢንቴስ ጊዶ!” ጊዴስ።

37 ጊዶ አቲን ኢስቲ ሞይቲሌ ቤዩዳ ሚሳቲን ኬሂ ዳጋሚዳ።

38 ኢዚካ ኢስታስ “አዛስ ዳሮ ቆፔቲ? አዛስ ኢንቴ ዎዝናራ ሲዴቲ? 39 ታ ኩሼታኔ ታ ቶሆታ ሃ ዔሊቴ ታናኮ፤ ቃሴካ ታና አይኪ ቤዩቴ፤ ታና ኢንቴ ቤዩዛይሳ ማላ ሞይቲሌስ አሾይኔ ሜቁሲ ዴና” ጊዴስ።

40 ሄሳ ጊ ሲሚዲ ባ ቶሆታኔ ባ ኩሼታ ኢስታ ቤሲዴስ።

41 ኢስቲካ ኡፋይሳ ዳሮፔኔ ማላሌቴሳፌ ዴንዲዳይሳን ቡሮ አማኖንታ ዲሺን ዮሱሲ “ሄሳን አይኮ ሚዛዚ ዲዜ?” ጊዲ ኢስታ አይቺዴስ። 42 ኢስቲካ ሞሌ ዒፃ ኢሲ ባርስ ኢዛስ ኢሚዳ።

43 ኢዚካ ኤኪዲ ኢስታ ሲንሳን ሚዴስ።

44 ኢዚካ “ኢንቴናራ ታ ዲዛ ዎዴ ‘ሙሴ ዎጋን ናቤታኒኔ ማዛሙሬ ማፃፋታን ታ ጊሽ ፃፌቲዳይሲ ዉሪካ ፖሌታናስ ቤሴስ’ ጋዳ ታ ኢንቴስ ዮቲዳ ታ ቃላይ ሃይሳኮ” ጊዴስ።

45 ሄ ዎዴ ጌሻ ማፃፋታ ኢስቲ ኤራና ማላ ዎዝና ኢስታስ ዶዩዴስ። 46 ኢስታስካ “ኪርስቶሲ ዋዬ ቤያና፤ ሄቫንሶ ጋላስ ሃይቆፔ ዴንዳና ጌቴቲዲ ፃፌቲዴስ። 47 ዮሩሳላሜፔ ዶሚዲ ኡባ ዴሬስ ናጋራፔ ሲሞይኔ ማሮቴሲ ኢዛ ሱንሳን ዮቴታና።

48 ኢንቴካ ሃይሳስ ማርካታ። 49 ታካ ታ አዋይ ኢሚዳ ኡፋይሳ ኢንቴስ ዮዳና፤ ኢንቴ ቃሴ ዎልቃ ቦላፌ ማይፃና ጋካናስ ዮሩሳላሜ ካታማን ታኪቴ” ጊዴስ። *

ዮሱሲ ፑዴ ሳሎ ቢዴስ

(ማር 16: 19-20፤ ሃዋ 1: 9-11)

50 ሄሳፌ ጉዩ ኢስታ ኤኪዲ ቢታኒያ ጌቴቲዛሶ ኬዚዴስ። ባ ኩሼታካ ዴንሲዲ ኢስታ አንጂዴስ። * 51 ኢስታ አንጂሼ ኢስታፌ ሻካቲዲ ፑዴ ሳሎ ቢዴስ። 52 ኢስቲካ ኢዛስ ሆኪ ጎይኒዳ፤ ኬሂ ኡፋዮቲሼ ዮሩሳላሜ ሲሚዳ። 53 ኡባ ዎዴ ያሳ ኬሳን ያሳ ጋላቲሼ ጋምዲዳ።

* 24:49 ሃዋ 1: 4 * 24:50 ሃዋ 1: 9-11

አራሳ ጫቆ ማገፋ ጋሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 22 Sep 2022 from source files
dated 29 Jan 2022
dffa0cbb-5f77-5875-bf95-f4176677af45